


CITAMPÌ CYÀ PAASÀKÀ

 Ncyà bushùwà ne ndyèsè bwà kwiikala kaaba aka mu dindà emu, mu mufikilu ewu wà dyashiibwa dyà dyàpà edi dyà Beena Kantu-ku-byanza bàà Èvànjeeliyò mu Kaabujimà mu Phoenix emu, ne dyà kumanya ne Mukalenge mmumpèeshe katùpà kààdi kakesè, bwà kwabanyanganakù bwobùmwè ebu. Ndi muswèku kweela Mwanèètù Carl Williams mwoyi ne mukàjèndè, Mwanèètù Stromei, ne bakwàbò bàdi pa cibùmbà cyà ku cyambilu apa aba, Mwanèètù Shores, Mwanèètù Outlaw, bambi abu, ne nwènù bônso bantù balenga aba.

² Nudi bamanyè's, mémè pàanyi, mvwa mupetè mufikilu wà dilediibwa lumingu lwáshààdi elu. Ne ndi mukùlumpè ndambù kutàmba dyàpà edi's. Ngeela meeji ne yèyè wámbi ne: “Bidimu bitaanu . . . ne, bwà dyàpà edi.”

³ Muntu kampànda ùvwa wàmba, ditùkù adi, wàmba ne: “Ukààdi ne bidimu bíngà, Mwanèètù Branham?”

⁴ Mémè ne “Makùmi àbìdì ne bisambòmbò.” Ki mémè ne: “Ndi mukùpùle bidimu makùmi àbìdì ne bitaanu byà ntwadijilu abi. Ncyèna muMukwàcile mudimu bímpè menemene mu byòbì abi to.” Mémè ne: “Ndi ntèkemena ne Yèyè, pèndè, ùdi ùbìkùpula.” Bwà kuMufikisha Yèyè ku dyenza nànkù's nebìikalè bishiilangàne.

⁵ Kàdi mbímpè bwà kwikala apa. Nènku mpindyewu katwèna baswè kunwàngata díbà dyènù dyàbúngì to. Bwalu tudi . . . Ntu—ntu misangu yònsò ànu ncìina, paanyimà pàà mémè mumanè kutèeleja àmwè à ku majaadiki malenga aa, ne bintu bìdì byènzekà ebi, bwà ne ndi . . . ne misambu, bwà ncilu kwenza cintu kampànda cyà cibinyangakaja nànsha. Kàdi mvwa muswè kusàkidila ku byòbì abi, kwòkò cintu cìndì mufwànyine kukùsàkidila. Bàna bèètù bàà bakàji aba . . .

⁶ Mwanèètù wa balùme wímbi musambu mu dindà emu awu, mwanèètù wa bafiike awu, ngányìshì cyòci aci, *Dìsù Pa Nyuunyì Wa Mushààmushà*.

⁷ Ne bàna bèètù bàà bakàji bímbì musambu ewu aba, aci's cívwa ndímwè dyà mambulwisha àanyi kacya ànu ngíkala kaaba aka bwà misangu wányi wà kumpàla. Ndi ne wòwò awu. Ndi naawù mukwàta pa mukàbà wà méyì, ne ndi muwéle muwelùlùle ne: *Ndi Muswè Kuyiikilangana Nèndè Pa Bwalu Abu*. Ki mémè kukonka Mwanèètù Dawson Riley wàwa, mulundà wanyì, bwà ne ní ùvwakù mufwànyine, bàmwè bàà kùdìbo, bwà bàatàngilakù ní bàdi mwà kupeta bòbò bainábànza abu, ní bàcìvwaku ànu pa buloba apa, bwà bawímbèku cyàkàbìdì mu dindà emu. Ne ndi ntèkemena ne Terry mmuwùpetè. Ne ndi ncinka ne ùvwa muwùpetè. Ndi muswè kuumusha aci

mwaba awu, pàmwápa, kucyèla pa mukàbà wà mèyi anyi cintu kampànda, bwalu ndi cyà bushùwà munangè musambu awu. Ne ki dyànyì. . . dyànyì dijinga dítu ndyà kuyiikilangana Nendè pa bwalu abu. Ngeela meeji ne twètù bônso tutu baswè kwenza nàнку. Ki bwà cinyì tudi kaaba aka mu dindà emu.

⁸ Mpindyewu, masangisha àdi alonda, lumingu lùlwalwà elu. Mbímpè bwà kubitèèla anyi? [Mwanèètù wa balùme kampànda ùdi wàmba ne: “Bushùwà’s.”—Muf.] Bikèngela bwà ngi—ngiikalè kwànyì kumbèlu lumingu lùlwalwà elu, ku tabernacle, mu dyàlumingu dilwalwà edi, bwà disangisha dyà Paasàkà; Mu diisambòmbò dilòlò, mu dyàlumingu, ne mu dyàlumingu dilòlò. Ki pashiishe nèngàalukilè ku Californie. Nwènù bônso bàdi pabwìpi ne Californie abu, nèngiikalè cyà bushùwà ne disànkà dyà kwikala neenù ku masangisha awu kuntwaku. Ne ndi ngeela meeji ne Billy mmutùme dimanyisha divwà kadiyi mu dyòdi to. Kùdi. . . Mmwambè ne: “Ku Cilàala-beenyi cyà Biltmore,” ngeela meeji, “ki kùdiwu ne cyà kwenzekela.” Cìdi. . . [Muntu kampànda ùdi wàmba ne: “Kí mbafwànyine kudipeta to.”] Kí mbafwànyine kudipeta to. Nènku nku Eastmont anyi? [“Embassy.”] Embassy, ku Embassy Hotel. Pa nàнку yònsò wa ku beena kantu-ku-byanza bàà Èvànjeeliyò mu Kaabujimà kuntwaku mmufwànyine kunùmanyisha, panwikalà nusanganyiibwa mu njila awu.

⁹ Ne pashiishe twalukila buumùkilekù, nènku nya ku Àfrikè wa ku Sud dìbà adi. Ànu ngondo umwèpelè cyanààna kuumukila ku leelù ewu, tuya ku Àfrikè wa ku Sud, batèkèmenè cikondo cyà dicyònkómoka mu Mukalenge, mu matunga matwè ku àsàtù kuntwaku. Pa nàнку ncyà bushùwà ne tudi—tudi tutamba kulòmba masambila ènù. Pàmwápa ncyàkupeta mwà kunùmònakù kàbidì to, bu Mukalenge mwà kushaala mulame bwà twètù kuya, too ne pàngàalukilà. Ne ndi ntèkemena ne nènùtwàdìlè mulubù munène patwiikalà baalùkile.

¹⁰ Musangu wà ndekeelu kuntwaku, ngeela meeji ne Mukalenge wàkampà masangisha à matàmbe bunène ànkaadiku mupetè. Nènku musangu kampànda, bwà dibìikila dyà ku cyoshelu. . . Mpindyewu, eci mmu beena kalaba bàà ku muji. Bwà ku dyànyì dimanya, kùvwa bantu binunu makùmi àsàtù bààkiitabà Kilistò musangu wùmwè. Kàdi twàkadyàmbidila ne pàmwápa bàvwa baswè kwamba ne ndyondopa dyà mubidi, bwalu kùvwa bantu batwè ku binunu makùmi àbìdi ne bitaanu bondòpiibwe musangu wùmwè. Kàdi ditùkù dyàkalondà, mulombodi wa—wa Durban, udi Sidney Smith awu, kwambaye ne: “Ndà ku dididiishi dyèbè aku, ùtangilè bàdi bènda bàpwèka ne mùsèsèsù abu.” Nènku kuvwà bisemuna ne bisemuna byùle tètè, bipàcisha ne mabaya à balèmà ne bikwàbò, byambakaja; mu mùshindù wa ne bàvwa bènda bàlonda, beena kalaba abu, bà bwalu mbàvwà mu mvità muntu ne mukwèndè abu, bènda

bàpweka ne misèèsù yà mu cimenga ayi, bìmba ne *Itàbùùjà Nàka* mu mwakulu wàbò wà ku dibèèlè.

¹¹ Ndi nnwàmbila's, mwoyi wànyì wàkatùpika ne disànka. Byenzè bu . . . Paùdi umòna cintu cyà mùshindù awu, Mwanèètù Shores, s'udi udyùmvwakù ne mudimu wèbè kí mmwenjìibwe cyanààna dībà adi to. Udi umòna's, udi muteetè. Nènku ndi ntèkemena ne Nzambì ùdi ùcyènzulula, kabìyi ne mbwalu—mbwalu tuyààyakù to, kàdi mbwalu tudi bindile Dilwa dyà Mukalenge.

¹² Nènku ànu mùdi musambu mwambè amu, tudi twenda tukèbangana ne mùkòòkò mukesè, mujimìne awu, mbwena kwamba ne, wòwò awu. . . Yèyè—Yèyè kààkulwa to pàdi mùkòòkò awu kawùyi mubwelè nànsha. Bikèngela bwà wònsò wikalè mu cikùmbi. Yèyè kààkukànga ciibi to pàdi wà ndekeelu awu kawùyi mubwelè nànsha. Pa nàнку, nwènú bambì naanyì, ndi mutwishìibwe pàmwè neenù, mu dindà emu, bwà kuteeta kwenda kukèbangana ne mùkòòkò wà ndekeelu awu. Mmufwànyìne kusanganyìbwa mu Phoenix, mu dindà emu. Ncyèna mumanyè to. Kàdi pààbwelà wà ndekeelu awu, dībà àdi Mulami wa mikòòkò neàkangè ciibi.

¹³ [Mwanèètù wa balùme kampànda ùdi wàmba ne: “Mwanèètù Branham?”—Muf.] Yè? [“Ndikù mwà kwambakù díyi anyi?”] Cyà bushùwà udi mwà kwamba. [“Ndi mupwè mwoyi bwalu kampànda. Tudi munkaci mwà kwakula pa. . .” Katùpa kàà mukàbà wà mèyi munda mutupù.] Abi's mbimpè menemene. [“Ne ndi mumanyè ne, muntu yònsò ewu ùtukù ànu ùpwa mwoyi cintu kampànda, ku musangu ne ku musangu.”] Pa kuumusha mèmè. [“Kakaa!”]

¹⁴ Mèmè ngudi ukèngela bwà kwiikala kufùnda bìngiìkalà ne cyà kwamba, pàmwè ne byònsò. Ndi. . . Kacya ànu mbanga kukola, ndi ntàmba kupeta lutàtù bwà kuvùluka, mfùnda Mifùndù yànyì, ne bikwàbò. Kale wàwa, mvwà mwà kutèèka Mifùndù mitwè ku makùmi àtaanu milondàngàne mu meeji ànyì, nciyikù nànsha. . . nyìpicisha yònsò buludì, kàdi nkààdi mushiye kilòmèètà bùngì cyanààna paanyimà yà lutàtù yà miinè matùkù awu.

¹⁵ Pa nàнку, tudi bindile Dilwa dyà Mukalenge. Mukalenge ànùbènèshè bònsò!

¹⁶ Ne dībà adi ujuuka apa, wela meeji. . . Usòmba mwaba ewu utèèleja bantu aba bàfila majaadiki. Udyàmbidila ne: “Èè, pàngààbànda, nèngàmbè cintu kampànda pa bwalu abu.” Dībà adi, kùdi byàbùngì be byà kwamba, s'udi mufwànyìne kwenza ditùkù dijimà ànu ubyàmba. Kàdi, ncyà bushùwà ne ndi nnwànyìsha nwènú bònsò. Dyàpà dikesè edi ditungunukèku ànu ne kwenda kudyunda. Èkèleeziyà ne èkèleeziyà yònsò mu Phoenix àtungunukèku ànu ne kwenda kukola too ne pààlwà Yesù, ki disambila dyànyì dyà meeji matòòke ndyòdi adi.

17 Mpindyewu, ngeela meeji, ànu bwà kutwikishishakù ndambù, tùjuukilàayi kuulu pàtùcidì twenza disambila apa. Nudi mwà kwiimanakù anyi?

18 Nzambi wa Bukolè bwònsò, Taatù wa Mukalenge wetù Yesù Kilstò, WàkaMubiisha ku bafwè, ne mutùpèesheYè bu Mulàmbù, ne Mukalenge ne Musùngidi, tudi ne kusàkidila kwàbùngì Kùdi bwà dyèsè ditùdi naadi mu dindà emu edi, dyà kwimanakù mu Bwiikadi Bwèbè, pàmwè ne cisàmbà Cyèbè cidì cipikùdiibwe ne cindile Dilwa Dyèndè dyà cyàkàbidì dyà butùmbi, bwà kutwàkidila kùdiYe Yèyè mwinè. Kwòkò mpèkaatù munkaci mwètù, Mukalenge, tùkezùlèku ne hizòpà Webè. Nènku nyewù tulòmba, Taatù wa mu Dyulu, bwà Wòndopèku mubèèdi yònsò udi munkaci mwètù emu.

19 Ne kwòkò kufwànyineku kwiikala, ku mpùùkàpùùkà, aba bàdi kabàyi baKumanyè, mu dibàtiiza dinène dyà Nyumà Mwimpè ditùdi tulwangeena mvità ne mwètù mwònsò edi, ne twamba ne ncintu cidì ne cyà kwenjiibwa, bilondèshile Mifùndù bwà ditùkù dyà ndekeelu edi aci, tudi tulòmba, Nzambi, bwà Àtùpwekèlè bònsò, leelù ewu, ne àtùbàtiizè cyàkàbidì mu Mubidi, ne àbwejèku aba bàdi pambèlu, munda, bòbò pààbò, Taatù.

20 Tùbènèshèku patùdi tubala Dìyi Dyèbè ne tudyènzeja bwà kwakula cidì Bulelèlà bwà Dìyi Dyèbè apa. Bwikidijàku mukana mwètù ku cidì kaciyi bulelèlà aci, ne kàngulà myoyi yètù ne mukana mwètù ku cidì Bulelèlà, patùdi tudilàmbula Kùdi apa. Kwàtakù mudimu ne mukana mwètù bwà kwakula, ne maci ètù bwà kuumvwa, ne myoyi yètù bwà kwakidila. Bwalu tudi tulòmba nùnkù mu Dìna dyà Yesù, Yèyè udi mubilongòlòle bwà kwiikalabi nànkù awu. Amen.

21 Ndi muswè kubala mu Dìyi dyà Cijila, myaba yisàtù mu Bible. Nènku panùdi baswè kufùnda yòyi eyi, ne baswè kuyilondesha, bwà nwayibala bwà malubà makwàbò, Ndi mufwànyine kwiikala ne disànkà dyàbùngì bu nwènù mwà kuyifùnda. Myaba yingikalà mwà kubala yidi m'Maataayi 28:1-10, ne pashiishe Bwàkabuulwibwà 1:17-18, Loomò 8:11. Nènku swàyi nyàmbùlùlè cyàkàbidì. Nènku mpindyewu Maataayi 28:1 too ne ku 10, Bwàkabuulwibwà 1:17 too ne ku 18, ne Loomò 8:11.

22 Mpindyewu tukàadi tuseemena ku Paasàkà. Ne panùdi nwenda nusòmba pa myaba yènù, ne nwenda nucifùnda apu, ndi ngeela meeji ne lumingu lùlwalwà elu ndumingu lwà lutàmbe bunènè ne lwà civùlukilu ku mbingu yònsò yà mu cidimu. Ngeela meeji ne cintu cyà citàmbe bunène citwàtwilàku cyanga mu lumingu elu, lumingu lùlwalwà elu, bývwa mbwalu butàmbe bunènè bùkaadiku bwenzèke pa buloba ebu. Ndi ngeela meeji ne kakwènakù cintu nànsha cimwè cikaadi cicitàmbe nànsha. Wèwè udi wamba ne: “Èè, di—dipoopediibwa dyà pa nkùrusè's divwa dinène.” Kàdi bantu bààbùngì's bàkaadi bafwàfwàfwe,

bantu bàábúngì bàkaadikù bapoopèdiibwe pa nkùrusè, nànsha mene mu matukù à Mukalenge wetù awu. Kàdi kùvwa ànu Umwèpelè wa kùdìbo Wákabiika ku bafwè. Acì ncyákacìtwà citampì.

²³ Mpindyewu ndi muswè kubala. Nènku aka kàdi bu kaadiyiisha kakesè kàà kàdyànjidila Paasàkà, bu Mukalenge mwà kwanyisha, kàà tusunsa tutwè ku makùmi ànaayi. Mpindyewu túbalaàyi mu Èvànjeeliyò wa Maataàyi Munsantu, nshapità wa 28, tubanga nendè.

Ku ndekeelu wa nsabatu, pàkaavwàku bufùkù búbanga kucyà batàngile ku ditùkù dyà kumpalà dyà lumingu, kulwakù Mààriyà wa ku Magàdàlà ne mukwàbò Mààriyà awu bwà kumòna lukità.

Nènku, mònaayi, kwàkenzeka dizakala dinènè dyà buloba: bwalu mwanjèlò wa Mukalenge wàkapweka ùfùmina mu dyulu, ne wàkalwa ne wàkabùnguluja dìbwe adi kudyumusha ku ciibi, ne wàkasòmbapù.

Mmwènekelu wendè ùvwa bu mukenyi, ne ciwàlù cyèndè citòòke bu nêjè:

Nènku bwà bwòwà bwà yéyè awu dizakala dyàkenzekà... balami (mfwilaayikù luse) bàakazakala, ne bàakashàala bu bantu bafwè.

Ki mwanjèlò kwandamuna e kwambilayè bakàji abu ne: Nwènu kanùcìnyì to: bwalu ndi mumanyè ne nwènu nudi nukèba Yesù, uwa mupoopèdiibwe pa nkùrusè awu.

Kéna apa to: bwalu mmubùike ku lufù, bu mùvwàye mwambè. Lwáyi ne nùmonè mwaba wùvwa Mukalenge mulàale.

Nènku ndàayi lùkàsà, nùkambilè bayiidi bènde ne mmubùike ku bafwè: ne, mònaayi, yéyè ùdi ùndyànjidila mu Ngalèlà; ki munwàmumwènenà: mònaayi, ngànwàmbìdi.

Ki kuumukabò lùkàsà ku lukità aku ne bwòwà ne disànkà dinène; ne bàakanyeema lubilu ne kwambilabo bayiidi.

Nènku pàvwàbo bènda bàya bwà kambila bayiidi bèndè apu, mònaayi, Yesù wàkatwilangana naabò, e kwamba ne: Mwoyi wènu awu bònsò. Ki kulwabò kumukwàta ku makàsà, ne kumukuukwilabò.

Pashùshe Yesù kubàmbila ne: Kanùcìnyì nànsha: ndàayi nùkambilè bânà bèètù bwà bàye mu Ngalèlà, ne mwómò amu ki mwàmmwènenàbo.

²⁴ Ne Bwàkabuulwibwa, nshapità 1, ku mvensà wa 17 ne wa 18.

Ne pângààkamumòná, ngákapòna ku makàsà èndè bu mufwè. Ne yéyè wàkatèèka cyanza cyèndè cyà dyàbalùme pambidi pàànyì, ùngambila ne: Kùcìnyì to; mèmè ndi wa kumpàlà ne wa ndekeelu:

Ndi ewu udi ne mwoyi, ne ùwwa mufwè; ne, mòna, Ndi ne mwoyi bwà kashidi ne kashidi, Amen; ne ndi ne nsapì yà lufù ne yà ifernò.

25 Ne mu Mukàndà wà Loomò, nshapità wa 8, biikàle tubangila ku mvensà wa 11.

Kàdi pùkalàbi ne Nyumà wa ewu wákabiisha Yesù ku bafwè mmusòmbèle munda mwènù, ewu wákabiisha Kilistò ku bafwè awu neafuululè kàbidi mibidi yènù yà cifwàkà ayi ku Nyumà wèndè udi musòmbèle munda mwènù awu.

26 Mpindyewu ndi ne dyeyemena ne Mukalenge Yesù neàsakidilè mabènesha Èndè ku kubala kwà Méyì aa. Pa kumòna aci, Paasàkà, ndi mucitwe citampì mu mwoyi wànyì sungasunga bu disangisha dyà ditàmbe bunène, anyì bu bwalu bwà butàmbe bunènè bwà—bwà cidimu.

27 Ndi muswè kunùlòmba bwà nùmfwilaayikù luse bwà katancì. Aci kì mmùshindù wà dinwènzela mutooyi wà lukutukutu, dinùtonokela dyà mùshindù kampànda anyì? Mbìmpè anyì? Nudikù mwà kucyùmva bimpè mùshindù awu anyì? Kaa! Kanwèna mwà kucyùmvwakù to. Mbitàmbe bwìmpè, ànu nànkù awu anyì? Ncìwva muswè bwà kutàmbe kuseemena pabwìpì to.

28 Mpindyewu, cìndì ngambila nùnkù, mbwalu, Paasàkà, Yéyè wákajaadika cikavwà Bible mwambè. Mufundu wònsò wùvwàku mufundiiibwe bwà kwenzaYè, Yéyè wàkatwà buuMaasiyà Bwèndè citampì pàakabiikàYe ku bafwè apu, citampì cyà Paasàkà. Tudi naabì búngì cyanààna leelù ewu bitùdì twamba, ne, kusumbà kwà bitampì byà Paasàkà. Èè, ndi muswè kwakula mu dindà emu pa: *Citampì Cyà Paasàkà*. Ncitampì cishiilàngàne ne bitùdì tusumba ku mfrangà yètù abi, bu citampì cidi ne cyà kutwibwa pa mikàndà mifundilangana, ngeela meeji, Nsangilu wa beena Disaamà dyà cyádi anyì cyònsò cidibo bàcibiikila aci. Ndi—ndi ngeela meeji ne eci citampì ncitampì cishiilàngàne ndambù. Ne bu mùdibi ne Paasàkà kì ditùkù dinène dyà cidimu bwètù twètù beena Kilistò bàdì bàmba ne tùdì bàna bàà Nzambì abu, Ndi muswè kuteeta bwà kubwelamù ne kumòna mutùdì ne cyà kwiikala mu bwobùmwe ne cintu cinène cidi Kilistò mutwènzèle eci.

29 Dìyì dyà Nzambì dyàkambiibwa nkàma yàbúngì, yàbúngì yà bidimu kumpàlà kwà Dilwa Dyèndè, dyà dipoopediibwa Dyèndè dyà pa nkùrusè, ne dyà lufù Lwèndè, ne dyà dikèngà Dyèndè, kàbidi ne dyà dibiiikà Dyèndè dyà ku lufù. Netwèndè tulonga masangisha aa, pàmwàpa, lumingu lùlwalwà elu,

patwikalà tutèeleja ndongamu yètù—yètù yà ku tudyòmbà; ne mu èkèleeziyà yètù, pàmwè ne bampaasàtà bèètù, ne bakwàbò, lumingu lùlwalwà elu.

³⁰ Kàdi ku matùkù ònsò ne ku bintu byònsò byàkenzà Yesù, ne bulelèlà kwitaba dishindika Dyèndè dyònsò dyà Dìyi dyà Nzambì ne byàkenzàYe bwà kuDyùja, bwà kwondopa kwà babèèdi, kubiishà bafwè, kwipata kwà baadémons, kuyiisha kwà bapele Èvànjeeliyò, ne kuuja kwà Dìyi dyònsò dyàkambà Nzambì ne Yèyè neènzè pàakalwàYe; ne pashiishe kàbìdi kukènga bwà mpèkaatù yètù, pa kaaba kèètù, bwà kwiikala difuta dyà cibawu bwà mpèkaatù, pa nkùrusè, kùvwà muntu mukwàbò nànsa umwe kayikù mufwànyine kwikala mwenzè to pa kuumusha Yèyè. Kàdi kumutu kwà byònsò abi, ndi mémè ngeela meeji ne Paasàkà ngwàkatwà cìtampì ku cintu cyònsò aci mu kaabujimà.

³¹ Bwalu, kùkaavwakù bapròfetà pa buloba, bàvwà bambè bipròfetà kumpàlà Kwèndè. Kùkaavwakù bapròfetà pa buloba, bàvwà bòndòpe babèèdi, babiishe too ne bafwè, ne benzè bimanyinu bimwèbimwè byàkenzà Yesù abi.

³² Kàdi Paasàkà wàkacijaadika. Wàkatwà Dìyi dyà Nzambì cìtampì kashidi, bwà mweena kwiitabuuja mulelèlà. Mifitù yònsò ne mpatà byàkasùnsudiibwa, mu dindà dyà dipàte tèntè ne mabènesha adi. Muntu ùvwà mukàngila munda, mutùdi mwà kwamba, mu nzùbù wa bùlokò, nànsa mene batèndeledi kumpàlà kwà ditùkù edi, bwalu bàkaavwa. . . bamòne nkwa minènè yà ntèndeleele, ne dikwàtà dyà mudimu dyà Nyumà Mwímpè, ne bikwàbò. Kàdi pàvwà muntu ùfwa, bìvwà bimwèka bu bikòse bwalu. Kàdi pàakalwà Ewu nùnkù, ne kwamba ne: “Ndi ne bukolè bwà kutèeka mwoyi Wànyi pànshi; Ndi ne bukolè bwà kuwàngatulula kàbìdi,” ne pashiishe kuya kajaadika cyàkambàYe aci, bwànyi mémè, aci—aci ki cìtampì cyàci, pàdi—pàdi cintu kampànda cyambiibwe ne pashiishe cikenkèciibwe ne cishindikiibwe.

³³ Bu muntu mwà kwamba, mùvwà Columbus, wìtabuuja ne buloba bùvwa buvùngàmàne, ne kutàngilayè màzuwà à màyi, mùdiibo bàtùlondela, mwàkabwelàwo, ne mùvwàye mwà kumòna dikunji adi kule kumpàlà kwà kumònayè màzuwà. Ki kumujaadikilaci ne buloba bùvwà buvùngàmàne. Bantu kabàvwà bìtabuuja aci mu ditùkù adi to, kàdi yèyè ùvwà muntu mweena lùmònu. Wàkasòmba bwà kujaadikilangana cyàkamònàye mu cìkèènà-kumòna aci, ne cìvwa bulelèlà.

³⁴ Nènku Nzambì wàkadìpangadika bwà kujaadika Dìyi Dyèndè ne, mBulelèlà. Pa nànkù Yèyè. . . Kùvwà Muntu ànu umwèpelè ùvwà mwà kwenza cyòci aci, ne mwiinè awu ùvwà n’Yesù. Ne Yèyè wàkalwa ne wàkajaadika ne cìvwa Bulelèlà. Cyàkacìtwa cìtampì. Ne aci kukòsaci bitampì byònsò byà mifitù, ne kutangalajaci miitabuuja ònsò à didifwànyikijila à

ntèndeleeleu mikwàbò ayi, ne bikwàbò, mùvwà bantu banène bajjuukè ne kwamba bintu binène, bilenga byà dikèma; kàdi bàdi, muntu ne muntu, mu lukità's. Kàdi wetù ntèndeleeleu wa beena Kilistò ki umwèpelè udi ne lukità munda mutupù. Nènku aci ncidì cìnjaadikilà mèmè ne Yèyè ùdi Nzambì wa bafwè, ne Nzambì wa bàà mwoyi, bwà ne Yèyè ùvwà mwà kubiisha bafwè, kubààluja cyàkàbìdi ku mwoyi. Ne mèmè . . . bukolè bufuùluludi ebu, Nyumà Wendè mufuùluludi ewu, mujaadikèjààdike munda mwà bidimu ne Yèyè Ki Udi mwà kufuùlulula bafwè, kubààluja cyàkàbìdi ku mwoyi.

³⁵ Ne pààkajaadikàYe ku mulayi Wendè, bukolè bunènè bwà dicimuna bùvwàYe naabù ebu, dyà Paasàkà Yèyè wàkajaadika ne Ùvwà mwà kucimuna lufù, ifernò, ne lukità. “Ndi Ewu uvwa mufwè, ne udi cyàkàbìdi ne mwoyi, ne udi ne mwoyi bwà kashidi; ne udi ne nsapì yà—yà lufù, yà ifernò, ne yà lukità.” Dìyì kaayipu—kaayipu bwà muntu wetù ewu kwambayè's wè! Ne Yèyè kàakadyàmba ànu cyanààna to, kàdi ukaavwa mumanè kujaadika ne Yèyè—Yèyè ùvwà ne cìvwàYe mwambè ne ùvwà naaci aci.

³⁶ Nènku ndi ngeela meeji ne, Nzambì enzeku bwà ditùkù edi dilwe lukàsà ditùdi twètù, bu beena Kilistò bàdi biitàbùùje Bible ewu, mwà kujaadika bitùdi twamba. Nwamònu anyi? Ki cidì cyènza, mungàmbi katanci aka ne: “Mukèlè wa bà pa buloba,” mwàmbi mwanètù wa bakàji amu. Ncyà bushùwà. Bàà pa buloba bàdi munkaci mwà kukeba mukèlè ewu. Ne patùdi mwà kujaadika ku nsòmbelu yètù, ne ku Bible ne, nsòmbelu yètù yidi yishindika Dìyì adi ne didi ne mwoyi leelù ewu ne, ki ditùkù ditùdi bindile ndyòdi adi.

³⁷ Dìyì . . . “Nyumà ewu,” Loomò 8 awu kùdi :11 mmwambè ne: “Pìikalàbi ne Nyumà wàkabiisha Yesù Kilistò ku lufù ewu ùdi munda mwènù, neàfuulululè kàbìdi mibidi yènù yà cifwàkà ayi.” KààkaMujaadikilà ànu Yèyè to, ne twètù, bwà ne Yèyè ùvwà Yèhowà Mupikudi ne bukolè pa lufù, ifernò ne lukità, kàdi Yèyè mmutupèèshè pèètù mpungà wa kufika ku Nyumà umwèumwè awu, bwà twètù biinè twamòna mwà kwiikala ne ditwishiiibwa dyà ne twètù pèètù tudi bafuùlululùdiibwe kùdi Nyumà umwèumwè awu. Bwalu pìikalà Nyumà wàkajuula Yesù ku bafwè awu musòmbèle mu mubidi wèbè amu, Yèyè neàfuulululè mubidi wèbè wà cifwàkà awu. Mpindyewu, mwakù *kufuùlulula* mbwena kwamba ne “kuvwijiibwa ne mwoyi paanyimà pàà lufù.” Paanyimà pàà wòwò mumanè kufwà, pashiishe bùdìwu naabù mbwà kufuùlululudiibwa.

³⁸ Buloba bùvwà bukangila mu mpatà, munda mwà bikondo byàbúngì too ne dyòdi dìbà adi. Eci cyàkajaadikiibwa, kacyi cyà bàmba ànu cyanààna to, kàdi cijaadikiibwe. Ngeela meeji ne cintu kanà cyònsò cidì cyà mushinga . . .

³⁹ Bu mwàkambà Yesù ne: “Ndààyaaku, nùkalongèshè bàà

mu bisàmbà byònsò; ne nùbàjaadikilè, mu kubàleeja kwà bukolè bwà Nzambi patòòkè. Bimanyinu ebi nebifilè aba bàdi biitabuuja.” Aba bàdi bàlayà ne bàmba ne bàdi biitabuuja, Yèyè mmutùpèèshè dyumvwa dyà cyà bushùwà dyà cyòci aci, ne: “Bimanyinu ebi nebifilè bàdi biitabuuja.” Ki cìvwà mwà kwiikala cìleeji cyà bujaadiki bwàbò. Mpindyewu, twètù tudi mwà kwamba ne tudi twitabuuja. Kàdi patùdi ànu katùyi bapetè cìmanyinu cijaadika cyà ne Yèyè wàkamba ne neciikalè pambidi pèètù to, dîbà adi tudi ànu *tujikula* cyaanàna mutùdi beena kwiitabuuja, kàdi katùyi ne *cintu* cyà beena kwiitabuuja to.

⁴⁰ Bwalu, vùlukàayi. . . Kùkaadi ndambù wa matùkù, mvwa ntèeleja ndongamu wa—wa ku tudyòmbà ku cisanji cyà KAIR mu Tucson. Nènku mwambi ewu ùvwa mwangàte luseke lwà lùbèngangana neetù, ne: “Ntèdeleelu wa mpenta kàvwa cìngà cintu to ànu cintu cyètù cyà cyaanàna eci. Mùvwa. . . Kì mbìmpè kumutèèja to. Ùvwa wa kàyi kukwàcila kaaba kàmwè to.” Ki yèyè ne: “Muntu kanà yònsò ukàatukù mwakùle mu myakulu ewu, ne bintu ebi, ne wàmba ne ncìdiye, mwòndope babèèdi, ne bikwàbò, ku disambila, bwà ne aci bivwa bikengela kushiyangana naci ntàntà mule. Ne kusambidila bantu bapuuyle bakwàte ne byà luse abu, bwalu bàvwa mu—mu byejeji ne, kùvwa cintu cìvwa kaciya cyènda bìmpè kùdibo.” Kaa, mùshindù mwiinè wùmvwà mwà kwiikala mujingè kwandamuna mwanèètù awu ànu katanci kakesè cyaanàna’s wè! Wa bwalu wàkamba ne. . . “Aci, cìvwa cìfidiiibwe ànu bwà bàpostò mu Ditùkù dyà Mpenta, kùmba kujika.”

⁴¹ Mèmè ndi musangàne ne, bidimu makùmi àsàtù paanyimà, Pòlò ùvwa utèeka bulongàme mu mapà aa mu Èkèleeziyà. Mu Kolintò wa Kumpàla 15, ne: “Yèyè mmutèèke mu Èkèleeziyà dipà dyà kwakula kwà mu myakulu, bishimà. Ne makwàbò mapà ònsò aa àkatèekiibwa mu Èkèleeziyà.”

⁴² Yesù wàkamba nànkù. “Ndàayi pa buloba bujimà nùkayiishè Èvanjeeliyò kùdi cìfùkiibwà cyònsò.” Too ne penyì? “Buloba bujimà.” Kùdi nganyi? “Cìfùkiibwà cyònsò.” Bòbò kacya kabàtukù banji kuMupeta to. “Ne bimanyinu ebi nebifilè aba bàdi biitabuuja.” Too ne dîbà kaayi? “Buloba bujimà.” Kùdi nganyi? “Cìfùkiibwà cyònsò. Bimanyinu ebi nebibàfilè, pa buloba bujimà, ne mu cìfùkiibwà cyònsò. Bimanyinu ebi nebibàfilè: mu Dìna Dyànyì bòbò nebiipatè baadémons; nebàakulè mu myakulu mipyamipyà; bòbò bangàte cintu cìdi cìshipanganà, anyì nyòka, anyì cintu cyà kunwà cìdi cìshipanganà, kacyakubènzela bwalu to; nebàtentekelè babèèdi byanza, ne babèèdi nebàsangalè.” Ki cìvwà mudimu Wèndè wa ndekeelu mutùma naawù Èkèleeziyà, Maakò nshapita wa 16.

⁴³ Pòlò ngudi utèeka mapà aa mu Èkèleeziyà, bidimu makùmi àsàtù paanyimà. Ne yèyè wàkamba, mu Galàtiyà 1.8 ne: “Mwanjèlo wa mu Dyulu yèyè munùyiishè èvanjeeliyò mukwàbò nànsha wa bishi mushiilàngàne ne Ewu ukàadi mumana

kwakidila ewu,” nwamònu’s, ukààvwa mumana kuyiisha awu, “èdibwè mulawu.” Ndi ngiitabuuja ne mpenta wàkabanga kakùyi ndekeelu to. Ndi ngiitabuuja ne bìdi ne cyà kwiikala bwà cifùkiibwà cyònsò, bikondo byònsò, mu myaba yònsò, bwà ne bìvwa bikèngela bwà mpenta kushààlayè kashidi. Bivwa bikèngela bwà mabènesha à mpenta kwiikalawù pambidi pàà bantu.

⁴⁴ Nènku mpindyewu, dibènesha edi dyà mpenta ncinyi? Ndishindikila dyà dibìikà dyà ku lufù. Kabyèna bikèmesha to pàdi Èvànjeeliyò Yèyè mwinè ùmwija ne “nduumù lwìmpè.” Luumu lwìmpè lwà cinyi? Yèyè mmubiike ku bafwè. “Ne bwalu Mémè ndi ne mwoyi, nwènù pèènu nudi ne mwoyi.” Nwènù bàvwà musangu kampànda bafwè mu mpèkaatù ne matomboka, Nzambì mmutùfùlùlùlè pàmwè, ku Nyumà wàkabiisha Yesù ku bafwè awu. Nènku tudi mpindyewu basòmbe pàmwè Nendè mu myaba yà mu Dyulu, tuyiikilangana Nendè, twakula Nendè. Disànka kaayi dyà kulondelakù bantu bwalu abu, bàdi bìitabuuja ne m’Bulelèlà!

⁴⁵ Ndi ndikonka, leelù ewu. Ki cidi munkaci mwà kwenzeka eci. Tudi munkaci mwà kufikisha bantu kùdi Nzambì menemene anyi, peeshi tudi tubàfikisha ànu ku èkèleeziyà? Tudi ne cyà kubàfikisha kùdi Kilistò, kùdi bukolè bufùluludi ebu. Mbìmpè bwà kuya mu èkèleeziyà. Bushùwà. Piikalàbi ne kùdi ànu aku kutùyaaya, kî nkule menemene nànsha. Paùdi ulwa mu èkèleeziyà, abi’s mbìmpè; kàdi tùngunukà too ne kùdi Kilistò, umuka ku èkèleeziyà, bwalu tudi ne cyà kupeta bukolè bufùluludi ebu, twètù tutèkemena bwà kwiikala mu dibìikà dyà ku lufù dyà bantu bònsò adi, bwalu ki cintu cìmwèpelè ciikalàku mwà kutùjuula ku bafwè. “Bwalu piikalàbi ne Nyumà wàkabiisha Yesù ku bafwè ewu mmusòmbèle munda mwènù, Yèyè neàfuulululè kàbìdi, neànzeje, neàfikishe mibidi yènù yà cifwàkà ayi ku mwoyi.” Mulayi kaayi’s wè!

⁴⁶ Mpindyewu mònaayi. Mushinga munène mwiinè wà dibìikà dyà ku lufù edi nkwamba ne kuleeja, ne kujaadika ne Yesù mmubiike ku bafwè. Yèyè kî mmufwè to. Ùdi ne mwoyi. Udi ne mwoyi mwaba ewu. Ùdi munda mwètù. “Mémè nèngiikalè neenù, munda mwènù mene. Mu katanci kakesè emu bàà pa buloba kabààkuMmòna kàbìdi to. Kàdi, nwènù nenùMmònè, bwalu Nèngiikalè neenù, munda mwenù mene, too ne ku nshìkidilu kwà buloba.”

⁴⁷ Mpindyewu, twètù bu beena Kilistò, tudi bònsò twamba ne Yèyè ùdi ne mwoyi, anyi tudi bafùlùlùdùibwe ku— bafùlùlùdùibwe ku mwoyi. . . buumùke ku lufù bayè ku Mwoyi, ku Nyumà Wendè. Kàdi twètù katùyi bafùlùlùdùibwe to, díbà adi katwèna bavwijùibwe ne mwoyi to.

⁴⁸ Mpindyewu netùbwelè mu cyeena-bwalu eci, bu Mukalenge mwà kwanyisha, ne kuteeta kucilongesha munda mwà katanci

kakesè, mùdìbi ne: Tudi bafùùlùlùdìibwe, ne tudi mwà kwiikala batwishùbwe ne eci m'Bulelèlà anyi?

⁴⁹ Mpindyewu, eci mmwoyi wèbè wèwè mwiinè, eci ngwànyì mwoyi. Mwômò amu ki mùdì. . .Piikalàbi ne eci kî m'Bulelèlà to, cîndi pabwîpî ne kwamba eci, dîbà adi's ndi umwe wa ku bantu bakûtakàne bàà pa buloba. Ndi mufile mwoyi wànyì bwà cintu kampàndà cidi kaciyi ne musinga, ne nwènù pèènù. Kàdi cyôci ciikàle Bulelèlà, dîbà adi's ndi mweena dibànzà dyà byònsò bìndì naabì. Ndi mwena dibànzà dyà cyònsò cîndi mufwànyine kwiikala, bwà bwalu bwiinè, butùdì tutwà nyama ku mikòlò abu. Ne ndi ngeela meeji ne katwèna ne cyà kujimija musàngèlu wètù awu to.

⁵⁰ Ne patùdì tumòna Paasàkà wènda ùseemena apa, cidi ànu cyènza cintu kampànda munda mwànyì emu, bu mùndì—ndi mumanyè ne ki ditùkù dyàkatwìbwà cintu aci cìtampì kashidi, ku mèsù kwà Nzambì.

⁵¹ Mpindyewu, tudi tumòna ne, Nyumà umwèumwè wàkaMujuula mu lukita awu, ngudi musòmbèle munda mwètù. Mpindyewu, aci ncifwànyine kwiikala bishi? Nyumà awu wàkabiùsha, Nzambì, Yesù ku bafwè awu, ki udi musòmbèle munda mwètù.

⁵² Mpindyewu, mpindyewu, Nyumà ngudi ufùùlulula. Kî n'Dîyì dîdì difùùlululà to. Nyumà ngudi ufùùlululà Dîyì, anyì ùpèèsha Dîyì Mwoyi, ùDipèèsha mapwâpwà bwà kubùùkadi, ùDipèèsha mpùngà. Nyumà ngudi wenza nàнку awu.

⁵³ Mpindyewu, blé, nkààyendè, ùdi ànu blé cyanààna; kàdi pàdì mwoyi mufùùluludi wùbwela mu yèyè, mu blé amu, dîbà adi cidi cimupèèsha mwoyi. Nènku twètù bàvwa musangu kampànda bafwè, benza mu cimfwànyì cyà Nzambì, kàdi cikole bafwè mu mpèkaatù ne matomboka abu, kùdì mùshindù kampàndà wàkakèngelàbi bwà Nzambì kubweja Mwoyi mufùùluludi ewu mu mibidi yènù yà cifwàkà ayi. Ndi ngaakula bwà mubidi wèbè wèwè awu.

⁵⁴ Mpindyewu, Yesù ùvwa Dîyì. S'nudi nwitabuujà nàнку, kî mmwômò anyi? “Ku cibangidilu. . .” Yone Munsantu 1: “Ku cibangidilu kwàkadi Dîyì, Dîyì dyàkadi ne Nzambì, ne Dîyì dyàkadi Nzambì. Ne Dîyì dyàkavwijibwa mubidi ne dyàkasòmbela munkacì mwètù.”

⁵⁵ Mpindyewu, Yèyè bu Maasiyà mulaya, Wàkavwija ne mwoyi Dîyì dyònsò òvwà difidìibwe mu cipfròfeta ne Yèyè ùvwa mwà kufùùlululula adi, kwondopa babèèdì, ne mùvwàYe mwà kulediibwa kùdì virgò, byònsò abi, wàkabyènza. Mbulelèlà. Yèyè ùvwa Dîyì, dimwèneshùbwe pa buloba apa, kàdi Kàvwa mwà kwenza cyôci eci ànu bu Muntu to. Byàkakèngela Nyumà wa Nzambì, musòmbèle munda Mwèndè, bwà kuvwija milayì eyi ne mwoyi Bwèndè. Ndi ntèkemena ne tudi tuumvwa cyôci eci bitòoke menemene mpindyewu. Yesù, mwikàle Muntu,

Yèyè mwiinè, mubidi awu, kàdi byàkakèngela Nyumà munda Mwèndè, Nyumà awu. “Kì m’Mèmè udi wenza byenzedi to. N’Taatu Wanyì udi musòmbèle munda Mwànyì. Yèyè ki Udi wenza byenzedi ebi.” Nwamònu anyi? Yesù Yèyè mwiinè ùvwa Dìyì, bwalu Ùvwa . . . Kumpàlà kwà Nzambi . . .

⁵⁶ Ewu mmwakù mubi wà kwangata, kàdi ndi ntèkemena ne nudi nuwàngata mu mùshindù mwìmpè, kumpàlà kwà musumbà wà bantu. Kàdi Yèyè ùvwa mudyànjila kulongolola kùdi didyànjila-kumanya dyà Nzambi, mùvwà ndongamu wa Nzambi ne cyà kwiikala, wa ne Ùvwa mwà kutùma Mupikudi, ne Mupikudi ewu ùvwa mwà kwiikala ànu Mwan’Èndè Sungasunga. Pa nànkù, dībà adi, aci cívwa mmulayì wà Nzambi, kubangila ànu ku budimi bwà Edènà, bwà ne Yesù ùvwa mwà kwiikala pànwapa. Ki Yèyè ewu ùvwa Muntu, mulèla kùdi virgò, kàdi byàkakèngela Nyumà wa Nzambi awu bwà kuvwija Dìyì adi mwoyi Bwèndè. Ne Yèyè ùvwa Dìyì, divwijìbwe mwoyi, Dìyì divwijìbwe mwoyi bwà dyòdi dībà adi. Dībà dyàkalwa pàakakèngelàbi ne wèwè wiikalè ne Mupikudi. Mikenji yivwa mipangile. Bikwàbò bintu bìvwa bipangile. Mpindyewu, bikèngela Mupikudi, ne Yèyè nguvwa Mupikudi mulaya. Wàkafùùlululudibwa kùdi Dìyì dyà Nzambi.

⁵⁷ Nènku mpindyewu pìikalàbi ne Nyumà umwèumwè uvwa pambidi Pèndè bwà kwiikalaYè Mupikudi mu cikondo aci awu, mwena mulayì wutùdi twètù biitàbe mu matùkù à ndekeelu aa ewu, ciinè cívwa mwà kwenzeka aci; wèwè mulwè citùpà cyà Dìyì adi, udi mupikùdibwe pàmwè Nendè, bwalu Nyumà umwèumwè uvwa musòmbèle munda mwà Kilistò awu mmusòmbèle munda mwèbè wèwè, mwikalè ùfùùlùlula mwoyi wèbè bwà cikondo eci. Ne Yèyè kàbidi, mu cikondo cyà nshìikidilu, neàfuulululè mibidi yènù yà cifwàkà ayi, neàyibiishè ku lufù, ùyjuululula. Aci cidi cyùmusha mifitù patùdi tuyitàngila apa. Nènku aci—nènku aci’s m’Bulelèlè. Nwamònu anyi?

⁵⁸ Mu Loomò mwab’ewu, Pòlò mmutùjaadikileci. Nwamònu anyi? “Pìikalàbi ne Nyumà wàkabisha Yesù ku bafwè awu mmusòmbèlè munda mwènù, Yèyè neàfuulululè mibidi yènù yà cifwàkà ayi.” Ewu n’Nyumà umwèumwè wàkaMubiisha ku lufù awu, udi mufùùlùlùle mwena kwitabuuja mulelèlè kumutùma ku Mwoyi wà Cyendèlèlè. Nyumà wàkabiisha Yesù ku bafwè awu mmusòmbèle mu mweena kwiitabuuja, ùdi ùfùùlùlula mweena kwiitabuuja ùmutùma ku Mwoyi wà Cyendèlèlè.

⁵⁹ Kùdi mwoyi ànu wùmwèpelè, Nyumà wa Cyendèlèlè umwèpelè, Mwoyi wà Cyendèlèlè wùmwèpelè, ne mwiinè awu n’Nzambi. Nzambi, nkàayendè, ngudi wa Cyendèlèlè. Nènku dībà adi twètù, bu mutùdi bânà Bèndè, tudi citùpà cyà ku Yèyè, mbwena kwamba ne, byambiibwà byà meeji Èndè. Ne meeji meediibwe patòke àdi àlwa dīyì. Dībà adi, muntu-nkàaya yònsò udi kaaba aka, udi ne Mwoyi wà Cyendèlèlè ewu awu, ùvwa

kumpàla kwà difùkà dyà dyulu ne buloba, mu meeji à Nzambi. Ki mùshindù wùmwèpelè wùdibi mwà kwiikala, bwalu wèwè udi cyambiibwà. Ndyediibwa patòòkè dyà meeji, dìdì dilwè Dìyì; ne Dìyì dyàngàci Mwoyi, ne dìdì dyà Cyendèlèlè. Ki cidi cyènta ne twiikalè ne Mwoyi wà Cyendèlèlè. Mu dīyì-dikùlù dimwèdimwè dyà ne Mwànà wa Nzambi munène, Mupikudi awu, tudi tulwa bânà bàà balùmè ne bàà bakàjì bàà Nzambi, ku Nyumà umwèumwè awu, ku didyànjlila-kumanya dimwèdimwè dyà Nzambi adi.

⁶⁰ Tàngilàayi mīliyô yà bantu pa buloba bàvwà kabàyi baWùpetè pàvwà Yesù pànwapa abu. Kàdi mùshindù mwīinè wùvwàbi bìkèngela bwà twètù aba kwiikalakù ne kusàkidila mu dindà emu, bwà kumanya ne tudi ne cileeji cyà buludì ne bijaadiki byà mu Bible ne, tudi babadiibwe mu dindà dinènè dyà dibìikà dyà ku lufù dilwalwà adi, Paasàkà munène awu! Tudi ne cyeyà cyàdì, mpindyewu mene mu mibidi yètù yà cifwàkà eyi. Bàvwa badyànjlila kulongolola abu ki bàà kumpàla, mu bushùwà bwà bwalu, bwà kufùlùludiibwabò, pààlwà Nyumà Mwimpè bwà kwana Bèndè sungasunga.

⁶¹ Mpindyewu, aci ncishimbi-dīyì, ne ndi muswè bwà bambi naanyi bàteetèku bwà kuumvwa cyòci eci. Nwamònu anyi? Ku cibangidilu, Nzambi, Nyumà munène awu, Yèyè kàvwa mene nànsha “Nzambi” musangu awu to. Yèyè ùvwa Wa Cyendèlèlè Awu. *Nzambi* n’ “cintu cyà kukuukwila.” Kàvwa ne cintu nànsha cimwè cyà kuMukuukwila to. Kakùvwa nì—kakùvwa nì m’Banjèlo, nì ncinyi to. Ànu Nzambi nkàayendè, Yèyè nkàayendè, ki udi wa Cyendèlèlè. Kàdi, bwà kwiikalaYè Nzambi, bìvwa bìkèngela bwà kwiikalakù cintu kampàndà bwà kuMukuukwila, ki kufùkaYè Banjèlo, Baakampànda, ne Bakèlùbà, ne bakwàbò, bwà kuMukuukwilabò. Ndongamu Wendè munène awu kubangayè wèndà ùvunguluka.

⁶² Kàdi vùlukà ne, wèwè awu, mu—mu cipidì cyùdì aci, mu dindà emu, piikalàbi ne kùvwa mu meeji Èndè musangu awu to, kwènàmu mpindyewu to. Bwalu wèwè, kùdì citùpà kampàndà cidi munda mwèbè amu, cidi cyà Cyendèlèlè, ne cyà Cyendèlèlè cidi ànu cyà Nzambi. Ne munda mwà Nzambi mùvwa meeji Èndè à ne wèwè uvwa mwà kwiikala musòmbè mwaba wùdì mpindyewu awu. Mu meeji Èndè, mvwa mwimàne mu cyambilu mu dindà edi, bwalu Yèyè kèna ne mikàlù to ne mmumanyè bintu byònsò. Ki bwà cinyi Ùvwa mwà kwamba ndekeelu kacya ku cibangidilu, bwalu Yèyè ngwa Cyendèlèlè. Nènku wèwè, bu mùdì mwànà wa balùme wa Nzambi anyi mwànà wa bakàjì wa Nzambi, dībà adi ùvwa mu meeji Èndè ku cibangidilu aku.

⁶³ Nènku pashìshe pàakalwà Nyumà Mwimpè, ne wèwè mwikàle pa buloba, wenda wendakana pànwapa bu ngènzàmpèkààtù, munda menemene mwà nsòmbelu webè amu mùdì cintu kampànda. Kwèna mumanyè ne cidi munkaci mwà kwenzeka ncinyi to, kàdi udi umvwa nzala. Nkàadikù

muumvwè mwanèètù wa ba-Presbytérien; nkààdikù muumvwè ba—Baptiste wàmba bwalu abu, kuntu kwàka, ùvwa ba—Baptiste wa Mudiswìle, ùyiisha kwònsò kùvwaye mwà kuyiisha aku. Mwanèètù wanyì, aci wèwè, kùdi cintu kampànda munda mwèbè amu, cintu kampànda cyúvwa kùyikù wèwè mutèèkemù to. Ncintu kampànda cyúvwa kùyikù mufwànyine kujinga bwà kwikalacimu to. Ncintu kampànda cidì cibènganganà ne ngiikàdilù webè sungasunga awu. Ndidyànjila-kumanya dyà Nzambi, dyenzeka, Diyì dyà Nzambi.

⁶⁴ Bu mwàkalediibwà Yesù Mwànà wa Nzambi, bwà kwiikala Èmanùwèlè, didileeya patòòke mu kaabujimà dyà Nzambi mu Muntu. Ne WàkaMusangana mu ditùmikila dyà menemene, ku Musùlù wà Yadènè kwàka, munkaci mwà kubàtijiibwa kùdi mupròfetà awu. Nènku Yèyè mmwenzè ànu ùMutùmikila, ne ùpàtuka mu màyi anyi, Maulu kunzulukilawù Yone. Ne kumònayè Nyumà Mwìmpè ùtùùluka ùfùma mu Dyulu, wàmba ne: “Ewu m’Mwan’Àanyì munanga.” Nwamònu anyi? Ditùmikila dyà menemene, Nyumà ùvwa muMukèbe, mu ditùmikila adi.

⁶⁵ Kaa, wèwè mulùme anyì mukàjì wa mutù mukolè, mu dindà emu, paùdì musòmbe kaaba aka apa, ne kwiikàle cintu kampànda mu mwoyi wèbè amu cikwambila ne Eci ncilelèlè, Nyumà Mwìmpè ngudi munkaci mwà kwenda kukèbangana neebè awu, bwà kukufikisha ku dimanya dyà Bulelèlè bwà dībà ditùdì ne mwoyi edi, kaciyi dībà kampànda dikaàdì dipite to, dībà dyà mpindyewu edi.

⁶⁶ Kùvwa binunu byà bantu kuntwaku bàvwa bàtùmikilà dībà dikaavwà dipite. Kàdi kùvwa dībà dyà mpindyewu, divwa ndībà divwa dikèngelà bwà Yesù kumwènèkaYè, nènku ki Diyì ndyòdì adi divwà diimàne mwab’awu adi’s. Ki bantu mbòbò abu biimàne mwab’awu. Ne ki dimwèneshiibwa dyà Nzambi adi munkaci mwà kwenzeka, bwà kushindika ne aci cívwa m’Bulelèlè.

⁶⁷ Ne bu Beena mpenta, leelù ewu, swàyikù ngàmbe eci nùnkù ne, tudì tusanganyiibwa mu matùkù à ndekeelu aa mùdi Nzambi mulayè ne ùvwa mwà kwicikija Nyumà Wendè pa mubidi wònsò, ne bìvwa bikèngela bwà bàna Bèndè bàà balùme ne bàà bakàjì kwambabò bipròfetà. Bwalu Yèyè mmwambè ne: “Bimanyinu ebi nebifilè aba bàdì biitabuujà.” Ki dībà ndyòdì edi. Ki cidì civwijà bufùki abu munda mwèbè.

⁶⁸ Ànu mùmvwà ngaakula kaaba aka, àbìdì àdì panshì aa, kuumvwikaci bu cyà cinyangakaja cijila; kàdi ndi ntèkemena ne kaciyèna cyèenza nànkù to, bwènù nwènù, mu dindà emu. Cidimè uvwa mutèèke mukankù awu, anyì cikuka cyà nzòòlo, ne mwiikale ne diyì dyà mukankù. Bààbùngì bàà kunùdì mbavùlùke kaabwalu kàà mukankù wàkalela eci—eci. . . Anyì, cikuka cyà nzòòlo cilela kànà kàà nzòòlo aka, anyì—anyì—anyì

diyi dyà mukankù mwĩnshì mwà masàlà èndè à nzòòlo awu. Nwamònu anyi? Ncyuyüyà.

⁶⁹ Èkèleeziyà wa ba-Presbytériens, èkèleeziyà wa ba-Méthodistes, èkèleeziyà wa ba-Baptistes, yònsò wa ku yòyi ayi ùdi mwà kupàtula mikankù eyi. Bushùwà. Cyuyüyà nciidi cyènza aci. Mùvwà Docteur Bosworth ne ciibidilu cyà kwamba ne: “Udi mufwànyine kwangata diyi dyà nzòòlo kuditéèka mwĩnshì mwà...mwĩnshì mwà kabwà, ne kukàswikila mwaba awu, kabwà’s nkafwànyine kutooya nzòòlo.” Bwà cinyi? Ncyuyüyà. Ne èkèleeziyà kanà yònsò ewu anyi cisumbù kanà cyònsò cidi bantu badisangishe pàmbwè eci, bàsambila too ne mùdibo bàfika ku diimansa twiitabàayi yàbò ne bikwàbò, ne bàtàngila buludi Nzambi mu mpàla, s’ncipatulè mikankù cyà bushùwà ànu mùndi mèmè mwiimàne mwab’ewu emu.

⁷⁰ Ki cìndi mèmè ngeela meeji ne ki cidi musumbà wa beena kantu-ku-byanza aba ewu mwenzè, bàteeta bwà kumwagalaja cyuyüyà. Twètù tudi batàmbe kulwa ne nyumà wa bukwà ne bwena be. Ewu mwikàle mwena *cikampàndà* ne *cikansanga*. Tùmwalajajàayi cyuyüyà tükabwelè mu cyuyüyà cyà mu dikuukwila dyà mu Dyulu. Longòlòlaayi cyuyüyà aci bilenga, mikankù neyilediibwè, ne—ne ciinè aci yipàtukila mu èkèleeziyà kanà yònsò, mu mwaba kanà wònsò.

⁷¹ Ki kaamukankù aka kwendakù ne cikuka cyà nzòòlo aci ntàntà mule, kàdi cyokò-cyokò awu—awu ùvwa mwenzè bu wa pabwèndè. Kakàvwa kùmwa cívwa cikuka aci ciswa kwamba pàvwàci cikala mu mishiki yà bi—bi—bintu byà bukooyà byà tùmvi twà nyama bìvwà mu—mu mpàta abi to. Ne bwèndè yéyè, aci kacívwa cyàkudyà nànsha. Nènku cikuka cívwa cidya bìshiishi, ne bikwàbò, bitù mukankù kawüyi wüdyà to. Pa nànkù bìvwà bimwèka byà pabwàbì, byònsò abi, bwèndè yéyè. Ne kàvwa bu kaadibata kabì kwìsù; kòkò, ncyèna ngàmbe eci bwà kunyangakaja cijila to, pàmwàpa kàvwa ka-Baptiste Kadiswìlè, ne, kàdi cintu kampàndà cyà mu mùshindù awu, anyi ka-Presbytèrien.

⁷² Kàdi, nudi bamanyè’s, dīngà ditùkù mamwákù kumanyayè ne ùvwakù mwelè diyi kampànda. Kùvwa ne cyà kwikala mwànà mu mwaba kampànda. Ki kukùpayè mapwàpwà èndè manène awu mu mpeepèlè, ne kuditwayè mu dikèba ukebulula, wèla mbilà ne díyi dyèndè dinàngula. Ki dīngà ditùkù, kupicilayè kuulu kwà lupangu lwà nzòòlo alu. Nènku kaamukankù aka pàkuumvwàku lubilà lukolè lwà ciibidilu elu, kakàvwakù kalùumvwè kacya kwònsò aku to, kàdi kumanyakù ne lùvwa lùkàbwele ànu pyòpyòyò menemene. Ki kumanyakù ne awu ùvwa mmamwákù. Mamwákù kumanyayè ne kàvwa nkànà kèndè. Yéyè ùvwa wènda ùkakeba.

⁷³ Ne Nzambi pèndè, mu cikondo ne cikondo cyònsò, wàkatèèka Èkèleeziyà Wendè bwà cikondo aci, Mukenji bwà

cikondo aci. Ne bôbô bàvwa bafwànyine kwiikala ne mikenji ne cintu kanà cyônsò cìvwàbo baswè kwiikala naaci aci. Kàdi pàdi dībà adi dilwa, Nyumà Mwímpè wa Nzambì, wàkèèdiibwa meeji ne kwakudiibwa ku cibangidilu bwà cikondo aci awu, Nyumà awu ngudi wenda ukèbangana ne diyì adi. Ne pàdiye ùmvwa Mukenji awu, kakwèna dīngumba nànsha òmwè dyà èkèleeziyà diikalà mwà kumulama nànsha. Neàjuukè àbandè mu myaba mitùmbùke. Bikèngela àbandè nànkù. Nnyuunyi mushiilangàne. Ncìfukùibwà cishiilangàne. Yèyè mmukankù, ne neùmvwè lubilà lukolè alu. “Mìkòòkò Yànyì yìdi yùmvwa Dìyì dyà mukana Mwànyì.”

Mwàkambà muntu kampàndà, Mwanèètù Williams ne: “Cyakùdyà cyà mìkòòkò.”

⁷⁴ “Mìkòòkò Yànyì yìdi yùmvwa Dìyì dyà mukana Mwànyì. Kayààkulonda mwenyi to.” Èkèleeziyà nànsha yèyè wa lulamatu lwà bishi, ne nànsha yèyè ne dīnà dinènè dyà bishi. “Pàdi mìkòòkò Yànyì yùmvwa Dìyì dyà mukana Mwànyì,” dīdì Dìyì adi, “kayààkulondakù mwenyi to.” Neyiye buludì ku Dìyì adi, ne yìdi mwà kucyènza. Mbyenzè ànù mùtù cyamù cyà—cyà—cyà nzembu cyà cikòka tuubyamù amu.

⁷⁵ Dīngà ditùkù, mu Indiana mwàmwa, mvwa munkaci mwà kwenda kumòna byenguludi byà byamù abi, ne kashibà kudilakù. Ki bantu bônsò kuumushabò tulàmbà twàbò twà pa cyàdi, ne kubangabò kukòmba . . . buumukila ku bikwàcìlu byàbò byà byamù, batangile munkaci mwà cibambalu amu, bisùnsukila byà byamù bìvwàbo benzè munda mwà ditùkù dijimà adi amu. Nènku mvwa ngenda ngendakana ne muntu uvwa wenda unshindikija awu, ki kwabayè ne: “Tàngilà eci.” Nènku muntu mulùme yònsò ùvwa mutèeke cìlambà cyèndè—cyèndè cyà mudimu pa—pa mèèsà apu, muumùke muyè.

⁷⁶ Lwà mundekeelu menemene amu, kutwàye munu pa mbòta mukesè. Ki cyamù cinènè cyà nzembu cyà cikòka bintu kupicilaci muntwamu, kwangululaci kasùnsukila ne kasùnsukila kònsò kàà cyamù kàvwà kakoona pa byamù abi, mpindyewu, ne kupàtukaci. Kuvwijaci tuntu atu katùyi twà tükòkiibwa kàbìdì to; kumatatù mu cyengeludi cinène. Ki kubyèngulabò cyàkàbìdì, bwà kwenzabò cikwàbò cyamù cyà—cyà kusùmbisha, cintu ànu cìmwècìmwè aci, mààlù anyì nì ncinyì cyònsò cìvwàbo mwà kufwimba aci.

⁷⁷ Ki mèmè kushààla mwimane mwab’awu ntàngila cyòci aci, too ne mù—mùngààkajimijà ne lungènyì. Mèmè kwamba ne: “Ndi ndikonka cintu kampànda.”

Yèyè ne: “Cinyì aci, mukalenge?”

Ki mèmè ne: “Ndi mumòne ne bikwàbò byà ku byòbi abi kí mbyambwibwe to.”

78 Yèyè ne: “Abi mbyà aluminium, ne cyamù cyà nzembu cidi cìkòka bintu aci kì ncyenza bwà kukòka aluminium to.”

79 Mémè ne: “Ngǔmvù.” Ki yèyè ne. . . Dìbà adi mémè ne: “Èè, udi umòna’s, *nkwakù* kushàale kapesè kàa cyamù cifike kàsanganyiibwa luseke lukwàbù lwàlwa.”

“Kàdi, udi umòna’s, s’kàdi kaswikila pànshì.”

80 Mémè ne: “Ngǔmvù.” Nènku pàakakàpàtulàye, mémè kwamba ne: “Mpindyewu cidi cyènzekà ncinyi, bwà tùdi *kwàka* nàka twàtwa?”

81 Yèyè ne: “Tùdi twàlukila buludì mu mushèètè, tùpòngolodiibwa mu cyenguludi, cyàlukila buludì cyèenza lukàtà lukwàbò.”

Mémè ne: “Mukalenge atumbe!” Ki cyôci aci. Nwamònu anyi?

82 Kùdi cyamù cinène cyà nzembu cyà cìkòka bintu cisòmbèle mu dyulu, ciikalà Nzambi dīngà ditùkù mwà kushindikilà minu Yèndè. Muntu nànsha umwe kī mmumanyè dībà dīyàlwàYe to, nànsha mene Banjèlò bàà mu Dyulu, kī mbamanye to. Nzambi nkàâyendè ngudi mumanyè. Kàdi nkwenzèke ànu ndambu wa tuntu tulelèlè tuumùkile ku Bible, beena Kilistò bàà mu Bible, beena kwiitabuuja bàà dībà edi. Umwe wa kùdibò mmufwànyine kwikala bùulu bwà mu ditùkù dikwàbò dyà kale. *Eci* ncifwànyine kwiikala cīngà citùpà. Cidi citungunuka bwà kwenzaci bukòkeshi bunènè bwà Nzambi. Kàdi necifwimbiiibwè mu cyesu cyà cyenguludi cinènè cyà Nzambi aci, ne necipongolodiibwè cyàkàbidi mu bimfwànyì byà Nzambi. Nènku ànu aba bàdi bàkòkiibwa kùdici abu mbàmbwibwà. Kaa, mùshindù mwiinè. . . Ndyèsè kaayi’s wè, dyà kumanyakù ne kùdi cintu kampànda mu dibiishiibwa dyà ku lufù cidi cītūtàngilà twètù aba!

83 Mpindyewu, mònaayi, jingùlùlaayi dibìikila dyà Dīyi dyà Nzambi, didiyè mwikàle citùpà cyàdi. Ne yèyè mmukankù ku mukankù. Mpindyewu, bu maamù awu mwele lubilà lukolè alu byenzè bu ne nka—nkabangu-nyuunyi, kaamukankù aku nunku kī nkalùjingùlùlekù to. Nunku’s nkashàale ànu mu lupangu lwà nzòòlo alu. Kàdi lùvwa ndubilà lwà mukankù. Kùvwa cintu kampànda munda mwà kalùmyànà kakesè aku, cyàkenzà ne kòkò kàjingululè ne kàvwa kaamukankù.

84 Ne cintu cimwècimwè aci ncidi kùdi mweena kwiitabuuja mulelèlè yònsò ewu. Pàdi ànu diyiisha dyà Dīyi dyà Nzambi dipàtuka, ne dishindikiibwa ne dijaadikiibwa ne n’Dīyi dyà Nzambi bwà dībà edi, dībà adi kùdi Cintu kampànda munda mwà mweena kwiitabuuja awu. Nànsha byôbi ne tatwëndè ùvwa ne lulamatu kùdi èkèleeziyà lwà bishi, anyi mùvwà mamwëndè ne lulamatu, anyi baakakwëndè, kàdi èkèleeziyà awu yèyè ànu ùlongesha bibèngàngàne ne dībà dyà dibàtiiza dyà Mukenji wà

Nyumà Mwímpè edi. Kùdi cintu kampànda munda mwèndè cidì cyèla lubilà lukolè. Yèyè neàshiyè lupangu lwà nzòòlo alu. Bikèngela ènzè nànkù. Cikuka cyà nzòòlo aci cìvwa cifwànyine kwikala ànu cìmpè dīngà ditùkù, kàdi edi ndìbà dyà mukankù. Nwamònu anyì? Ndi—ndishiilàngàne. Kùdi cintu kampànda, cidì cyènza ne, kaamukankù aka kàdi ne cyà kushiyangana ne musàsà wà kale awu ne kubùuka kuya kabwela mu maulu. Dìbà adi mubidi wa pa buloba wà cifwàkà ewu wùdi wùfùùluludiibwa ne wùfikishiibwa, kùdi Nyumà mufùùluludi awu, ku ditùmikila dyà Dìyì dyà Nzambì.

⁸⁵ Mpindyewu, pàdì Nyumà Mwímpè ewu, muleejìbwe bu mukankù, ùpaapalala kuulu kwà buloba, ne ùsàngana mwena kwitabuuja, “Muntu nànsha umwe kèna mwà kulwa kùNdi, muntu nànsha umwe kèna mwà kulwa kùNdi Yèyè kàyi muswè to, bònsò bàdì Taatù muMpèeshe nebàlwe kùNdi, kàdi muntu nànsha umwe kèna mwà kudìvwila mu yèyè nànsha,” kī mmeejì ènù sungasunga, didikòkà dyèbè sungasunga to, n’Nzambì, udi ukòka. Nwamònu anyì? “Bònsò bàdì Taatù muMpèeshe nebàlwe kùNdi.”

⁸⁶ Mpindyewu, Nyumà Mwímpè ùdi pa buloba apa, munkaci mwà kutàbaleela bantu-nkààya bàdì Nzambì mulongòlwèle Mwoyi mu cikondo eci abu. Ne pàdibi ànu ne Wácìpecì, Ùdi wènza ànu menemene mwàkènzàYe pa Yesù Kilstò amu, Mwànà wa Nzambì mutàmbidìle wàkatùpikula bònsò awu. Ùdi ùlwa pa buloba ne wàngata mwaba Wèndè wà cisòmbedi mu mwoyi wà muntu, mpindyewu, mònaayi, mutwàle bukolè bufùùluludi. Mpindyewu, bukolè bufùùluludi bwàkalwà pambidi pàà Yesù abu bwàkaMufùùlululà bwà kumwènesha mulayi ne mulayi wònsò wà Dìyì dyà ditùkù adi. Ki cidì kabìdì Nyumà Mwímpè udi ulwa pambidi pèètù wènza mu ditùkù edi, pìikalàci kaciyì nyumà mwímpè wa didyombola, pìikalàci kaciyì dyabùlù munkaci mwà kùdyombola Nyumà Mwímpè to, kàdi mwikàle Nyumà Mwímpè wa cyà bushùwà, mulelèlà. Yèyè neàmweneshè mulayi wà dībà edi.

⁸⁷ PààkamacilàYe Luther, Wàkamwènesha mulayi wà dībà adi awu. PààkamacilàYe Wesley, Wàkamwènesha mulayi wà dībà adi. PàdìYè ùmata mu ditùkù edi apa, Ùdi ùmwènesha mulayi wà dībà edi. PààkamacilàYe Mòsà, Wàkamwènesha mulayi wà ditùkù adi. PààkamacilàYe Noà, Wàkamwènesha mulayi wà dībà adi. PààkamacilàYe Yesù, Wàkamwènesha mulayi wà ditùkù adi. Nwamònu anyì?

⁸⁸ N’Nyumà Mwímpè mwikàle ùpweka, bwà kufùùlulula, kuvwija ne mwoyi bantu bàvwà balongolola kùdì Nzambì bwà kwiikalabò mu Dyambwibwa abu. Mònaayi. Mbwena kwamba ne, yèyè mwikàle mukankù mulelèlà, neùmvwè Mukenji wà dībà pìikalàye mukankù mulelèlà. Mpidyewu, pàmwàpa kaamukankù kakesè aku, mu lupangu lwà nzòòlo amu, kàvwa kàdya ànu bilenga, kàdi kàvwa—kàvwa kamanyè

ne kabìvwa ànu mu byôbi menemene to. Kàdi pashiishe pààkumvwàku Bulelèlè, díbà adi kààkaakidila Bulelèlè abu. Mpindyewu, mu Yone 14 . . .

⁸⁹ To, mu Yone 5:24's wè, Yesù mmwambè, wàkula mu mùshindù ewu ne: “Ewu udi utèèleja Mèyì Àànyì, ne wiitabuuja Ewu udi muNtùme, ùdi ne Mwoyi wà kashidi, ne kààkupita ku cilumbulwidi to, kàdi yèyè wàmanyì kuumuka ku lufù wàyi ku Mwoyi.” Anjì elààyibì ànu meeji mùdi cyôci aci cipeepèle ne: “Ewu udi wiitabuuja.” Mpindyewu, mùshindù mujaalàmè wà kwamba cyôci aci: “Ewu udi umvwa.”

⁹⁰ Mpindyewu, udi upàtuka mu mùsèsù emu ne wambila ndumbà ewu ne: “Wèwè udi wiitabuuja anyi?”

“Bushùwà's.”

“Udi witabuuja ne Yèyè m'Mwànà wa Nzambì anyi?”

“Cyà bushùwà's.”

“Ukààdi mubàtùjìbwe anyi?”

“Bushùwà's.”

⁹¹ Uya kùdi mukwàciki wa maalà, wamba ne: “Udi mutèèlèje Cyôci aci anyi? Udi mutèèlèje cidi muiyiishi wàwa ùyiisha aci anyi?”

“Èyowà.”

“Udi wiitabuuja Cyôci aci anyi?”

“Bushùwà's.” Nwamònu anyi?

⁹² Kàdi: “Ewu udi umvwa, ewu udi ujingulula kaaba kèndè mu díbà edi, ewu udi utèèleja Díyì Dyànyì ne wiitabuuja Ewu udi muNtùme, ùdi ne” (díbà dyà mpindyewu) “Mwoyi wà Cyendèlèlè. Kààkupicila ku cilumbulwidi to, kàdi wàmanyì kuumuka ku lufù ne wàyi ku Mwoyi.” Díbà adi pàdi Mwoyi mupyamùpyà wà Cyendèlèlè ewu wùsòmbela munda mwèbè, Wòwò awu wùdi dikùmbana, anyi cyeyà cyà ne wèwè wafùlùludiibu muumùke ku difwà muyè ku dibènga-kufwà.

⁹³ Ngǎnjì ncyǎmbùlùlèbi. Pàdi Nyumà ewu ùkupeta, wèwè muntu-nkààyà, ne mulwè pambidi pèèbè, Yèyè ùdi dikùmbana dyà bumpyànyì bwèbè bwà Cyendèlèlè bùvwà Nzambì mukwelèlè meeji ne mukwenzèle bangabanga ne difùkà dyà dyulu ne buloba. Ki dikùmbana dyèbè ndyòdi adi.

⁹⁴ Mbyenzè bu mùdi mwà kundòmba mucì wà lusànga, kàdi mèmè kukupà mùsà. Mpindyewu, mwoyi wà—wà—wà lusànga awu's wùdi mu mùsà awu mpindyewu, kàdi bìkèngela wìndilè too ne pààkolàlu.

⁹⁵ Ki mùdibi kàbìdi ne twètù. Paùdi upeta Nyumà Mwìmpè wa Nzambì, Ùdi dikùmbana dyà Nzambì dindile pambidi pèèbè, dikaadi dimanè kukujingulula. Ne udi mutwìbwe citampì kùdi Nyumà wa mulayi, wa Nzambì, ùkubweja mu Mubidi wà Kilistò.

Pàakatangilà Nzambì pànshì ku Kàlvariyo ne kumòna Yesù ùpùnga ne lufù, Yéyè kàvwa ànu... Wàkafwila Mukàj'Èndè-musèla, Mubidi, wùdì Èkèleeziyà Dìyì awu, Èkèleeziyà udi witabuuja Dìyì dyà Nzambì dyà cikondo awu, nànsha ciikàle makàsà, mubidi, mutù, anyì nì mpenyì pàdici. Nwamònu anyì? Cìdi... Kilistò ùvwa ùzonza mashi ne ùpùnga ne lufù. Ki Nzambì, mu kuMutàngila amu, kumònaYè dibiikà Dyèndè dyà ku lufù, ne Èkèleeziyà wàkabiika ku lufù pàmwè Nèndè dyà Paasàkà.

⁹⁶ Mpindyewu, ndi muswè nusangishè cyòci cyònsò eci pàmwè, bwalu ndi ne cintu kampànda kaaba aka mu katanci kakesè emu, cìndi muswè kwamba, bu Mukalenge mwà kwanyisha.

⁹⁷ Mpindyewu mònaayi. Nceyè, anyì dikùmbana adi. Bukolè bufùùlùludi bwà dibiikà dyèbè dyà ku lufù, paùdi upeta Nyumà Mwímpè, mwikàle díbà adi musòmbèle munda mwèbè, dikùmbana dyàci.

⁹⁸ Mònaayi, udi—udi mpindyewu mu njila wenda uya, wenda ukola too ne ku dibiikà dyà ku lufù mu kaabujimà. Mucì nànsha wùmwè kawùtu wùkola bufùku bùmwè to. Bikèngela wùkolè, mutùtù twenda tukola mu ngàsà ne dimanya dyà Nzambì amu. Udi mubàtùjùibwe mu Nyumà Mwímpè. Mpindyewu, ànu mùdì Èkèleeziyà wa ku mpeta awu, mubàtùjùibwe mu Nyumà Mwímpè, mMubangè kukola. Matàmbà áfù. Bàvwa bààsonza. Kàdi Mucì awu wùcidi ànu wènda wùkola, wùcidi ànu mutùngùnùke, bwalu bìdi bikèngela bwà Wùfikè ku dibiikà dyà ku lufù.

⁹⁹ Bòbò mbalombola kùdi Nyumà, bwà kunùfùùlùlula Dìyì nwènu bàdi beena kwiitabuuja abu. Dìyì didi ditùngunuka ànu ne kufùùlùlula, paùdi ufika ku ditàmbà dyà kumpàla, ditàmbà diibìdì, ditàmbà diisàtù, too ne kuulu. N'Ditùngùnùke ànu ne kufùùlùlula. Nyumà wa Nzambì mmutùngùnùke ne kufùùlùlula kùdi wèwè.

¹⁰⁰ Mònaayi ne, Mpenta, mibidi yàbò yàkafùùlùludiibwa kùdi Mwoyi mupyamùpyà wàkapetàbo awu. Aci cìdi cyènzà ne ndyùmfwè bweena Nzambì bùmfwelè's. Elààyiibi meeji's. Mpindyewu, ki bantu mbòbò abu, balòbi, balàmbwishi bàà bitàdi, bakàji batekète badipwekèshe bàà...biinè abu ànu bakàji bàà nzùbù bèètù bàà pàtupù aba, bàna bàà bakàji baavirgò batekète. Bàvwa beena kwitabuuja. Bàvwa biitabuuja ne eci cìvwa Bulelèlè. Bàvwa biitabuuja ne, pàakafwà Yesù (Bàvwa baMwitàbùùje.) ne mubiike ku lufù kàbidi, mujuukè ku bafwè, bàvwa biitàbùùje ne cìvwa mbujaadiki bwà kabùyì dyela mpatà bwà kùdi Nzambì, bwà ne Yéyè ngwàkaMufùùlùlula mwalùke ku mwoyi.

¹⁰¹ Mpindyewu, bààkabànda kuntwaku, mu Ditùkù dyà Mpenta, bwà kupetabò bukenji bwàbò bwà bweena-cintu. Nudi bamanyè cidi bukenji bwà bweena-cintu anyì? Mpàdi mukànda

wà bweena-cintu mujaadikilangana bîmpè. Bààkabànda kuntwaku bwà kupetabò bukenji bwàbò bwà bweena-cintu. Ki kulwabò bafùùlùlùdìibwe, anyì ditùpika kaayi ne disànka's wè! Bààkasumba buloba; bubàsumbila bôbò. Bàvwa babùpetè.

¹⁰² Ncilelèlè anyì kî ncilelèlè? “Tukàadi baMumòne mubiike ku bafwè, kàdi bìshi bwà baatwètù aba's? S'tudi bantèmù. Tuvwa biimàne bamòne mùvwà Muntu awu mupoopèdìibwè pa nkùrusè. Twètù kumòna mùvwà mavuba malwè kubwikila buloba ne kufìkisha maulu. Ne bu—buloba kuzakala ne kunyùkukabù; kupetabù disaamà dyà mutù. Pashiishe pàvwà. . .Bôbò kuMwela mu lukità. BaMutùbùle mu mwoyi, ne difumà, ne kutùlulabò mubidi Wèndè è kuwèlabò mu lukità lwà Yòzefù wa ku Alimàteyà.”

¹⁰³ Ki pashiishe, kujandlabò ne, mu ditùkù diisâtù, Wàkabìika ku lufù. Ne ànu mwàkamba muyiidi awu amu ne: “Twètù tudi bantèmù bàà bwalu ebu. Tudi baMumòne mubiike ku lufù. Tudi bamanyè ne Yèyè ùdi ne mwoyi.”

¹⁰⁴ Mpindyewu aci cyàkenza cinyi? Aci cyàkuumusha bwôwa bwônsò. Kabyèna bikèmesha to mwàkambà Yesù ne: “Kùcìinyi to. Ndi Ewu uvwa mufwè, ne udi ne mwoyi bwà kashidi.” Nwamònu anyi? Cyàkuumusha bwôwa bwônsò, pààkenzàbo nàнку awu apu.

¹⁰⁵ Mpindyewu, kàdi pààkabàndàbo ku Mpenta, kukakùpetabò bukolè bufùùlùludi, bukolè bwàkabàvwijà ne mwoyi abu.

¹⁰⁶ Mpindyewu mwaba awu ki wùndì mèmè ngeela meeji ne, nwènù bàna bèètù ba-Presbytériens ne ba-Méthodistes, nudi cyà bushùwà nupeta mu mùshindù mushààdile panùdi nwiitabuuja Mukalenge Yesù Kilstò, kàdi bukenji bwà bweena-cintu kî mbwanji kulwa to. Aci ki dijaadikiibwa dyà mukàndà wà bweena-cintu.

¹⁰⁷ Nzambì wàkapèèsha Abraham mulayi. Abraham wàkiitabuuja Nzambì, ne aci bààkamubadilaci bu bwakàne. Kàdi Yèyè wàkatwà citampì ku cipungidi aci ne citampì cyà ditengula.

¹⁰⁸ Nènku Nzambì ùdi ùkupèèsha mulayi, mu mùshindù mushààdile, bwà ne neùwùpetè, ne newikalè mwà kubiishiibwa ku lufù, mubidi ewu newùtumbishiibwè pàmwè Nèndè ku cikondo cyà nshìikidilu. Kàdi, nudi numòna's, bikèngela ùpetè dijaadikiibwa pa mukàndà wà bwena-cintu awu's. Ne dijaadikiibwa mpàdì byònsò bìdi bìbènganganà naawù byùmushiibwa, nènku upeta bukenji bwà bwena-cintu bwà cyòci aci. Wàpecì citampì. Cìkaadi cyèbè. Byònsò bìdìpu mbyèbè wèwè. Amen.

¹⁰⁹ Ne patùdì twiitabuuja Yesù Kilstò bu Musùngidi wetù, ne tunyingalala ne tubàtìiijibwa, ne tufika ku diMwiitabuuja; Nzambì ùdi witaba kanyinganyinga kèètù ne diitabuuja dyètù

kùdiYe, ne ùpwekesha bukenji bwà bweena-cintu. Ne bukenji bwà bweena-cintu ki ditwishiibwa. Ki cishindikì cyà ne, byònsò bìvwàbo bàkubandakù naabì abi, wêwê wabìnyingalèèdi byònsò nkòong. Àlèluuyàh! Ne bweena-cintu mbupeta ku mushinga, ne wêwê udi mulamè bukenji bwà bweena-cintu bu ditwishiibwa.

¹¹⁰ Muntu yèyè muteetè bwà kukuumusha mu buloba abu, wàmba ne yèyè ki mwenabù, pèèbè ne bukenji bwà bweena-cintu mu cyanza. Àdidingè àteetè kucyènza's. Kakwèna mukenji kampànda mu ditùnga emu wùdi mwà kucyènza nànsha, bwalu wêwê udi mulamè bukenji bwà bweena-cintu.

¹¹¹ Ne kakwèna demon nànsha umwe, èkèleeziyà nànsha umwe, anyi tèòlòjì nànsha wa bishi, udikù mwà kusambuka mikàlù yà cijaadiki ne bukenji bwà bweena-cintu bwà Nzambi, bwà ne dibàtiiza dyà Nyumà Mwimpè nditwítàbe munda mwà Yesù Kilistò. Tudi batwishiibwe bwà kubiiika ku lufù ànu mwàkabiikàYe Yèyè amu, bwalu mu mùshindù mushààdile tukàadi bamanè kubiiishiibwa munda Mwèndè. Amen.

¹¹² Maalu à kale... Cìdi cyènzela mibidi yètù yà cifwàkà eyi cinyi? Cìdi cikùdimuna mmwènenenu wetù, cishintulula luumvu lwètù. Cìdi citèeka majinga ètù ku bintu bìdi mu Dyulu. Nènku dinwà dyà mfwankà, dinwà dyà maalà, dinàya dyà twartà twà mfrangà, bintu byúvwà wenza kale wàwa abi, bikaadi bifwè. Bikaadi mwínshì mwèbè.

¹¹³ Nènku ukàadi mufùùlùlùdiibwe. Ne bukolè bufùùlùludi ebu bùdi bùvwija mubidi wèbè mu mùshindù wà mwambwibwe, mumanè kwambwibwa. Mònaayi beena mpenta abu kuntu kwàka, pàakafùùluludiibwàbo kùdi Nyumà Mwimpè apu. Ntèelejaayi. Kasumbù kàa beena mpenta abu kuntwaku, mu Ditùkù dyà Mpenta, pàakapetàbo kùdi Nzambi mukàndà wàbò wà bukenji bweena-cintu awu, bushùwà, cyàkatumbisha misùùkà yàbò. Bààkeela mbilà mikolè. Bàakamòna ndimi yà Kapyà mikòsòlòke kumutù kwà yònsò wa kùdibo. Nènku cyàkatàmba kufùùlùlula mibidi yàbò, mu mùshindù wà kabàciyikù kàbìdi mwà kwakula mu mwakulu kampànda wà pa buloba ebu to. Cyàkafùùlùlula mibidi yàbò ne kubàkwisha mwakulu wà mu Dyulu, wà mu Mwaba udibo bènda baya. Bukolè bufùùlùludi bwà Nzambi bwàkanyùkusha mibidi yàbò yà cifwàkà bikole, mu mùshindù wà ne mwakulu wàbò wà cifwàkà wònsò nkòong wàkashintuludiibwa, kukùdimunyiibwa mu mwakulu wà kawùyi wùfwa. Bukolè bufùùlùludi kaayipu's wè! Cinyi? Cintu kampànda cìdi bu cyèbè.

¹¹⁴ “Piikalàbi ne Nyumà wàkabiisha Yesù ku bafwè awu, mmusòmbèle mu mibidi yènù yà cifwàkà eyi, Yèyè neàfuulululè kàbìdi mibidi yènù yà cifwàkà ayi.” Tudi dībà adi bafùùlùlula kùdi bukolè bwà Nzambi udi ne mwoyi.

¹¹⁵ Myakulu, mifùùlùlula milwè mwakulu mupyamùpyà wà mu Dyulu, bwà kwakula naabò; dyambwibwa kampànda,

dibàndishiibwa mu cyuyúyà cishiilàngàne ne civwàboku basòmbèle. Kàbìdì, ne Mwoyi mupyamúpyà mufuùlùludi awu bwàbò bóbò, Wàkafuùlùlula mwakulu wàbò. Bààkaakula mu myakulu mipyamipya. Kaa, èyowà's!

116 Mpindyewu bàtàngilaayi. Wówò awu ngùvwa kàbìdì mulongolola bwà kubàpèèsha, paanyimà pàà bukenji bwà bweena-cintu ebu, bìvwa bilongolola bwà kubàpèèsha mulayi ne mulayi wónsò wùvwàku mu malaba awu's. Mulayi ne mulayi wónsò pa malaba à Dìyi dyà Nzambi, wùvwà mulaya mu Bible awu, bukolè bufuùlùludi abu bwàkabàpèèbwa, bwà kubàfuùlùlwilabò mulayi awu. Ki bwà cinyi, bàvwa bàtentekela babèèdì byanza, babèèdì bøndopiibwa. Bààkaakula mu myakulu mipyamipya. Bààkenza bimanyinu binèné ne maalu à kukèma, bwalu abi bìvwa mu mulayi wà Nzambi awu. Ne pààkafwà Yesù, bwà kubàpikwila byòbì abi, malaba àvwà à bàná bàà Nzambi awu, Yèyè wàkaleeja patòòke Cìvwà Nzambi.

117 Mmunyi mutùdiku tupeta dikàmàkàmà dyà kuvwija ciinè aci cyà buuwetù ne kucyèla mu dīgumba's? Katwènakù ne bukenji bwà kwenza aci nànsha.

118 Nyumà Mwímpè, leelù ewu, ngudi wenda ukèbangana ne myoyi yà meeji matòòke yikalà mwà kwitabuuja Mukenji awu. Byónsò mu Bible, bìvwà bilaya, bìdì bwà mweena kwiitabuuja awu. Ne paùdì ucìitaba mu kaabujimà kààci, ne Nzambi mumanyè ne neucyènzè, Yèyè ùdì ùkupèèshilaci bukenji bwà bwena-cintu. Ne díbà adi mulayi wónsò wùdì mwenza ùdì mu cyanza cyèbè, ne Nyumà Mwímpè ùdikù bwà kuwùfuùlùlula bwèbè wèwè. Kaa, ekelekèlè! Bìvwa bikèngela bwà twètù kwiikala bantu bàà—bàà mùshindù kaayi? Bilenga kaayi's bwà kumòna Nyumà Mwímpè munèné wa Nzambi kaaba aka bwà kwenza bwòbù bukolè abu! Anji elààyibì meeji ku bwalu abu. Pààbì's, Nyumà Mwímpè Yèyè Mwiinè, ùdì kaaba aka bwà kufila bujaadiki bwà díbà edì. S'mmwàkambà Yesù. Yèyè ùdì umwèumwè awu makèèlèlè, leelù, too ne kashidi.

Mmunyi mùdiku muntu wetù ewu mwà kupeta dikàmàkàmà dyà kukùpula aci Muntwamu?

119 “Byenzedi bìNdi ngenza nenùbyènzè pèènù,” Yone 14:12. “Bimanyinu ebi nebifilè aba bàdì bìitabuuja.” S'ki ditwishiibwa ndyòdì adi. Patùdì tumòna kasùmbù kàà bantu basòmbè pàmwè, ne bimanyinu abi bìdimwènesha, s'ki ditwishiibwa dyà ne bukenji bwà bweena-cintu bùdikù bwà kushindika ne aci ncintu cyà Nzambi. Amen.

120 Pa nànkù, twètù pèètù, tudi Paasàkà. Amen. Patùdì twakulangana apa tudi mu wetù Paasàkà. Tukàadi bamanè kubiishiibwa ku lufù, àlèluuyàh, buumuke ku maalu a pa buloba, batàngile ku bintu byà mulayi wà Nzambi. Kí nnè netwikalè to; tudi. Mmu mùshindù mishààdile.

¹²¹ Mmulayi wà Nzambi. Yéyè ùvwa mwà kupòngòlola Nyumà Wendè mu matùkù à ndekeelu, ne ki cìvwbò mwà kwenza aci's. Mònaayi, kutentekelabò babèèdi byanza; byònsò bìvwà mu mulayi wà Nzambi awu. “Némpòngòlolè Nyumà Wanyi mu matùkù à ndekeelu, pa mubidi wònsò. Bakùlakàjì bèènu nebàlootè bilòòtà. Bansongà bèènu nebàmonè bikèèna-kumòna.” Ne milayi yònsò mishiilèshiiàngàne yàkafilàYe eyi, byònsò bidi bìsanganyibwa ànu mu mulayi wà Nzambi awu. Yesù wàkatùpikwilayi. Ne patùdi tulwa . . .

¹²² Anyi, twètù, piikalàbi ne tudi balongolola bwà kwiikala mu buloba abu, piikalàbi ne tudi balongolola bwà kwiikala mu buloba abu; mùdi mukankù wèndakana mu ciswa cyà nzòlo. Piikalàbi ne wèwè udi mulongolola bwà kwikala mu buloba abu, Nyumà Mwimpè ùdi kaaba aka bwà kukupeta. Ne pàdiYe ùkupeta, wèwè udi ujingulula dibiiikila Dyèndè. Udi umanya díbà dyùdi ne mwoyi. Udi umanya ne bintu ebi bidi ne cyà kwenzeka. Ne lùkàsà lwònsò wèwè udi mwambwibwe bwà kutwilangana Nèndè, ne patùdi twakulangana apa udi musòmbè mu myaba yà mu Dyulu mu Kilistò Yesù. Kaa, mulayi kaayipu's wè! Taatù wa mu Dyulu kaayipu's wè, Udi uswa kutùpèèsha bintu ebi's wè!

¹²³ Nyumà ùdi ùfùùlùlula bwobùmwe bwàbò ne Nzambi, mu mùshindù wà ne bàakaaluja bafwè ku mwoyi, mu ditùkù adi. Bààkaadija mibidi yàbò pa bafwè; bafwè bààkaalukila ku mwoyi. Tèèlejààyaaku ne ntèmà yònsò. Bààkenza bintu bimwèbimwè byàkenzà Yesù abi bwalu Nyumà umwèumwè, uvwa pambidi Pèndè awu, ùvwa pambidi pààbò. Piikalà Nyumà umwèpelè wènzeja muntu kampàndà mùshindù ewu, s'Ùdi wènzeja mukwàbò mùshindù awu. Piikalà umwe . . .

¹²⁴ Mmunyi mù Eci mwà kulwa pa muntu, kwambayè mùdiye ne Nyumà wa Nzambi, kàdi ùvila byenzi byà Nzambi? Kèna mwà kubivilakù tò.

¹²⁵ Mònaayi. Mwoyi wà Nzambi, wùdibo bàbiiikila mu cyeena-Ngelikà ne Zoe awu, wùkwàta mudimu munkaci mwàbò ne munda mwàbò, wàkafùùlulula meeji àbò ku Diyì Dyèndè. Mpindyewu, lekèlaayi ncyàmbèku ne ditalala dyònsò mpindyewu. Nyumà wa Nzambi udi ukwàta mudimu munkaci mwà bantu ewu, ùdi ùfùùlùlula meeji a muntu awu ku mulayi wà Nzambi. Nwamònu anyi? Ki cidìYe wènza. Tàngilàayi. Ne ndi nteeta bwà kunùleejakù ci—ci . . . ne nnùfikisha ku dimanya ne ndi mpindyewu ngaakula bwà Èkèleeziyà, ne mwikàle pèndè mufùùlùlula ku Mwoyi, munda Mwèndè.

¹²⁶ Nànsha nànkù, bòbò bàvva ànu byambiibwà Byèndè cyanàànà's, twamb'eku twamb'eku. Kàdi piikalàbi ne Nzambi wàkamba ne: “Mu ditù *edi*,” ku cibangidilu kwàka ne: “John Kampànda ewu neikalè musadidi Wanyi,” kùkaadi miliyò yà bidimu. Mpindyewu, John Kampànda awu mmulediibwe mu

mpèkaatù, mufwimba mu bubì, mulwè pa buloba wamba mashimi, bwalu yèyè ngwa cifwàkà. Kàdi, pàmwàpa, ùdi ùpetakù ndambù wa njiyà yà butèndeledi. Neàye kashààla wa mu èkèleeziyà kampànda. Pàmwàpa neàye kashààla wa mu èkèleeziyà wa beena Mpenta. Ncyèna mumanyè to. Mmufwànyine kuya kashààla wa mu cintu kanà cyònsò. Kàdi àdidingè ànu àbwele mu cyuyùya cyà Nzambi, musangu ànu umwè's. Nwamònu anyi? John Kampànda awu mmwenzèjiiibwe bwà kujingulula ne Taatù wendè Nganyi, ànu mùvwà mukankù awu mujingùlùle ne mamwèndè ùvwa nganyi amu. Ùdi ne cyà kucijingulula. Nwamònu anyi? Bidi ànu ne, John Kampànda awu ncyambiibwà cyà Nzambi cidi cyandàmùke díyi kampànda, dyakula, ne pashiishe Nyumà Mwimpè ùditwa mu dikèbangana ne dyòdi díyi adi. S'ki dyòdi edi. Ùdi ùmubiikila, ùmupèesha Mwoyi wà kashidi, ne ùmubweja mu Bwiikadi bwà Nzambi, Díyi dyà Nzambi.

¹²⁷ Tangilààyì. Nzambi ùvwa ne cintu cìmwècìmwè aci pààkamònàYe Yesù apu. Cìvwa—cìvwa mmudimu mujikija wàkajikija Nzambi ne Yesù, pàakambàYe ne, “Kwàjikì apu”. Ndongamu mujimà wàkajika.

¹²⁸ Ne pàdi Nyumà wa Nzambi ùlwa pambidi pèèbè, ne wèwè mwiikàle bushùwà cìmwè cyà ku byambiibwà byà Nzambi bìvwàYe mwakùle. . . Mpindyewu wèwè kùyì cyòcì aci to, newikalè udyèla nkonko ne ulubakana, ne unyeemakana wàtwa *eku* ne *kwàka*, ne bikwàbò byònsò, kadi kùyikù ufikakù ku dimanya dyà Bulelèla to. [Katùpà kàà mukàbà wà mèyi munda mutupù—Muf.] Wèwè mwiikàle wa ku byòbi abi, bintu byà kale nebipitè lubilu lukolè, nwamònu's, ne neùlwe mupyamùpyà, nènku ndongamu wa lupàndu wàsangana kujika anyè wàjika. Wèwè ukàadi pabwipi bwà kutùmikila Díyi dyònsò dyà Nzambi dikaadi dikwambila adi, wamònu's, bwà wèwè kudyenza adi. Udi ukòokela Díyi Dyèndè. Mukàndà wà dyumvwangana, menemene, bukenji bwà bweena-cintu ku mukàndà wà dyumvwangana abu, mukàndà wà bweena-cintu ngwèbè wèwè. Mabànzà mmáfuta ònsò. Mmakùpula ònsò, ànu mwàkenzekàbi mu Ditùkù dyà Mpenta amu.

¹²⁹ Mpindyewu tùmònààyìbì difùùlùlula adi, Nyumà mufùùlùludi ewu pa bakwàbò bantu.

¹³⁰ Mpindyewu, mvwa munwàmbile ne ncyàkwakula ntàntà mupite bule to, kàdi ndi ne tusunsa makùmi àbìdì bwà mèmè kukùmbaja díyi dyànyì, mèmè mwenzè nànkù, mònaayi, bwà kushààla mulame cikondo cìmvwà mwambè aci, bitwè ku—bitwè ku díbà dijimà.

Mònaayi mpindyewu bukolè bufùùlùludi ebu. Aci cidi cilwa ànu. . .

¹³¹ Mpindyewu, kùdi diMudyombola bùngì cyanàànà. Kùdi bantu bùngì cyanàànà bàdi cyà bushùwà bèèla meeji ne bàdi

Nendè, pààbò kabàyi Nendè to. Bantu bààbùngi bàdi bènza nànkù bwalu mbapetè didifwikakajila dyà mafi dyà bidìbo bàmona beena Kilistò bakwàbò bènza. Sàtaanà's ùdi mwà kutentula cintu kanà cyònsò cyà ku byòbì abi. Aci's tudi bamanyè. Ne nwènù bu bampandanjila, s'nudi mwà kumòna mùkaadibi bitentùdiibwe: dyela dyà mbilà, dijà dyà maja, dyakula dyà mu myakulu, bintu byònsò ebi. Nudi mwà kumòna mùdìbi bitentùdiibwe myaba kanà yònsò. Kakùyi mpatà to. Munkaci mwà bampàngaanù ne bantu bàdi bàvilà bàmba ne kakwènakù cintu pààci ne n'Yesù Kilistò mwikàle Mwànà wa Nzambì to. Nwamònu anyi? Ne bàdi bènza bintu byònsò abi, bóbò biinè.

¹³² Kàdi Nyumà mufùùlùludi wa cyà bushùwà, mulelèlè udi ulwa kùdì mwena kwiitabuuja awu, ùdi ùmufùùlùlula ku Dìyì dyà Nzambì, ùmwaluja ku cyàkudyà cyà Mukankù cyàkàbìdì, ùmwaluja buludì ku mwaba wùdiye ne mwoyi. “Muntu kààkwiikala ne mwoyi ku dyàmpà nkààyaadi to, kàdi ku Dìyì dyònsò didì dipàtukà mukana mwà Nzambì.”

¹³³ Tùmònààyaaku mpindyewu Nyumà mufùùlùludi ewu pàdìYe ùlwa pambidi pàà bakwàbò bantu, mwàkalwàYe mu—mu Ditùkù dyà Mpenta amu.

¹³⁴ Tùmònààyi Mpenta, mwàkenzàbo maalu, ne tùmònè bóbò ní bààkafùùlùludiibwa kùdì bukolè bufùùlùludi bwiinè butùdì twamba ebu. Mu Ditùkù dyà Mpenta, bàvwa bònsò bindile kuulu aku. Mu bóbò biinè, bàvwa ne bwòwà. Beena Yudà, ànu ciinè cìvwàbo mwà kwenza aci, bàvwa bakwàcike bwòwà. Kàdi cyàkenzèkà ncinyi? Pààkamata bukòlè bufùùlùludi ebu bufùmine mu Dyulu, kwàkalwa bukitù kampànda pa bóbò. Kulwakù cintu kampànda, dyumvwa kampànda, pààbò's kabàvwa batwishùbwe menemene naaci to mu mèbà makesè kumpàla. Bàvwa bamanyè ne Yèyè ùvwa—Yèyè ùvwa mufwè.

¹³⁵ Bàvwa bamanyè ne Ùvwa mubiike ku lufù. Bàvwakù baakùle Nendè mu njila. “Kàdi cintu aci cìvwà bwàbò bóbò anyi, anyi cìvwà ànu bwàbò bóbò nkààyaabò, bwà Yesù Yèyè nkàayèndè anyi?”

¹³⁶ Kàdi mu Ditùkù dyà Mpenta edi emu, Nyumà Mwìmpè, bukenji bwà bweena-cintu abu bwàkamata pa beena kwiitabuuja abu. Aci kubàvwijaci citùpà cyà Dibìikà Dyèndè dyà ku lufù, dyàkamuvwija citùpà cyà bwobùmwe Bwèndè. Nyumà Mwìmpè wàkalwa ne wàkabàshindikila ne bàvwa mwà kubìshiiibwa ku lufù, bwalu bàvwa mu mùshindù mushàadile babilshiiibwe ku lufù dibà adi, buumùke ku bantu beena bwòwà bashààle bantu bàà bukitù.

¹³⁷ Bàvwa—bàvwa ne bwòwà bwà Dìyì diinè òvwàbo beelèle meeji adi. Eci kacinùpicidikù pamutù to. Bàvwa ne bwòwà. Bàvwa bamanyè ne Yèyè nguvwa Dìyì adi.

138 Nànsha mene beena Yudà bivwa bikèngela kuciitababò. Nikòdemè wàkamba ne: “Laabi, tudi bamanyè ne Wèwè udi mulongeshi mufùmìne kùdi Nzambi. Muntu nànsha umwe kî mmufwànyineku kwenza byùdi Wèwè wenza ebi Nzambi kàyi nendè to. Mpindyewu, twètù tudi bamanyè nàнку. Tudi bajingùlùle nàнку.”

139 Pa nàнку bayiidi. . . Peetèlò wàkadìcipa mene Kumpàlà Kwèndè. Bónsò bàkaavwa baMulekèle ku dipoopediibwa dyà pa nkùrusè aku.

140 Kàdi ki bôbò aba mpindyewu babànde mu cibambalu cyà kuulu eci, mu Bwiikadi bwà Nzambi. Pashiishe, dyàkàmwè, ki Nyumà Mwîmpè ewu ùpweka ùfùmìna mu Dyulu, ne kubàfùlùlùlula Yè. Ki difùlùlùludiibwa adi kwenzekadi, bàvwa ne bwôwà bwà kufila bujaadiki bwà Mukenji wùvwàbo biitàbùuje ne bamanyè ne m’Bulelèlà awu. Mu ngaakwilù mukwàbò, bàvwa naaWù bwôwà.

141 Mba-Presbytériens búngi kaayi, Mba-Méthodistes búngi kaayi, Mba-Baptistes búngi kaayi, pa buloba leelù ewu, Mbeena Mpenta búngi kaayi, bàdi bamanyè Bulelèlà kàdi bàciina bwà kutwaPù makàsà? Ndi mutwishisha bwà kudìkonka ne, ciwà cinùmacile nwènù aci ncinyi? Nudikù citùpà cyà dibìikà Dyèndè dyà ku lufù anyi? Udikù mufwànyine kupeta dikima dyà kwela mbilà bwà kuumusha dilongesha dikwàtakaja ne mmwènenu wa muntu kampànda anyi? Anyi, udikù ne dikima dyà cyà bushùwà ne—ne bulùmè bwà cyà bushùwà bùdi bùkèngelà, bwà kwimanakana ne kubìikila cîmpè ne “ncîmpè,” ne cibì ne “ncibì anyi”? Udikù citùpà cyà dibìikà Dyèndè dyà ku lufù, anyi udi mukuukwidi wa mushiki wà twitabàayi? Udi muyi wa mu èkèleeziyà, mwikàle ne dîna difundamù, kàdi mufwè mu mpèkaatù ne matomboka anyi?

Ewu udi kàyi wìtabuuja Dìyi dyà Nzambi mu kaabujimà ùdi ngènzàmpèkàatù.

142 Bàfaalèsà abu bàvwa biitabuuja bintu byàbúngi ne, m’Bulelèlà. Bàvwa bàmba ne: “Twètù tudi bânà bàà Nzambi.” Ne ki ciwàbo, too ne pààkayiishiibwà Dìyi adi. Kàdi pààkayiishiibwà Dìyi adi ne kushìndikiibwadi, dîbà adi kulwàbo bangènzàmpèkàatù, bwà kubèngà kwà Cintu ciwàbo bamanyè ne ncyà bushùwà, ne bacìfidila bujaadiki aci. “Tudi bamanyè ne Wèwè udi mulongeshi mufùmìne kùdi Nzambi, bwalu muntu nànsha umwe kî mmufwànyineku kwenza bintu byùdi Wèwè wenza ebi Nzambi kàyi Neebè to.”

143 Ndi meme ndìkonka leelù ewu ne, tudi penyì? Mùndi nnùkonka. Dibìikà dyà ku lufù edi didi ditùsangeena penyì? Udikù ne dikima dyà kupàtuka anyi? Udikù ne dikima dyà kukwàcila Nzambi ku Dìyi Dyèndè anyi? Pawikalà mulongolwela Mwoyi, udi mutwishiiibwe ne newàngulè mpasu. Pawikalà mukankù, kwèna mwà kudìpangisha bwà kucyènza

to, kùdi Cintu kampànda mu wêwè amu. Anyì, udi muswè ànu bwà kukwàcila twitabàayi kampànda mudimu mu mwaba kampànda, wamba ne: “Mémè ntu nya mu èkèleeziyà. S’ndi mwîmpè ànu múdì wêwè amu anyì?” Nwamònu anyì? Wêwè kùyi mulamè bukenji bwà bwanaàabutè nànsha bukesè to, kwàdyàkubùmònakù nànsha, kwèna mwà kubùmònakù to. Kàdi wêwè mulamè bulelèlè bwena-cintu bwà bukenji bwà bwanaàabutè ebu, kwèna mwà kudipangisha bwà kubùmòna to, bwalu bùdi citùpà cyà ku wêwè ne wêwè udi citùpà cyà ku bwòbù.

¹⁴⁴ Mmunyi mûndiku mufwànyine kuvila maamù wàkandela? Mmunyi mûndiku mufwànyine kuvila taatù, mwena mashi àdi mu mémè awu? Mmunyi mûndiku mufwànyine kuvila Charles Branham ne kî ntaat’wanyì? Ncyênàku mufwànyine kucyènza nànsha. Ndi muswè bwà kutwàla bundù bwèndè anyì nî ncinyi cikwàbò cyònsò, bwalu ndi mwanèndè. Àlèluuyàh!

¹⁴⁵ Dìbà adi mwiikàle mwànà wa Nzambì, ne Yèyè ùvwa Dìyi dyà Nzambì, mmunyi mûndiku mufwànyine kuvila ne Bible awu kî m’Bulelèlè, ne Yesù Kilistò kèna umwèumwè awu makèèlèlè, leelù, too ne kashidi? Ne pa kumòna dìbà ditùdì ne mwoyi, bìdi bitùkèngela Paasàkà kampànda mu èkèleeziyà. Dibìishiibwa dyà ku lufù! Bidi bitùkèngela dibìishiibwa dyà ku lufù, bwà mukolesha diitabuujà, balùme ne bakàji bwà kwiimanyina cidi Dìyi dyà Nzambì dishindika.

¹⁴⁶ Wêwè udi wamba ne: “Èè, twètù’s tudi munkaci mwà kusàkisha Bunsòngà bwà Kilistò.” Abi’s bìdi ànu bìmpè. “Èkèleeziyà wetù ùdi munkaci mwà kwenza disangisha. Tudi baswè kupeta bidimba byàbùngì *be*.” Ncyèna mbèngangana ne aci to. Abi’s bìdi ànu bìmpè. Kàdi aci’s cidi ànu cyuyùya. Aci ncifwànyine kwiikala ànu masàlà à kale à nzòòlo wa cikuka. Kàdi bu wêwè ànu mwà kubwela mu cyuyùya cyà cijalame kuntwaku, s’necitooyishè mukankù pawikalà wêwè diyi dyà mukankù. Ne wêwè mudyànjala kulongolola kùdi Nzambì bwà kucimòna, kwèna mwà kudipangisha bwà kucimòna to, neùlwe mu dibìikà dyà ku lufù. Mùshindù awu ngwàkalediibwà ba-Baptistes, mùshindù awu ngwàkalediibwà ba-Méthodistes, mu dibìikà dyà ku lufù dyà ditùkù adi, kàdi bòbò kukùdimuka è kulwa cikuka cyà nzòòlo pamutù pàà mukankù.

¹⁴⁷ Ànu mûngàmbì katanci aka ne, pâmvwà nya mutangile ku Tucson, mvwa mubandile cintu cyà cikèmesha. Mémè kumòna kabemba kasòmbe pa nshinga wa nzembu kuntwaku. Kabemba aku nkajimìje dimanyishiibwa dyàku kùkaadi ntàntà mule. Kale wàwa kàvwa nyuunyi ùvwa pabwìpi ne mukankù. Kakàvwaku mwà kulonda mukankù to; to, nànsha bishi. Cintu nànsha cìmwè kaciyènakù mwà kulonda mukankù to. Kàdi kòkò kàvwa kabemba.

¹⁴⁸ Kilistò ùdi Mukankù, ne bìvwa bikèngela bwà èkèleeziyà

kwikalayèkù nànsha kabemba's. Bôbò bàdi mwà kubùuka muulu kutàmba nyuunyi mikwàbò kanà yònsò eyi. Kàdi kabemba aku kàkaadi kalwè katekètàngàne. Kàkaadi kajìmije dimanyishiibwa dyàkù. Kàdi kàsomba pa nshinga yà téléfonè kàshààla kindile kàlulù kampànda kafwè. Kàdi kènda kàtùpika mùtù ciminyì amu, pamutù pàa kubùuka mùtù kabemba kàbùuka amu's.

¹⁴⁹ Kaa, mwanèètù wa balùme, mwanèètù wa bakàji, nwènù beena Mpenta, nwènù bàdi cisàmbà cyànyì sungasunga cinanga! Èkèleeziyà ùdi wènda ùjìmija dimanyishiibwa dyèndè. Udi ùpwekelela ùshààla mutèèkèle mwoyi ku twitabàayi kampànda yà kwisùkwisù mifwè, pamutù pàa kubùuka kuya mu Maulu, mwàmwa, bwà kakèba manà mapyamàpyà.

¹⁵⁰ Kale wàwa kabemba kàvwa kàya kadikèbela manà àkù sungasunga, kàdi leelù ewu kàkaadi kàngata bìdì màshinyì madyatè ne bìdì biminyì bìdya. Kàdi kàtùpika mùtùci citùpika amu. Kàkaadi kafwànàngàne naaci.

¹⁵¹ Twètù tukàadi badilengèje bikolè pa buloba bwà cyena-leelù apa, bakàji bèètù bàkòsa nsuki yàbò, ne bàvwàla tùpùtulù, balùmè bèètù kabàyikù ne mufobù wà kwiimana mu cyambilu bwà kwamba bulelèlà to. Tukàadi balwè batekètàngàne pa Dìyi kùkaadi ntàntà mule.

¹⁵² Éyi Nzambì wa yààya, tùmakù Nyumà Mwimpè ne tàbaleelàku mikankù ayi myaba kampànda, yidiku midilongòlòle bwà kwiimana mwàmwa ayi, nànsha cinyì cyenzèke, yikalà mwà kubànda kuya kabwèla mu bìdì kabìyi bimanyike, kayiyi yìikila pa nshinga yà téléfonè ne yikèba bwà mikànda kampànda yà kubala yà kàlaasà kàa Dyàlumingu yibwelè to. Ndekèlaayi mèmè ngiikalè ne Dìyi, ne mu bupyabùpyà bwà bukolè ne dileeja patòokè dyà Nyumà Mwimpè. Cidì citùkèngelà m'Paasàkà kampànda, dibìishiibwa dyà ku lufù didiku dyà mùshindù mushààdile adi. Wèwè mulundà wanyì, pawikalà musànkishìibwe ne bintu bibolè byà maalu a pa buloba, kùdi cintu cidì kaciyi cyènda bimpè to.

¹⁵³ Mwanèètù wa bakàji, mwanèètù wa balùme, lekèlaku nkwabìlè, eci nùnku, mu dicìinà dyà cijilà, mumanyè ne bìdì mwà kwenzeka ne ncìikadikù kàbìdì ne mwoyi too ne ku dimòna Paasàkà kampànda to. Kàdi kùdi cintu cimwèpelè cyà bulelèlà, pàdì mwànà mushùwashùwàlè wa Nzambì, ku Dìyi dyà Nzambì, ùmvwà Dìyi dyà mukana dyà Nzambì adi, neàjuukè àye katuutakeena Naadi. Ndikumbana adi, dyà ne yèyè neàye katwilangana ne Dìyi dyà cyà bushùwà didì ne mwoyi. Ànu mùvwàYe Yèyè amu, Mukàji-musèla neàtwilanganè ne Mubàki. Yèyè ncitùpà cyà ku Mubidi Wèndè.

¹⁵⁴ Mònaayi, kùkaadi ntàntà mule kutùkaadi, kutùdi munkaci mwà kujìmija dimanyishiibwa dyètù. Tudi balwè mu diisàtù dilòlò, bàmwè bàà kutùdi. Bakwàbò bàtu bàshààla kumbèlù

bwà kubandila *Ewu Udi Munangè Susie*, ku tèleviziyô, bintu byà pa buloba byà mishindù yònsò, macyònkomojangana à mishindù yònsò, bwà kunùpangisha bwà kulwa mu èkèleeziyà. Tudi bacijimije kùkaadi ntàntà.

¹⁵⁵ Maasèminèrè ètù, bilongelu byètù, bìdi bìpàtula musùmbà wa ba-Rickys biikàle ne tèlòlòjì búngì cyanààna, ne—ne dicyònkomojangana ne byònsò mu èkèleeziyà, bwà kwangatabi mwaba wà disangisha dyà milòmbò. Twangàci bivwàlu tukàadi tuteeta bwà kukùmbaja cidi beena leelù bàteeta bwà kwenza, tubibwejamù. Kanwàdyakubàpetelakù ku abi to. Bòbò's bàdi ne byòbì abi byàbúngì kutàmba binùdi nwènù naabi abi. Nwènù kanwèna ne cyà dyenza mu cyalu cyènù. . . mu cyalu cyàbò bòbò to. Bàlekèlaayi bàlwe bòbò mu cyènu nwènù, mùdi dibàtiiza dyà cyà bushùwà dikenka, mwaba wùdi bukòlè bwà cyà bushùwà bwà dibiikà dyà ku lufù. Kanùteecikù bwà kwibaka èkèleeziyà mufwànàngàne ne wabò nànsha. Kanùteecikù bwà kwikala ne mpaasàtà wa nàнку nànsha. Kanùteecikù bwà kwenza *cikampànda*, *cikansanga*, *cikankènga*, anyi bwà kukwàcishangana mu mudimu ne bàà pa buloba nànsha. Bòbò bàdi babàlakana ne Hollywood.

¹⁵⁶ Èvànjeeliyò wà cyà bushùwà ùdi wèla nsèsà ne bukòlè. Mikankù yidi yùmvwa aci. Kayèna yènda yikèbangana ne dikenka to. Yidi yòyì yènda yikèbangana ne dyela dyà nsèsà. Dyela dyà nsèsà ne didipwekesha, dyela dyà nsèsà ne dinanga, dyela dyà nsèsà ne bukòlè, ki cidi mukankù wà cyà bushùwà wènda wùkèbangana naaci aci's. Kwèna mwà kukala mu lupangu lwà nzòòlo ne kumusànkisha to. Yéye kààkukùmbanakù bwa kucyènza to. Kwàkuwàmbilakù aci to, bwalu kèna ùciitabuuja to.

¹⁵⁷ Dìyì adi dyèlè ànu lubilà lukòlè lùumukila mu maulu ne: “Mémè Ndi Ewu uvwa mufwè, ne udi cyàkàbìdi ne mwoyi,” cintu kampànda cidi cyènzeka. “Mémè ndi umwèumwè awu makèlèlèlè, leelù, too ne kashidi. Ne nebyènzeke mu matùkù à ndekeelu ne, Mémè nèndipongolole Mémè mwiinè pa mubidi wònsò.” Butumbì kùdi Nzambi! “Mémè nèmfiùlùlulè mwakulu wèbè wà cifwàkà awu. Nèmfiùlùlulè ndimi yènù yà cifwàkà ayi. Nènnùpèshè cileeeji cyà ne Nènnubwejè mu dibiikà dyà ku lufù pàmwè Naanyi.” Mikankù yà myoyi yidi ne nzala yidi yòlola cyaanza bwà kukwàta cyòci aci ànu bikòlè ne mwàyì mwònsò. M'Busàngà bwà mushinga mukòlè, bùdìbo bàsùmbishila bikwàbò byònsò, bwà kuya kabùsùmba. Amen.

¹⁵⁸ Nzambi àtùkwàcishèku, mulundà wanyi. Èkèleeziyà yètù yidi yènda yijimija dimanyishiibwa dyàyì.

Tùyaayi mpindyewu lukàsàlùkàsà ku bikwàbò.

¹⁵⁹ Tàngilàà cyenzedi cyà bàyiidi abu, bakwàcike bwòwà. Bàvwa bamanyè ne Yesù ngùvwa Bulelèlè, kàdi, nudi numòna's, Bùvwa bùbèngangana ne mmwènenenu wa mwasàkànaayi awu,

ntèndeleeleu wa mwasàkànaayi wa dībà adi awu, ntèndeleeleu mutambe kwiikala muumisha ncyoncyoncyo awu, Basaa-... Bâfaalèsà, Basadokà, ne bakwàbò abu, tusùmbù twàbò twà ntèndeleeleu, tusùmbù twàbò, ne màngumba. Bòbò bàvwa—bòbò bàvwa bàbèngàngana ne “dipàmbuka adi”. Kàdi Yesù nguvwa Dìyì dishìndìkìibwe.

¹⁶⁰ Ne Yesù ngudi Nyumà Mwímpè, mu Nyumà. “Katanci kakesè aka bàà pa buloba kabààkuMmòna kàbìdì to. Nwènù nenùMmòne,” kî mmubidi to; Mwoyi wùvwà munda Mwèndè awu. Nzambì ùdi pa Èkèleeziyà, bwà kubiikila bàna mwàkabiikilililà Ye musangu awu amu, bàà butùmike ano.

¹⁶¹ “Mémè ndi misangu yònsò ngenza ànu cìdì cìsànkishà Taatù Wanyì. Nganyi wa kunùdi aku udi mwà kuMbanda ne mpèkaatù?” Mu ngaakwilù mukwàbò, *mpèkaatù* m’ “bupidyà.” “Cìdì Dìyì dyambè Bwànyì Mémè, cìNdi ncìyì mwenzè ncinyì?” Kì mùdìbì nànkù. “Ndeejàayi cìdì Dìyì dyambè ne Mvwà mwà kwenza, cìNdi ncìyì mwenzè to. Nganyi udikù mwà kuMbanda? Nganyi udikù mwà kuMfunkuna munu, kwamba mùNdi ncìyì muujè Dìyì dyà Taatù Wanyì?” Kaa, pààfikàku èkèleeziyà wa beena Mpenta pa kaaba aku’s wè! “Nganyi udikù mwà kuMbanda ne bupidyà?”

¹⁶² Kaa, nwènù beena Kilistò, kanùmanyishiibukù bu kabemba nànsa, kàdi bu mukankù. Kabemba aku nkatekètàngàne, nekàpwekè. Kacya kanùtukù numòna mukankù wènza nànkù nànsa. Wòwò kawàkwenzakù nànkù to. Wòwò wùdi wenda wùkèbàngana ne cyàkudyà cyàwù sungasunga, mu maulu mwàmwa. Nzambì ùtu muwùlongòlòle bwà kucimònawù. Wùdi wùpeta manà mapyamàpyà, kî ncintu kampànda cifwè to.

¹⁶³ Mu Ebèlù, pàvwàbò bàkòsolwela mu cipèlèlà, bàakadyà, bàakateeta bwà kudyà manà mafwè. Àkaavwa malwè matèngèbèlè. Àkaavwa—àkaavwa mabwelè tusàndà. Nudi bamanyè citùdì tujinga kwamba aci. Mmatàpile ànu twìshi, mabolè. Mùkaadi bikusù.

¹⁶⁴ Mbwà cinyì bùndì mufwànyine kudyà cyàkudyà cikaadi cifwè kùkaadi bidimu? S’ncifwànyine kwiikala cimwènka cìmpè ne mbùngakeenu’s, waci mwímpè, kàdi kî ncipyacipyà to. Bidi bikèngela bwà twètù kwiikala tupeta cyàkudyà ku lukòngò ne ku lukòngò lwònsò, cipyacipyà. Kì mùdìbì kàbìdì ne mukankù wùtu wènda wùkèba cyàkudyà aci, ku lukòngò ne ku lukòngò lwònsò, ànu mutùdì mu lwendu lwètù emu. Mònaayi.

¹⁶⁵ Mpindyewu twàngatàayi cyàkàbìdì bàmwè bantu. Twàngatàayi bàmwè bàà ku bapròfetà bàà Dipungila Dìkùlukùlu, bwà tùmònè cyàkènzàbo.

¹⁶⁶ Twànjì tütàngilàayiibi Stèfanò, mùvwà Stèfanò munkaci mwà Nsangilu wa Tubàdì twà beena Yudà amu. Pàakamufikishà nsangilu awu kuntu aku, nsangilu munènè wa beena kwitabuuja awu kuntu kwàka, anyì bàvwa bàbiikidiibwa ne mbeena

kwitabuuja's, kulwabò nendè ne kuteetabò bwà kumupiisha. "Mòna's," mwàkambàye, "nwènù bàà nshingu mitàndàbàle aba, kabàyi batengula myoyi ne macì, nudi nwènù misangu yònsò ànu nukàndameena Nyumà Mwîmpè." Ki Mwoyi wà Cyendèlèlè ngwòwò awu. "Mwàkenzà baatatwènù kale wàwa mu cikondo cyà bapròfetà, s'ki cinùdi pèenù nwenza leelù ewu eci." Kàdi ki kumudyàbo ne disumakaja dyà mènù's. Kabàvwa baswè kuumvwa aci to. Yèyè ùvwa ùbèngangana ne twitabàayi wabò. Ùvwa ùbèngangana ne dingumba dyàbò. Ki kwasabò muntu awu mabwè bwà kumusheyabò. Kàdi kujuulayè byanza byèndè muulu, kutàngijayè mpàla mu Dyulu, kwamba ne: "Ndi mmòna maulu muunzulula, ne Yesù mwimàne ku dyàbalùme." Bwà cinyi? Ùvwa ne dibìshiiibwa dyà ku lufù, bukolè bufùùlùludi munda mwèndè, bwàkamubwejà mu cyàdi cyà Yesù.

¹⁶⁷ Mònaayi, lùkàsàlùkàsà mpindyewu. Tàngilàayi Filipò, kuntu kwàka mu ditàbuluja dinène. Mukenzè ditàbuluja mu mwaba wùvwà wà muntu kanà yònsò ewu kàyi ùpeta dikima dyà kwenza to, mòna's, bu ne ùvwa mupetè dimwela dyà mu dibòko dinène munkaci mwà maèkèleeziyà ne bikwàbò byònsò kuntwaku. Ùvwa munkaci mwà kwenza ditàbuluja dinène. Ki bukolè bufùùlùludi bwà Nzambi kumwambilabù, bwamba ne: "Stèfanò. . ." Swàyi bwà Cyàmbèku ne: "Wèwè nyawu wenza ditàbuluja dinène, kàdi Pàanyi's ndi ne muntu umwèpelè ùNdi muswèku bwà wèwè kwakula nendè."

¹⁶⁸ Kàdi Stèfanò mmutùmikidi, nànsha ciikàle cinyi, nànsha bàmujaana bishi. "Kaa, Stèfanò, kwèna mwà kuumukakù to."

"Kàdi, s'ndi mwà kuumuka. Nzambi's ngudi mwambè nànkù."

¹⁶⁹ Ki kuyayè mu cipèèlà, ne kwòkù aku kusanganayè mutungula ewu. Kàdi cyàkenzekà ncinyi? Yèyè kwamba ne: "Ukàadikù. . . Wèwè mwitabùùje ne mwoyi wèbè wònsò ne, Yesù m'Mwànà wa Nzambi, nènkuubàtiizè." Pàakamubàtiizàye. . .

¹⁷⁰ Tàngilàayi. Ùvwa mufùùlùlula kùdi bukolè bufùùlùludi ebu, bwà kushiya ditàbuluja dyà bantu binunu ne binunu, bwà kuya mu cipèèlà, kùdi muntu umwèpelè. Kaa, aci's ncifwànyine kwiikala cibèngàngàne ne dilukakaja dyònsò dyà ngènyi's. Nwamònu anyi? "Mòna's, s'nyewù kùdi bantu binunu dikùmi neebè dijinga mwaba ewu." Kàdi kùdi umwèpelè mu lukèngelu, kwàka nàka. Nwamònu anyi? Nènku bukolè bufùùlùludi bwà Nzambi bwàkamutùma ku mwaba mulongolola wà Nzambi. Àlèluuyàh!

¹⁷¹ Nwènù balùme ne bakàji, Bwòbù abu's nebùnùtwishishè makàsà pànshi. Nebùnwènzèjè bintu bidì Nzambi muswè bwà nwènù kwenza. Cìdi muntu mukwàbò wàmba pa bwalu abu nànsha ciikàle cinyi. Mweena mutumba wàmba ne: "Muntu wàwa's wàjìmiji lungènyi. Ùsambila bufùkù bujìmà; Ùbala Bible." Cìdiye wàmba nànsha ciikàle cinyi. Cìdi Nzambi

mukubiikidile bwà kwenza ncidi ne bwalu. Ncyà bushùwà. “Oh, nyawù bamba n’á nè katwèna mwà kwenza matàbuluja à cyenakale, à beena Mpenta aa to.” Kaa, èyowà’s, pèètù, s’tudi mwà kuènza. Wèwè’s udi mwà kucyènza mu wèwè mwiinè amu. Ne wèwè awu’s ki ciibungì ciine, mu Nzambi, cidi bakwàbò abu bèèla meeji nànsha ciikàle cinyi.

¹⁷² Mònaayi, pashiishe, mu ditùmikila. Tèèlejàayaaku ne ntèmà yònsò mpindyewu. Paanyimà pàà mumanè kutùmikila Nzambi, ku Díyi Dyèndè, pààkamanàye kuuja mudimu wèndè mudimutùma naawù awu, bukolè bufùùlùludi bwàkapètaye ku Mpenta abu bwàkamukwàta kuya nendè, kufùùlùlubi mubidi wèndè. Mu ntàntà wa kilòmèètà ne kilòmèètà, wàkangaciibwa mu Nyumà, ne wàkasanganyibwa mu ditungà dikwàbò mu mwaba kampànda. Bukolè bufùùlùludi bwà Nzambi’s! Nènku twètù ni tudi beena mpenta: “Bukolè bùmwebùmwe bwàkabiishà Yesù ku bafwè abu, Bwòbù busòmbèle mu mibidi yènù yà cifwàkà ayi.” Nwamònu anyi? Èyo. Mònaayi.

¹⁷³ Twàngatàayi mukwàbò muntu uvwa ne bwòbù bukolè bufùùlùludi ebu. Kùvwa muntu kampànda wa kùkaadi ntàntà mule, dyèndè Henòkà. Pàvwa cintu cipyacipyà cilwa, pàvwa cintu kampànda cilwa cyà cyàmba ne: “Èè, mpindyewu bikèngela twàlukilàayi ku byà cilongelu cyà kale abi, anyi *cikampànda*, *cikansanga*, anyi *cikankènga*,” Henòkà yèyè ùvwa wènda ne Nzambi. Cyònsò civwà Nzambi wàmba bwà kwenza aci, Henòkà kààkapangilakù ku Díyi nànsha dimwè to. Ùvwa wènda ne Nzambi. Yèyè ùvwa nganyi? Ùvwa mwànà wa Nzambi. Ùvwa mukankù wùvwa mubiikidiibwe bwà ditùkù adi.

¹⁷⁴ Kàdi pààkalwà cikondo, ùvwa mule tètè ne bukolè bufùùlùludi abu! Vùlukaayi ne, yèyè ùkaavwa mwèndè bidimu nkàmà yitaanu, anyi bipite apu, kumpàlà kwà Nzambi, ne musangu nànsha wùmwe kààkapangilakù ku Díyi Dyèndè to. Musangu nànsha wùmwe yèyè kààkaditwàlakù bibi to. Musangu nànsha wùmwe yèyè kààkenzakù nànkù to pa kuumusha kulama kwà bujaadiki. Cyònsò civwà Nzambi ùmwambila bwà kwenzayè aci, yèyè ùvwa ùya ne ùcyènza. Kakùyì byà makòkyanganyi pa bwalu abu to, yèyè ùvwa ànu ùya ne ukacyènza. Civwà ní nganyi mukwàbò wèla meeji nànsha ciikàle cinyi, yèyè ùvwa ùya ne ùcyènza. Bwà cinyi? Ùvwa mule tètè ne bukolè bufùùlùludi abu. Kàdi pààkalwà cikondo bwà mukùlákàjì awu kufwàyè anyi, Nzambi kupwekeshaYè ànu cibàndilu ne yèyè kubànda lwà makàsà too ne Kumbèlu. Yèyè ngwàkamufùùlùlula awu, ne kwambula mubidi wèndè wà cifwàkà awu muulu mu dyambwibwa. Amen. Ki bwòbù bukolè bufùùlùludi abu’s.

¹⁷⁵ Tàngilàayi Eliyà, paanyimà pàà mudimu wèndè mumanè kujika pa buloba. Ùvwa mùle tètè menemenene bukolè bufùùlùludi abu, mu mùshindù wà ne wàkapiissha mishindù yà dikòsà dyà nsuki yà Jackie Kennedy ayi mu ditùkù dyèndè

adi. Ùkaavwa mwambile Izàbèlâ meeji àvwàye ùmwelela. Wàkambila bayiishi ne baakwidi abu cìvwà cìmpè ne cìvwà cibi, kàdi bôbô kabàakamwitabuuja nànsha. Kàdi wàkapiisha bakàjì bàà bilaabu kwìsù abu ne bikwàbò, bikolè be. Ne yêye ùvwa mule tètè ne bukolè bufùùlùludi abu mu mùshindù wà ne cintu nànsha cìmwè kacìvwakù mwà kumwenzela bibi to. Nzambi ùkaavwa mumudiishile mu maulu, mumupàtùle ne mumutèèke ku luseke. Ne yêye ùvwa mule tètè menemene ne bukolè bufùùlùludi mu mùshindù wa ne, pàakalwà cikondo cyà kufwàye, Yadènè wàkakànguka, ne yêye kwendaye ànu cyanàana, bàakapwekesha dikalù dyà mvità ne kuyadi nendè Kumbèlu, mule tètè menemene ne bukolè bufùùlùludi abu. Wàkalwa mwànà wa Nzambi mulelèlâ, mushùwashùwâlè. Eyowà.

¹⁷⁶ Mònaayi, ùvwa ne mumupinganyi, ne dyèndè ùvwa ng' Elishà. Ki Elishà kupetayè mpitu ibidi, yà bukolè bufùùlùludi abu. Nwamònu anyi? Wàkapeta mpitu yàbù ibidi. Mpindyewu, yêye wàkayiisha munda mwà bidimu bitwè ku makùmi mwandamukùlù, anyi ne ùvwa ne bidimu bitwè ku makùmi mwandamukùlù. Wàkasaama è kufwàye. Mpindyewu, yêye kàakafika ku dyalukila Kumbèlu mwàkenzà Eliyà amu to. Nwamònu anyi? Bònsò bàbìdì abu mbaleejiibwe mwaba awu mu Èkèleeziyà; bàmwè bansantu bàyaaya, ne bakwàbò bìikisha. Kàdi mònaayi pàakangaciibwà Eliyà mu dyambwibwa apu; pashìshe Elishà yêye kulàalayè tulù, mu Nzambi, mùle tètè ne bukolè bufùùlùludi. Tàngilàayi cipròfetà cyèndè pabwipi menemene ne kufwàye. Nwamònu anyi?

¹⁷⁷ Mpindyewu, lekèlaayi nnùleejèku. Nànsha byôbi ne udi mufwè, anyi nì mpenyi paùdì usanganyiibwa, bukolè bufùùlùludi abu kabwèna bùumukakù nànsha. Bidimu ne bidimu paanyimà pàà lufù lwèndè, misunya yèndè yìkaavwa mibolè, misàndà yà mu dikòba mimanè kuyidyà yònsò. Kàdi bàvwa bàya ne muntu mufwè mwambula, dngà ditùkù, kumwimanshabò mu mifùbà ayi amu, kàdi mùvwa bukolè bufùùlùludi bùngì cyanàànà mu mùshindù wà ne muntu awu wàkaalukila ku mwoyi. Àlèluuyah! Bwàkamubiisha ku bafwè, bwalu bukolè bufùùlùludi bùvwà pa munsantu wa Nzambi awu abu, kabùvwakù bumuumùke to, bùvwa ànu bushàale pa mifùbà ayi.

¹⁷⁸ Kaa, vùlukàayi ne, twètù aba tudi musunya wà ku misunya Yèndè, mufùbà wà ku mifùbà Yèndè, pìikalàbi ne tudi Mukàj'Èndè musèla. Lufù kalwàkutàcishakù bukolè bufùùlùludi abu to nànsha kakesè. "Nànsha misàndà yà mu dikòba mibùtùle mubidi ewu, nànsha nàнку mu musunya wànyì mèmè nèmmonè Nzambi." Butùmbi kùdì Nzambi's wè! Ncinyi. . . Ncyèna mumanyè cìndì ngamba to. Ditekemena kàayipu bwà muntu mukùlākàjì bu mèmè ewu's wè, pàndì mumanyè ne ndi mmòna cikondo cyànyì cyà nshìikidilu ciikàle

àbìdì àdì panshì aa, mwikàle ne bidimu makùmi àtaanu ne bisambòmbò.

179 Kacya ànu pàncìvwà mwànà mutekète menemene ndi mwimanè kaaba aka, nteeta bwà kukòbola Cyòci eci. Kàdi ndi mumanyè ne mu mémè emu, kamwènakù cintu cìmpè nànsha cìmwè cìndì naaci to, cintu nànsha cìmwè cìndì mwenze to, kàdi munda mwànyì mùdi bukolè bufùùlùludi abu's; bwàkamfùùlùlula ditùkù kampànda ku maalu a pa buloba, mémè nsongààlùmè, kuntùma ku Mwoyi wà Cyendèlèlèlè. Kaa, bintu biinè bìdì byenzèkè's wè! Ndi mumònemonè bikèèna-kumòna, mudyànjlè kwamba maalu. Kacya Yèyè kàtùkù mwanjì kulekela cintu nànsha cìmwè cipangila to ne mpindyewu. Nkààdi mwakùlekùle mu myakulu mikwàbò. Nkààdi mwambàmbè bipròfetà. Nkààdi mwenzènzè bintu abi ku Nyumà wa Nzambi ùvwa musòmbèle munda mwànyì awu. Ki bukolè bufùùlùludi mbwòbù abu. Ndi mumanyè ne dīngà ditùkù. . .

180 Mupikudi wanyì ùdi ne mwoyi patùdi twakulangana apa. Nènku dīngà ditùkù pààlwàYe, mifùbà eyi neyjuuke cyàkàbìdì, bwà kuya katwìlangana Nendè mu mpeepèlè. Nudi bafwànyìne kunjika mu mbù, kuyòòsha kushidisha, nànsha penyì pònsò panwàsà apu. Bukolè bufùùlùludi abu mbwà Cyendèlèlèlè. Yoyòyò! Ndi ngumvwa Paasàkà mpindyewu mene. Èyowà's, mukalenge. Ndi nendè kùkaadi bidimu. Ùdi munda mwànyì emu.

181 Ùdi munda mwèbè amu. Pìikalàbi ne, nwènù, Nyumà wàkabiìsha Yesù ku bafwè awu mmusòmbèle mu mibidi yènù yà cifwàkà ayi, M'Munùfùùlùlule ku maalu a pa buloba, munùtùme ku Dìyi dyà Nzambi nkààyaadi. M'Munùfùùlùlule ku mwoyi ewu munùtùme ku Mwoyi wà Cyendèlèlèlè. Nwènù bàvwa musangu kampànda bafwè mu mpèkaatù ne matomboka nudi mpindyewu bafùùlùlula pàmwè, bwà kusòmba mu myaba yà mu Dyulu pàmwè ne Kilistò Yesù, nucyònkòmokela pa Manà a ku Dyulu, numòna cianza cyà Nzambi cimwènèshìibwe, cijaadika mulayi wà ditùkù edi.

182 “Ànu mwàkadìbi mu matùkù à Noa, ki mwikalàbi kàbìdì ku dilwa dyà Mwànà wa muntu. Bàvwa bàdya, bànwà, bàsèlangana, bàsèleshangana. Ne bu mwàkadìbi mu matùkù à Lotà, ki mwikalàbi kàbìdì mu mèbà ikalà Mwànà wa muntu munkaci mwà kubuuludiiibwa pa buloba,” kàciyi Mwànà wa Nzambi to, aci kàbìdì to. “Mwànà wa muntu,” mwalùkile bu Mukenji wa cipròfetà bwà ditùkù dyà ndekeelu diikalà mukankù awu mwà kubùuka; kàyi nyama wa ntambwe to; kàyi ngombe mu cikondo cyà didifila to. Nwamònu anyi?

183 Musangu wònsò, bukolè kampànda bwà ntèndeleeleu bwàkapàtuka bwà kutwìlangana ne kadyòmbò kàà bukolè bwà cidiidi bwà bàà pa buloba. Pààkajuukà nyama wa ntambwe,

bukolè bwa ntèdeleelu abu, wàkaya bwà katwilangana ne bukolè bwà cyena-Loomo abu.

¹⁸⁴ Ne pashiishe pàakalwà dîbà dyà didifila, ngombe wàkaya, bwalu yèyè ngudi Nyama wa mulàmbù wa Mukalenge.

¹⁸⁵ Pashiishe kulwakù balongolodi, munda mwà bikondo byà èkèleeziyà, kulwakù mpàla wa muntu. Ne balongolodi bàvwaku kubangila ànu ku Luther, Wesley, kaa, Calvin, too ne kwînshi, kwînshi, ku cikondo cyà mpenta.

¹⁸⁶ Kàdi mu Mukenji wà ndekeelu wàkapàtukà awu, kulwakù mukankù wùdi wùbùuka. Ncikondo cyà mukankù, cikondo cyà kubuulula, Dìyì dyà Nzambi dimwèneshiibwe, Dìyì dyà Nzambi dijaadika. Kaa, bânà, bwelàayi mu dibàtiiza dyà Nyumà Mwimpè edi. Bwelàayi nùDítàbùùjè, ne mwoyi wènù wònsò, Nzambi neànùjè.

¹⁸⁷ Tàngilàayi kùneeku mpindyewu. Tudi tusangana mpindyewu, vùlukàayi ne: “Tudi musunya wà ku misunya Yèndè, ne mufùbà wà ku mifùbà Yèndè.” Ànu mwàkajuulà Nzambi mifùbà ne misunya Yèndè mu lukità amu, kabèèna mwà kusokokakù muntu udi ne makùmbanyina awu to. Lufù kalwèna mwà kumwangatakù to. Yesù wàkamba ne: “Bònsò bàdi Taatù muMpèeshe nebàlwe kùNdi. Nèmbàbiishè ku lufù ku ditùkù dyà ndekeelu.” Kaa, ekèlekèle! Paasàkà’s! Mòna’s, twètù’s tudi ànu mu Paasàkà mene. PàakabiikàYe ku lufù, twètù twàkabiika pàmwè Nendè. Yèyè kwaluja bukenji bwà bweena-cintu. Tudi bacikwàte, bu dibàtiiza dyà Nyumà Mwimpè. “Yèyè ùdi ne mwoyi kashidi ne kashidi; umwèumwè awu makèlèlèlè, leelù, too ne kashidi.” Ebèlù 13:8 udi ùjaadika cyôci aci. Yèyè ùdi umwèumwè awu.

¹⁸⁸ BaaMaasiyà Bèndè, beela maanyì abu bàdi biitabuuja aci. Maasiyà ncinyì? Maasiyà ncinyì? *Maasiyà* mbwena kwamba ne “Mweela maanyì.” Nènku mpindyewu piikalàbi ne Yèyè ùvwa Maasiyà awu, mu kwikala Mweela maanyì bwà ditùkù adi, bwà kuuja Dìyì dyà Nzambi, bwà kwiikala Mupikudi ne Mweela maanyì awu, ne Nzambi kubiishaYè mubidi awu ku lufù, Mukàj’Èndè-musèla kî Mwela maanyì bwà ditùkù edi, Ùkaadi mumanè kubiishiibwa pàmwè Nendè mu dibiikà dyà ku lufù, bwalu: “Bàbìdi aba bàdi Umwe.” Amen.

¹⁸⁹ Ndi—ndi njinga bwà ngaacyàmbakù mu mùshindù wùndi ncimòna. Ndi njinga ne bu ne mvwakù ne dilonga dyà kàlaasà’s nùnkù ndi mucyènzè naadi. Nwamònu anyì? Ndi—ndi ntèkemena ne nudi nucyümvwà. Ndi ntèkemena ne, Nzambi, Nyumà Mwimpè awu ùdi ùpweka mwaba awu ùcitèeka mu mwoyi wèbè, bwà kuumvwà cìndi njinga kwamba aci.

¹⁹⁰ Dibiikà dyà ku lufù, tudi mpindyewu mu dibiikà dyà ku lufù. Tudi basòmbe pàmwè Nendè mu dibiikà dyà lufù, kàdi ànu aba bàdi ne Mwoyi abu.

191 Kí ng'aba bàdì kabàyi ne Mwoyi to. Bòbò kabààkuCimanya nànsha. KabààdyàkuCimanyakù to. Nebàtungunukè ànu ne kudyàmbidila mùdìbo bàpeta Nyumà Mwîmpè, mùdìbo bàsùngidiibwa, kàdì bwalu bwà Dyambwibwa nebwikalè bumanè kujika ne bantu bayè. Yéyè's wàkamba ne: "Èliyà ùkaadi mumanè kulwa, ne bòbò bamanè kwenza nàнку, kàdì nwènù kanùvwa bacimanyè to." Nwamònu anyi?

192 Mònaayi. Lufù kalùtu lwimanyika bukolè bufùùlùludi bwà Nzambì abu to. Mònaayi. Lufù kalwèna mwà kubwìmanyikakù to.

193 Wèwè udi wamba ne: "Èè, wanyì mààmù's ùvwa mukàjì mule tètè ne Nyumà. Wanyì tààtù, kacya ncitukù mwanjì kumòna muntu muule tètè bu wanyì tààtù awu to. Kàdì's wàkafwà, Mwanèètù Branham." Cyà bushùwà. Aci kacyaàkiimanyikakù bukolè bufùùlùludi abu nànsha.

194 Mòsà's ùvwa ne bukolè bufùùlùludi abu. Nudi nwiitabuuja nàнку anyi? Kakùvwakù muntu bu yéyè awu pa buloba to, too ne ku Yesù. Bwalu yéyè kààkamòna ànu bìkèèná-kumòna nkààyaabi to, wàkaakula ne Nzambì mpàla ne mpàla.

195 Nànsha mene mupròfetà mukàjì awu, Miliyàmà, wàkeela dìyì dyèndè mpatà ditùkù kampànda. KwambaYè ne: "Wèwè kwèna ucìina Nzambì anyi? Twà musadidi Wanyì mushinga, Mòsà awu. Kakwènakù muntu pa buloba bu yéyè to, mu dībā edi. Kacya kì nkwanjì kwikalakù muntu nànsha umwe bu Mòsà to. Mémè ndi ngaakula ne Mòsà. Ncinyì cikaadiyekù mwambè, cìvwà kaciyi bulelèlè? Wamònu anyi? Mémè ndi ngaakula ne Mòsà. Wèwè kwèna ucìina Nzambì anyi? Kwambikù dìyì dibi bwà bwalu bwèndè to." Kàdì ànu mwaba awu kutuucikayè ne nsudi ne—ne kubangayè kupùnga ne lufù. Kààkashàala ne mwoyi ntàntà mule, pashìishe to. Mòsà wàkamusambidila.

196 Ne Mòsà wàkabànda ku mukùnà, mwikalè ne bidimu lukàmà ne makùmi àbìdì byà mudimu wà bwambi, anyì bidimu makùmi mwandamukùlù bya mudimu wà bwambi; bidimu lukàmà ne makùmi àbìdì byà mwoyi, kubàndayè ku mikùnà ne kufwàye, ne kujiikiibwayè mu cibandabanda amu. Kàdì bukolè bufùùlùludi abu bùvwa pambidi pèndè. Paanyimà pàà bidimu bitwe ku nkàmà mwandamukùlù, kì yéyè ewu, mwimàne pa Mukùnà wa Dikùdimuka dyà mpàla. Amen. Yéyè ùvwa nganyi? Ùvwa mubadiibwe mu dibìikà dyà ku lufù adì's. Bushùwà, ke cìvwaye. Ùvwa ne bukolè bufùùlùludi bwà Nzambì abu. S'ki yéyè ewu, mwimàne.

197 Tàngilàayi Yobò, Abraham, Izàkà, bansantu abu mu ditùkù dyà dibìikà dyà ku lufù adi, mu dindà dinène òvwa Yobò ne bakwàbò bònsò abu bamanyè ne òvwa mwà kulwa adi. Pèndè's, wàkamba ne: "Ndi mumanyè ne Mupikudi wanyì ùdi ne mwoyi," bidimu nkàmà ne nkàmà kumpàlā kwà Kilistò. Bìdì, mu bushùwà bwà bwalu ne, Mukàndà wà Yobò wàkafùndiibwa

kumpalà kwà wà Genèsè, mùdìbo bàmba, Mukàndà wùdì mutàmbe kwiikala wà kale mu Bible.

198 Kàdi mu mateeta àkapicilàye, ne ànu mutùdì twétù tupicilamù mpindyewu emu. Ne mukàjèndè mene, cintu civwà citàmbe kwiikala pabwìpì nendè menemene pa buloba apa, kwambayè ne: “Bwà cinyi kùyikù wela Nzambì mulawu ne kufwà nànsha kufwà?”

199 Yèyè ne: “Wèwè’s udi wakula bu mukàjì mukùtākàne. Mukalenge nguwu mufile, Mukalenge ngwangàci, Dìnà dyà Mukalenge dibèneshiibwè.”

200 Kàdi pashìshe pàakalwà Nyumà wa Nzambì pambidi pèndè, ne kubangayè kwamba cipròfetà, wàkamba ne: “Ndi mumanyè ne Mupikudi wanyì ùdi ne mwoyi, ne ku matùkù a ndekeelu Yèyè neimanè pa buloba apa. Nànsha misàndà yà mu dikòba mibùtùle mubidi wànyì, nànsha nànkù mu musunya wànyì mèmè nèmmonè Nzambì.” Ki kwenzayè mwaba bwà kudijiiikijayè. Kwambayè ne: “Netùsumbè citùpà cyà buloba eci.” Kusumbayè mwaba awu ne kudijiiikijayèmu.

201 Pashìshe, kulwakù muntu dyèndè Abraham. Èkèleeziyà wènda ùkola’s, wènda ùbànda. Abraham, èè, mpindyewu, yèyè ùvwa pèndè ne makùmbana à Nzambì, Mwoyi wà kashidi, wà Cyendèlèlèlè, bwalu Nzambì wàkamubiikila. Mpindyewu mònaayi. Pàakafwàye, anyì pàkafwà Sarah, yèyè wàkasumba katùpà kàà buloba mu Pàlèstinà amu, pabwìpì ne lukitá Iwà Yobò, ne wàkajiika Sarah. Abraham wàkafwà ne wàkajiikiibwa pèndè pàmwè ne Sarah. Abraham wàkalela—wàkalela Izàkà.

202 Ne Izàkà, pàakafwàye, wàkalààla pàmwè ne Abraham, ku katùpà kàà buloba kàmwèkàmwè aku. Mpindyewu, musangu awu, Izàkà wàkalela Yakòbò. . .

203 Yakòbò kufwàye, kule mu Èjiiipitù mwàmwa. Kàdi bu mùvwàye mupròfetà, mpindyewu, mwiikàle ne dikùmbana edi, bukolè bufùùlùludi ebu, kwambayè ne: “Kùnjiiki muneemu to, Yözefù. Lwà mwab’ewu, wèwè mwanàanyi mupròfetà. Tèeka cyanza cyèbè pa cikundükundù cyàkakòyobolá Nzambì eci. Dìcipè kùdì Nzambì wa mu Dyulu ne kwàkunjiika muneemu to.” Civwà mu muntu awu ncinyi? Èjiiipitù kàvwa ànu mwìmpè mùvwà mukwàbò mwaba kanà wònsò ewu bwà cinyi? Yèyè ùvwa mupròfetà. Ùvwa mumanyè mwaba wùvwà dibìikà dyà ku lufù adi ne cyà kwenzekela. Kadivwa mwà kwenzekela mu Èjiiipitù nànsha; divwa ne cyà kwenzekela mu Pàlèstinà. Kwambayè ne: “Tèeka cyanza cyèbè pa cikundükundù cyànyì cikòyòbòke eci, nènku ùdìcipè kùdì Nzambì ùntù mèmè mukwàcile mudimu awu. Wèwè udi mwanàanyi mupròfetà, ne, kwàkujiiika mifùbà yànyì muneemu emu nànsha. Ùngangàtè uye naanyi kwaka ukanjiike.”

204 Yözefù, yèyè pèndè, bu mùvwàye mupròfetà, kutèekayè byanza byèndè pa tatwèndè mukòyòbòke awu apu. Kwambayè

ne: “Ndi ndìcipa kùdì Nzambi wa Abraham, Izàkà, ne wa Yakòbò ne, ncyàkukujiika muneemu to.” Kumwangatabò è kuyabò kamujiika mu katùpà kàà buloba aku. Bwà cinyi? Bwà cinyi?

205 Pààkafwà Yözefù, kwambayè ne: “Kanùnjiikiku muneemu to. Kanùnjiikiku muneemu to.” Bwà cinyi? Nzambi ùdi Nzambi myaba yònsò, kàdi Ùdi ne ndongamu kampànda. Yözefù ùvwa mupròfetà. Kwambayè ne: “Dìngà ditùkù,” tèelejàayi, mèyi èndè, “Mukalenge Nzambi neànùkùmbùlè cyà-kàbid- . . . neànùkùmbùlè, ne neànùpàtùlè mu buloba ebu. Nènku panwàya apu, nwàngataayi mifùbà yànyì.”

206 Bukolè bufùùluludi abu bùvwa mu mifùbà ayi. Kaa! “Piikalàbi ne Nyumà wa Ewu wàkabiisha Kilistò ku bafwè awu, mmusòmbèlè munda mwènù, Yèyè neàfuulululè mibidi yènù yà cifwàkà ayi.”

207 “Kanùtèèki mifùbà yànyì muneemu nànsha. Nùkayijiikàayi pàmwè ne beena mulayi abu kuntu kwàka.”

208 Pààkalwà Yesù, pànwapa, meme ndi ne Mufùndu awu mwab’ewu, Maatàayi 27:51. Pààkabiikà Yesù ku bafwè, Yòbò ùvwa mumòne dilwa dyà cyòci aci, kwambayè ne: “Ndi mumanyè ne Mupikudi wanyì ùdi ne mwoyi. Mu matùkù a ndekeelu, Yèyè neimanè pa buloba ebu. Nànsha misàndà yà mu dikòbà mibùtùlè mubidi ewu, nànsha nànku mu musunya wànyì mèmè nèmmonè Nzambi. NèmMumòne.” Bàvwa bamanyè. Awu ùvwa mmupròfetà. Abraham ùvwa mupròfetà. Izàkà ùvwa mupròfetà. Yakòbò ùvwa mupròfetà. Yözefù ùvwa mupròfetà. Ne bòbò bàvwa ne dibuulula dyà kùdì Nzambi, bilondèshile Dìyi Dyèndè. Nènku mu dindà adi dyà Paasàkà, pààkalwà Yèyè awu ne kupikula bònsò bàvwa baMwitàbùùje abu, bòbò pààbò, bààkabiika ku lufù, bilondèshile Bible.

209 Bukolè bufùùluludi abu bwàkabwela mu lukità lwà Yobò, mùvwà kamùciyi mushààle nànsha nkutu umwèpelè wa lupwishi lwà mifùbà yèndè to. Paanyimà pàà nkàmà, ne nkàmà, ne nkàmà yònsò yà bidimu ayi, mifùbà yèndè’s yikaavwa mimungùtùke. Kwa—kwalukilabi, ne kushààlabi ànu maagàzè a ku buloba, ne ànu butù bwètù ebu bùsanganyibwa muntwamu. Kàdi, nànsha nànku, pavwa bukole bufùùluludi abu, bilondèshile Dìyi dyà Nzambi, bilondèshile mulayi, nkàmà ne nkàmà, èyowà’s, binunu byà bidimu paanyimà, pààkadyàta bukole bufùùluludi abu mu lukità amu; Yobò, Abraham, Izàkà, Yakòbò, bònsò abu, bààpàtuka mu lukità pàmwè Nèndè.

210 Ki mùdì Bible mwambè. Maatàayi Munsantu, nshapità wa 27 ku mvensà wa 51, mmwambè ne: “Bansantu bààbùngì bàvwà balààle mu lupwishi lwà buloba abu, bààkabiika ku lufù ne bààkapàtuka mu nkità pàmwè Nèndè, pààkajuukàYe mu dindà dyà Paasàkà adi.” Bwà cinyi? Bàvwa ne dikùmbana adi. Bàvwa ne bukole bufùùluludi abu, nwamònu’s, ne bààkabiika ku bafwè, ne bààkabwela pàmwè Nèndè mu dibiikà dyà ku

lufù. Bàakasànkila dibìikà dyà ku lufù adi pàmwè Nendè, bwalu bàvwa búle téntè ne bukolè bufùùlùludi abu. Bàvwa ne citampi cishùwashùwàlè cyà Paasàkà aci.

“Èè,” mùdi wamba, “bu ngíkalapu ne mwoyi mu Dipungila Dikùlukùlu amu’s.”

²¹¹ Anjì indilàbi kakesè. Mu Tesàlo-...wa Kumpàla, Tesàlonikà, nshapità mwi4, mvensà wa 16, ndi muswè bwà nùbalèku cyôci aci. “Ncyèna muswè, nwènù bàna bèètù, bwà nùpangè kumanya pa bìdi bitàngilà aba bàdi balààle tulù to, bwà kanwikadi mu tunyinganyinga, byenzè ànu mùdi bakwàbò bàdi kabàyi ne ditèkemena. Bwalu patwikalà twitabuuja ne Yesù wàkafwà, ne wàkabiika ku lufù mu ditùkù diisàtù,” katùyi twitabuuja byà budingìbudingì to, kàdi tucitabuuja ne, “nànsha nànkù aba bàdi balààle munda Mwèndè Nzambi neàlwe naabò pàmwè Nendè.”

²¹² Bansantu bàà Dipungila Dipyadipyà biikàle ne bukolè bufùùlùludi abu, nebàbiikè pààbò ku lufù, ku Dilwa Dyèndè dyà cyàkàbìdi; byà cyà bushùwà ànu mùvwà bansantu bàà Dipungila Dikùlukùlu bàvwà ne bukolè bufùùlùludi bwònsò abu pa mifubà yàbò abu, ne ditentemunyiibwa ne makolè, ne bikwàbò, bìvwà bileejiiibwe kùdi Nzambi. Bapròfeta bàvwà Dìyi dyà Nzambi dilwa kùdìbo abu, bààkajuuka pàmwè Nendè ku lufù mu dindà dyà dibìikà dyà ku lufù adi; ne biikale ne mulayi wà Nzambi ne ewu yònsò udi mu Kilistò Yesù neàlwe kàbìdi pàmwè Nendè mu dibìikà Dyèndè dyà ku lufù, bukolè bufùùlùludi bwà Nzambi bwiikàle pa mifubà ayi.

²¹³ Kabyèna bikèmesha to, mutùdi tutentekela babèèdi byanza. Kabyèna bikèmesha to, mutùdi banangàngàne muntu ne mukwèndè. Tudi bàna bàà muntu balùme ne bakàji. Kabìvwa bikèngela bwà twètù kukinangana muntu ne mukwèndè to bwalu bàdi bàtùlongolola kùdi Dìyi dyà Nzambi. Bìvwa bikèngela twètù kwiikala banangàngàne muntu ne mukwèndè, ne kwiikala ne kaneemu muntu kùdi mukwèndè. Nudi bamanyè’s, nwènù kanùyi nwenza nànkù to, kacyàkunwàmbulwishakù to.

²¹⁴ Kùdi mulùmyànà mukesè musòmbe mwab’ewu, udi, mu èkèleeziyà emu mpindyewu. Kùkaadi tuumatùkù. . . Muntu awu ùdi wítabuuja. Nsongàalumè mukesè ùvwa ne kànsèrè ku dici dyèndè, kàdi kàyi mwà kubùtèèjakù to. Ùvwa ùkwàta mudimu kumbèlù kwàka. Mvwa muyè nendè mu lwendu lwà dilemba dyà nyama, kuntu kwàka pàmwè ne bàna bèètù ba-Moseley, ne Mwanèètù Dawson ewu. Tuvwa balwè muneemu bwà kulemba nyama, ne mwànà wa balùme wa Mwanèètù William. Ki kwenzekabi ne ntangilè ku dici dyèndè aku, ne mèmè kumòna dici dyèndè dyùle dyònsò, ki mèmè kwamba ne: “Mbwalu kaayi abu, Donavon? Dici adi’s!”

215 Yèyè ne: “Mwanèètù Branham, s’cikaadi cyenzè ntàntà mule. Ncyèna mumanyè to.”

216 Mémè kumukwàta ànu—ànu ku cyanza mwaba awu. Kàvwa nkànsèrè kanène ku dici dyèndè aku. Ncyàkambakù díyì to; mushààle ànu mucilamè, ki mémè kudyàmbila ne: “Mwanèètù wanyì!” Mu ditùkù dímwè anyì àbìdì paanyimà pàà cyòcì aci, kakùvwa kushààlekù nànsha kaacibangu kààci to. Cívwa nkaneemu kàvwayè naakù kùdì Nzambì wa mu Dyulu, ku bukolè Bwèndè bufùùlùludi, mushebèye kànsèrè aku ne mulamè mwoyi wà Donavon Weerts kuntwaku. Ncyà bushùwà.

217 Bintu ebi mbinganyi? Tàngilàayi mùneemu emu, nwènu bantu bàà mùneemu mu Phoenix emu. Tàngilàayi nwènu bàdì biitàbùje cyòcì eci abu. Tàngilàayi bàdì ne cyòcì eci, bàdì bānūtentekelà byanza abu. Tàngilàayi nūmonè cidì cyènzekà. S’mbukolè bufùùlùludi abu. “Bimanyinu ebi nebifilè aba bàdì biitàbuujà.” Bòbò batentèkèle babèèdì byanza, bukolè bufùùlùludi abu, mukankù kùdì mukankù, cintu kampànda necyènzekè. Mpindyewu, mukankù kùdì kabangu-nyuunyi, kabyàkukùmbanakù to. Mukankù kùdì mukankù, wùdì wùjuuka wùmuka mu lupangu lwà nzòòlo amu, wùya mu Maulu. “Bimanyinu ebi nebifilè aba bàdì biitàbuujà,” pādibu bōnsò bābìdì mu diitàbuuja.

218 Mònaayi bukolè bufùùlùludi bùmwebùmwebè bwà Nzambì abu buleejiibwe mu baprófeta bābìdì aba, Eliyà ne Elishà. Mònaayi, mwakù wùmwebùmwebè awu’s; wùmwebè wà ku yòyì wùdì *kwangata muulu*, mukwàbò wùdì *mwangàciibwe muulu*. *Kwangata muulu* ne *mwangàciibwe muulu*. Nwamònu anyì? Wàkangaciibwa muulu. Twètù netwàngaciibwè muulu; bangàciibwe muulu pàmwè naabò, tukatwilangana naabò mu mpeepèlè. “Bangàciibwe muulu bwà katwilangana naabò mu mpeepèlè.”

219 Mònaayi, bikèngela bwà nyuunyi ikalè ne mapwàpwà àbìdì, bwà kutuutayè milèlè. Ncyà bushùwà anyì? Eliyà ùvwa ndipwàpwà dyà ditentemunyiibwa, Eliyà. Elishà ùvwa dipwàpwà dyà dibìkà dyà ku lufù. Nwamònu anyì? Bùbìdì bwàbò, pàmwè, biikàlè bàleeja bansantu bàdì ne mwoyi ne bansantu bàdì bafwè.

220 Vùlukàayi ne, bafùùlùlùdiibwe bwà kumòna byà kale, maaridò awu. Mùvwà bantu aba bafùùlùlùdiibwe kale wàwa bwà kumònabò paanyimà pàà ridò ne kumòna kwìnshì mu eci cikondo; baprófeta abu’s!

221 Tàngilàayi Pòlò, mwambè mùvwà bantu aba mwà kwikala mu matùkù a ndekeelu, bènza maalu kàdì bàdìbìkila mùdìbo beena Kilistò. Yèyè ùvwa muprófeta, mùle tètè ne bukolè bufùùlùludi, kudyànjayè kucimòna cyènzeka. Twètù tudi twitàbuuja nānku, kí mmwòmò anyì? Ùvwa mupetè bukolè bufùùlùludi.

222 Tàngilàayi bukolè bufùùlùludi leelù ewu, budyànjila kwamba maalu, kakùyikù bwalu nànsha bùmwe bupangila to. Kaciyi cipangilakù musangu nànsha wùmwe to. Bukolè bufùùlùludi; kabùyi bukolè bwà muntu to; bukolè bwà Nzambi. Bukolè, bukenji bwà bweena-cintu bwà Paasàkà, Yesù mubiike ku lufù udi mutùme bukenji bwà bweena-cintu ewu, bwà kutùjaadikila ne tukàadi bafùùlùlùdiibwe pàmwe Nendè.

223 Mònaayi, nudi bavùlùke mukàndà wà kaabwalu kakesè aku, nwènù Beena Kantu-ku-byanza aba, kàà *Kutàngila Dyàmwàmwà Dyà Ridó Wa Cikondo* aku anyi?

224 Ne mèmè nkàadi ngenda nkùlakaja, mumanyè ne matùkù àanyi àkaadi ènda ipidika, ne ngenda ndwa menemene. . . Ndi ngimba kaamusambu kakesè kimbibu kùdi bainàbànzà abu katanci aka aku, ndi naakò kùkaadi bidimu bitwe ku dikùmi ne mwandamukùlù, anyi makùmi àbìdì mpindyewu ne: *Ndi Muswè Kuyiikilangana Pa Bwalu Abu, Mukalenge*, pashiishe mpàtuka kuntwaku nya kasambila, dībà adi bukolè bufùùlùludi abu bülwa, mèmè mwikishekù, ne mèmè kutàngila muulu Mwàmwa, kwamba ne: “Tàngilà kwàka nàka’s!”

225 Ndi mvùluka mu dindà adi, mwikàle mwambwibwe. Nènkù mukàjàanyi, musòmbe mwab’awu, mulàale pa bulàalù bùmwe naanyi mu dindà adi. Mvwa mujuudiibwè kuulu, ke mèmè kutàngila muulu. Nènkù ki yéyè wàwa, mulàale tulù. Mèmè kwamba ne: “Byòbì ne ndi ne cyà kwenzakù cintu kampàndà bwà Mukalenge, bikèngela kukolesha’s, mulùmynà. S’ukàadi mumanè kupita pa bidimu makùmi àtaanu.” Dībà adi ki Nyumà Mwimpè kungambula, ne mèmè kutàngila lwà Kwàka nàka. Mèmè kumòna bansantu abu, cyà bushùwà ànu mùndì mwimàne ku cyambilu eku emu, ne Mukàndà munsantu ewu mutèeka kaaba aka, ne mwikàle mwambi wa Èvànjeeliyò.

226 Kacya nkàadikù munwàmbile cintu kampànda mu Dìna dyà Mukalenge citù kaciyi cyenzèke anyi? Ní cikaadi cipangè kwenzeka, ndi muswe nùcingambilaayi. Musangu wònsò, citu ànu mu cyòcì menemene, ku cyambilu eku anyi? Musangu wònsò, citu cyenzèke menemene ànu mùtùYe mucyàmbè ànyi? Eci cìvwa ng’EMU MMÙDÌ MUKALENGE WÀMBA.

227 Mèmè kwimana mwab’awu, kutàngila cikondo aci. Mèmè kumòna binunu kuvudija ku binunu byà bantu bälwa, nsongàalùmè ne nsongàakàji, lubilu, bàngela mabòkò kunshingù, bèèla mbilà mikolè. Ntàngila paanyimà ndimòna mèmè mwiinè mulàale pa bulàalù. “Èyi Mukalenge, lekela ntangilèku dyàmwàmwà dyà ridó wa cikondo.”

228 Ncinyi aci? S’ki bukolè bufùùlùludi bwàtwàmbulà mbwòbù abu. Bukolè bufùùlùludi bunène abu’s. Bukolè bufùùlùludi mbulwè mu matùkù à ndekeelu aa.

229 Bwà cyòcì aci ki bündì nsanganyiibwa mu Arizona, mpindyewu mene. Kùdi bantu bàabúngì basòmbe kaaba aka

mene, bàvwà biimàne mu Phoenix emu mene, ne bumywè mèmè nnwambila mu cyambilu eci mene ne: “EMU MMÙDÌ MUKALENGE WÀMBA.” Mbanganyì bàdì bacivùlùke? “Mpindyewu ndàaku. Cintu kampànda cìdi pabwìpì ne kwenzeka.”

²³⁰ Mèmè kumòna Banjèlo mwandamutekètè bàlwa. Cìkàndàkànda cyà *Life* kì ncicipàtùle, pàvwà dibungì dyàCì dilembèlèlè mùneemu mwònsò emu, mu butùmbùkè bwà kilòmèètà makùmi ànaayi ne yìsàtù, ne bucyàmà bwà kilòmèètà makùmi ànaayi ne mwandamukùlù anyì? Fred Sothmann, ne bakwàbò aba, Gene Norman, bóbò abu, kì mbàdì basòmbe paanyimà pàpa bààba anyì? Bàvwà biimàne mwaba awu mene pàvwà Banjèlò mwandamutekètè abu bamwènèke pa kakùnà apu mene. Cyòci kunyùkusha tukùnà atu, mu ntàntà wa maakilòmèètà mu nyùngulukilu amu, mùshindù awu. Kì Banjèlò mwandamutekètè kwimanabò mwaba awu. Ne kukùpabò mwelè wà mvità mu cyanza cyèbè, kwamba ne: “Alùkilà kwèbè kumbèlù ùkangulè Bitampì Mwandamutekètè bìdì bifidìibwe ebi.” S’kì byòbì ebi, bwalu-busokoka bulelèlè bwà dibàkà ne difwà dyà dibàkà, ne dimiinu dyà nyòka, ne bintu byònsò ebi bìkaadìbo bakòkangànànganepù ebi. Bìdì ng’EMU MMÙDÌ MUKALENGE WÀMBA.

²³¹ Ncinyì aci? Bukolè bufùùlùludi bwènda bùlwa kùdì Èkèleeziyà, buMulongolola, dìbà ditùdì twènda tuseemena edi. Bukolè bufùùlùludi!

Éyi Nzambì, twàmbùlwishèku bwà twaCyàkidila. Twàmbùlwishèku bwà twaCìitabuuja.

²³² Nwamònu’s, mbilondèshìle ànu ku lwidì lùdì wangata bwàCì, anyì neCìikalè ne dikwàcìsha kampànda kùdì, anyì to, nànsha nànku. Nwamònu anyì? Bikèngela wìtabuuje Cyòci aci. Wèwè kùyi uCìitabuuja to, kaCyàkwiikala ne dikwàcìsha kùdì nànsha dyà kànà to.

²³³ Mwàkiimana Samwèlè wa kale kumpàlà kwà bantu abu, e kwambayè ne: “Kacya nkààtukù munwàmbìle cintu kampànda mu Dìnà dyà Mukalenge cìtù kaciyikù cyenzèke anyì? Nkààdikù munùlòmbe mfrangà yènù bu kàa pa luse, bwà mèmè kudyà anyì?”

“To, kàdì mfùmù awu ngutùdì tukèba, nànsha bìshì.”

²³⁴ Mùshindù awu kì wùdì èkèleeziyà leelù ewu. Bàdì bàkèba mmwènenu yàbò bóbò yà sungasunga. Kì mbaswè kutèya ntèmà kùdì nànsha mikesè to. Bàdì bànyùnguluka ànu bu bàdì ku mwìshì. Èè, bìdì bìleeja ànu ne, bukolè bufùùlùludi mbùdì kabùyikù to.

²³⁵ “Kaa,” mùdì wamba, “èè, mèmè’s nkààdi mwakùle mu myakulu. S’nkààdikù mutùpìke mwelè ne mbilà.” Abi bìdì ànu bìmpè byònsò.

236 Kàdi bukolè bufuùlùludi abu bwôbù bwikàlekù, wèwè's neùjingululè. Bu kaamukankù kakesè aku; ki wakù maman nyèyè awu. Ki Dîyì ndyôdì adi. Aci's ng'EMU MMÛDÌ MUKALENGÈ WÀMBA. Aci neitù Nzambì mulayè. Ki cyàkadyànjlà kwambiibwa. Ki cidi cyenzèke menemene ncyôci aci. Tudi bayè kule kutàmba menemene ne mpatà kanà yònsò, mu mùshindù mushàadile mu dibìikà dyà ku lufù mpindyewu mene, bansantu munkaci mwà kudìlongolola bwà kwangaciibwa muulu mu mpeepèlè.

237 Pa nàнку, Yesù, mule tètè menemene ne bukolè bufuùlùludi ebu, wàkamba ne: “Nwènu mwà kushimbula ntempèlu ewu, utu munwàngate bidimu makumi ànaayi ewu, munùdì nudyàmbidila, bwà kumwibaka, Mèmè nèmмуjuulè mu matùkù àsàtù.”

238 Bwà cinyì? Yesù ùvwa mwà kwamba nàнку bwà cinyì? Ndi muswè kunùkonka. Yesù ùvwa mufwànyine kwamba cintu bu nàнку bwà cinyì? Ùvwa mumanyè CìvwàYe. Amen. Ndì njingakù bwà ngènta aci bwà kukwàtaci. Ùvwa mumanyè ne Yèyè ùvwa Nganyi. Ùvwa mumanyè aci, Dîyì ne Dîyì dyònsò, divwà Nzambì mufunde Mwómò amu bwà bwalu Bwèndè, Yèyè wàkacyùja. Ùvwa mumanyè ne Yèyè ki uvwa Davidì mwambè awu's.

239 Nudikù bamanyè ne nwènu mbàdì Bible wàmba aba anyì? Wèwè udi mumanyè ne kaaba kèèbè mmu Kilistò anyì? Pawikalà munda mwà Kilistò, udi cifùkùibwà cipyacipyà. Udikù mumanyè ne Dîyì edi didì ànu mùdì nsòmbelu wa ku ditùkù ne ku ditùkù ewu, bwèbè wèwè anyì? Mòna's, ncyà bushùwà. N'Dyèbè wèwè. Wèwè udi mukankù. Ki Cyàkudyà cyèbè ncyôci aci.

240 Yèyè ùvwa mumanyè ne, ku bukolè bwà Nzambì, Ùvwa mwà kucyènza, bwalu bikaavwa byamba mu cipròfetà ne Yèyè ùvwa mwà kucyènza. Ki bwà cinyì Kààkaciina bwà kwamba ne: “Shimbùlaayi ntempèlu ewu. Mèmè nèmмуjuulè mu matùkù àsàtù nànsha, bwalu Davidì wàkamba ne: ‘Ncyàkulekela musùkà Wèndè mu ifernò, anyì Ncyàkutwàla bwà Wa Cijila Wanyì àmonè dibola nànsha.’” Ùvwa mumanyè ne kabùlù kàà mashi nànsha kàmwè kàà mu mubidi Wèndè kakàvwa mwà kubola to. Kàdi mubidi pààwù wùtu wùbola mu mèbà makùmì mwandamutekètè ne àbidì. KwambaYè ne: “Shimbùlaayi ntempèlu ewu. Mèmè nèmмуjuulè, mu matùkù àsàtù awu.” Bwà cinyì? Ùvwa mùle tètè ne bukolè bufuùlùludi bùvwà bufuùlùlulè Dîyì dyònsò abu. Wàkatàngila paanyimà ne kumòna Dîyì dyònsò dyàkafundà Nzambì bwà bwalu Bwèndè, ne mupròfetà mwambè ne Yèyè wàkadyùja. Ùvwa mumanyè ne, cìvwa pààci mwà kuujiibwa.

241 Mpindyewu, Dîyì dyònsò ditùku Nzambì mwambè, didì dyènza ne nyumà webè àmbè “amen” ku Dyòdì adi, nDyujùibwe mu nsòmbelu webè, wèwè bu mwena kwiitabuuja anyì?

242 Wêwè udi ne mwoyi mukwàcidile pa cintu kampànda, wamba ne: “Èè, wanyi èkèleeziyà ùdi ùlongesha bishiilàngàne anyi?” Dìbà adi, wadimuka, wêwè kabemba.

243 Mònaayi. Mikankù yôyi yidi yitabuuja. Kakwènakù mpatà to, bwàyì yôyi. Yidi yìCiitabuuja. Mònaayi.

244 Mpindyewu, Yèyè ùvwa mumanyè ne cìvwa mwà kwenzeka bwalu Dìyi òvwa dyambè ne cìvwa n’Cyôci. Ne Dìyi dyònsò difunda bwà bwalu Bwèndè bìvwa bikèngela dyùlè. Yèyè ùvwa mumanyè ne Dyàkafùndiibwa ku bukolè bwà Nzambì, kùdi baprófeta bàà cijila bàvwa bambè biprofeta ne Yèyè ùvwa mwà kwenza nàнку.

245 Ne ciprófeta kacitukù cipangila to. Kacyèna mwà kupangila to. Dìyi dyà Nzambì kadyèna mwà kupangila to. Ne mbifùndiibwe mu. . .kùdi Nyumà ne. . .Nènku kàbìdi, mpindyewu, Nyumà wàkabiisha Yesù ku bafwè awu, Yèyè musombèle mu buumuntù bwèbè, mu mubidi wèbè, Yèyè neàfùlùlùlè kàbìdi mubidi wèbè wà cifwàkà awu. Dìbà adi, uwàsè cingoma, ùwòshè mu mudilu, ùwènzèlè cyònsò cyùdi muswè, ùwélùlwilè, ùwùsùnsùlè, ùwùdyombòlè, wènzè cyùdi muswè kwenza aci. Nzambì neàwùjuulè, bwalu mMwambè ne Yèyè neàwùjuulè. Ne munsantu yònsò wa Nzambì ùdi ne mulayi awu munda mwèndè, mmumanyè ne aci m’Bulelèlà. Pa nàнку, kùciinyikù to, wèwè mwanèètù, tukàadi mu Paasàkà awu.

246 Tàngilàayi mpindyewu ku dishintuluka dyà mpàla aku, ànu kumpàlà kwà twètù kujikija. Kushintuluka mpàla, dishintuluka dyà mpàla, tudì bònsò baleejiiibwe mu dishintuluka dyà mpàla amu. Tàngilàayi bitùdi munkaci mwà kumòna leelù ewu. Mònaayi ànu bitùdi munkaci mwà kumòna leelù ewu ebi, bukolè bufùlùlùludi bwà Nzambì. Tuvwa twètù bònsò mwómò amu. Mùvwa bansantu bafwè, baleejiiibwe mu Mòsà; mùvwa dibìshiibwa dyà ku lufù; ne Yesù Kilistò mutùmbishiibwe. Elishà. . .Mòsà, Eliyà, ne Yesù, biimàne bònsò pa mukùnà apu; bansantu bafwè, bansantu bambwibwe; ne Yesù mutùmbishiibwe. Kaa, ekèlekèle!

247 Èè, wèwè udi wamba. . .Ngümvù muntu wàmba. Nebàmbè ne: “Nwènu bantu, mòna’s, bu ne nuvwakù ne bukolè bwà mùshindù ewu ebu, s’bivwa bikèngela nwènu kupàtuka kuya kambilangana binùdi mwà kwenza.” Bwà mweena Kilistò mulelèlà aci cyàyiila ànu kule, kwamba kwà cintu bu nàнку awu aku. Nwamònu anyi? Cyà bushùwà, twètù katwèna twamba mutùdi ne bukolè nànsha. Bwà. . .

248 Kàdi tudì twenza cintu cimwèpelè. Pààkakènzakanàbo, biikàle ne bukolè bwònsò ebu pambidi pààbò: “Bààkamòna Yesù nkàayèndè.” Ne mweena Kilistò wa cyà bushùwà, mulelèlà kèna ùcyùka byà ditwà dingumba nyama ku mikòlò abi, anyi cintu nànsha cimwè pa bwalu abu to. Yèyè ùdi ùkèba cintu ànu cimwèpelè, bwà wèwè kumòna Kilistò mutùmbishiibwe awu, ki

cìdì cìflakù dishiilangana. Dilabula dyà cyà bushùwà, dilelèlè dyà ku Mukùnà wà Dishintuluka dyà mpàla didi ditumbisha ànu Yesù Kilstò. Kadyàkatumbisha Mòsà, kadyàkatumbisha Eliyà, kadyàkabàtumbisha bôbò biinè, kadyàkatumbisha cintu cikwàbò nànsha cimwè to, kàdi bôbò bàakamòna Kilstò mutumbishiibwe awu. Nènku mweena Kilstò mulelèlè kanà yònsò ewu, aci ke cìdì munda mwà mwoyi wèndè, bwà kutumbisha Yesù Kilstò. Aci ki cidiye ùteeta kufikisha bantu ku dimòna.

249 Kàyì wàmba ne: “Èè, bu wèwè mwà kulwa bwà kushààla wa mu bisumbù byètù, bu wèwè mwà kulwa bwà kwenza *cikampànda* anyi kwenza *cikansanga* to.” Kaa, kwènjikù nànkù to. Kwènjikù nànkù to.

250 Mòna wèwè Dìyì dyà Nzambì, didi Kilstò, mutumbishiibwe; ne ùùja mulayi wà ditùkù edi, mu dîbà edi dinène dyà dibìikà dyà ku lufù. Mònaayi. Ne cìdì cìbàpèèsha disànka, dyà kumanya ne tudi Nendè, musunya wà ku misunya Yèndè, ne mufùbà wà ku mifùbà Yèndè. Disànka kaayi’s wè! Ki cintu cimwèpelè cìdì mweena Kilstò mulelèlè ùcyùka ncyòci aci.

251 Kèna ùcyùka dìngumba to. Kèna ùcyùka bulongolodi to. Kèna ùcyùka bìdì bakwàbò bakàjì bèèlela meeji to. Kèna ùcyùka abi to. Ncyà bushùwà. Kabàakwenza bintu ebi bìdì. . . bakwàbò bakàjì aba bènza to. Bôbò. . .Bantu balùme aba kabàakwenza bintu abi to. Bôbò kabàakujàngulukila anyi kwengeleka bulongolodi kampànda, bwà kubènga kwipaciibwa, ne baciina ne nkwèpi kwàlwàbo kujimija kwàbò kùdìbo bàdiila. Kabèna bôbò bacyùka bintu abi to. Ndukutukutu bwàbò bôbò.

252 Kùdi dijinga ànu òmwèpelè mu mwoyi, ndyà ne, kumòna Yesù Kilstò mutumbishiibwe. Byàbò byenzedi bìdì ne cyà kwiikala ne Nzambì. Kakùyì mpatà to, kacỳèna ne cyà kwiikala cìngà cintu to, kàdi ànu butumbì bwà Yesù Kilstò. Ne Yesù ùdi cinyi? Dìyì adi. Mmwòmò anyi? Mpindyewu, mònaayi, pa kumòna ngenzèlù Wendè umwèumwè mushindika awu, ùleeja patòòke dibìikà Dyèndè dyà ku lufù. Mpindyewu ncinyi aci? Pa kumòna nsòmbeluwèwè, ku Dìyì Dyèndè dilaya dyàkambàYe adi ne: “Yèyè ùdi umwèumwè awu makèèlèlè, leelù, too ne kashidi,” ùleeja patòòke ne Yèyè ùcìdì ànu ne mwoyi.

253 Nànsha byòbì ne ciibi cyònsò mu ditùnga ncinkàngila. Mu mùshindu wà ne, ndi. . .Mùngàmbì ne, ngaakàjì bidimu makùmi àtaanu ne bisambòmbò, ditùkù adi. Ndi mufwànyine kuumushiibwa. Nkààdi mu bidimu byà disaamà dyà mwoyi. Nkààdi mu cikondo cyònsò cikwabo eci, ne bikwàbò byònsò. Èè, dishiilangana didi penyì? Kabìvwa byènza dishiilangana to pàmvwà mwànà apu. Kabyèna ne cidibi bishiintulula mpindyewu to, bwà dîbà dyàbìikidiibwà wanyì nombà, ne dyàpàtudiibwà kartà kàanyi mu cibumbù. Nànsha bôbò kacya kabàyikù bamanyè ne mèmè ntukù kacya pa buloba apa

to. Kabyèna ne cidibi bishiintulula kùndi nànsha. Kabyèna bikèngela bwà kwikala ne bimpingù binène ne nzùbu minène bwà kwamba ne mwawa pa buloba apa to.

²⁵⁴ Cintu ànu cìmwèpelè cìndiku muswè bwà kumanyabò, kumanya ne “Yesù Kilistò ùdi umwèumwè awu makèèlèlè, leelù, too ne kashidi.” Ne mu mwoyi wànyì ndi mulamè bukenji Bwèndè bwà bwena-cintu. Ne ndi mumanyè ne dīngà ditùkù . . . Nànsha byòbi ne, ndi mwà kufwila mu màyi a mbù. Ndi mwà kushebeyiibwa mu Àfrikè. Ncyèna mumanyè cyàngenzekelà to. Kàdi cintu cìmwèpelè cìndi mumanyè ncyà ne, ndi mulamè bukenji bwà bweena-cintu. Alèluuyàh! Ciibi cyònsò cìdi mwà kwikala cikànga. Aci kacýèna cishiintulula kantu nànsha kakesè kùndi mèmè to. Ncyèna nteeta bwà kutùmbisha muntu kampànda anyi bulongolodi kampànda, anyi mèmè mwinè, anyi nànsha cìmwè cyà ku bisùmbù abi, nànsha cintu cikwàbò nànsha cìmwè to. Ndi muswè bwà bantu bàmonè ne Yesù Kilistò mmubiike ku bafwè, ne Nyumà Wendè ùdi ne mwoyi. “Yèyè ùdi umwèumwè awu makèèlèlè, leelù, too ne kashidi.”

²⁵⁵ Kabyèna bikèmeshà to, Yesù wàkambà ne: “Kùcìinyi nànsha. Ndi Ewu uvwa mufwè, kàdi Ndi ne mwoyi kashidi ne kashidi.”

²⁵⁶ “Bwalu mpindyewu tudi bapikùdiibwe kùdiYe, ne babiishiibwe ku lufù kùdiYe, ne tudi mpindyewu (kí nnè netwikalè to) basòmbe mu myaba yà mu Dyulu munda Mwèndè.” Mpindyewu, patùdi ne Nyumà ewu munda mwètù, bukenji bwà bweena-cintu abu, bidi bileeja ne mpatà yònsò mmyumusha. Cinyi? Kilistò ùdi ne mwoyi. Kabiya ne *mèmè* ngudi ne mwoyi to; kí *mmèmè* to. “Kilistò ngudi ne mwoyi munda mwànyì.” Kí nnè *wèwè* ngudi ne mwoyi to, kàdi Kilistò ngudi ne mwoyi munda mwèbè; bwalu Dìyi Dyèndè didi ne mwoyi didi ne mwoyi munda mwèbè, bileeja ne bilumbù byònsò byà mmwènenù yènu yònsò yà ba-Méthodistes, ne ba-Baptistes, ne mmwènenù yà beena Mpenta, ne bikwàbò byònsò abi, mbyumusha. Nènku Yesù Kilistò . . .

²⁵⁷ Mùvwàbi pa Mukùnà wà Dikùdimuka dyà mpàla, byà baprófeta ne bikwàbò byònsò abi byàjiki. Matùkù ónsò à ba-Luthériens, ba-Méthodistes, ba-Presbytériens ónsò awu, ónsò awu àdi ànu bímpè, kàdi: “Ewu m’Mwan’Àànyì munanga. Mutèèlèjaayi Yèyè,” Dìyi dyà díbà edi, díbà dyà Bitampì. Didi ne, maalu-masokoka ónsò a kale wàwa awu, àvwà masokoka bidimu byònsò ebi awu, ne ówò awu àdi . . . Cipaapu cinènè cyà musàkà cyà cikondo aci cívwa cyumusha, dibwe dyà mùsongà, dicívwiya cinoona mu mùshindù wà ne Mùtootò wà Davìdi newùbwejiibwè mu mwaba wàWù. Ne Èkèleeziyà munènè wa Nzambì udi ne mwoyi neàtuntumunyibwè byenzè bu mapwàpwà à mukankù, bàya nendè mwambula too ne mu Butùmbi. Èyowà.

²⁵⁸ Munda mpindyewu, munda mpindyewu, mu mibidi yètù: ne dyakùla dyà mu myakulu mipyamipyà; ne dyamba dyà

bipròfetà, ne didyànjila kumònà dyà maalu; ditentekela dyà babèèdi byanza, ne bôbò bàsàngala; maalu à pa buloba, mafwè, ne bintu byônsò byà pa buloba abi. Tudi buumùke ku lufù bayè ku Mwoyi, ne mpindyewu tudi balamè bukòlè abu. Àlèluuyàh!

Mu dindà dyà dibìikà dyà ku lufù adi,
Pàakòshiibwà bitampì byà lufù apu,
Netùbiikè ku lufù, (Àlèluuyàh!) netùbiikè ku
lufù. (Amen!)

²⁵⁹ Kakwèna démons búngì bukùmbàne mu ifernò bwà kutùpangisha bwà kucyènta to. Tuvwa badyànjila kulongolola kùdi Nzambi bwà díbà edi. Díyi dyà Nzambi didi diDimwèneshila kutùdi. Ne tudi ne mwoyi mu Bwiikadi bwà Nzambi, ku Díyi-mulayi wà Nzambi. Kakwèna démon mu ifernò udi mwà kumpangisha mèmè bwà kubiika ku lufù nànsha. Kakwèna ciibi cidiye mufwànyine kunkàngila mumpàla, mu dyòdi dindà adi to. Bitampì mbimana kukòsa. Àlèluuyàh!

²⁶⁰ Ndi mulekelela. Mèmè ndi mukankù. Nciyèna kabìdi mwela mu musàsà to, kàdi nkàadi mulekelela. Nkàadi mubiike ku bafwè, mubwelè mu Mwoyi mupyamùpyà wà Yesù Kilistò. Kí ng'ànu mèmè nkààyaanyi to, kàdi mulùme yònsò, mukàji yònsò, mwànà wa balùme anyi wa bakàji udi musòmbe mwab'ewu, udi muujìbwe tètè mu Nyumà wa Nzambi awu, ncifùkìibwà cipyacìpyà mu Kilistò. Ne wèwè udi mukankù.

²⁶¹ Tudi ne mwoyi, leelù ewu, ne tusànkila dibìishiibwa dyà ku lufù bwà kashidi ne kashidi adi. Bwalu Yèyè ùdi ne mwoyi, twètù pèètù tudi ne mwoyi. Ne Yèyè ùdi ne mwoyi munda mwètù, ùtùvwija ne mwoyi. Ne Nyumà wàkaMubiisha ku bafwè awu, musòmbèle munda mwètù, neàfuulululè mibidi yètù yà cifwàkà eyi, dyà Paasàkà munènè wa Cyendèlèlè awu. Butùmbi kùdi Nzambi's wè!

²⁶² Kaa, angàtà maalu a pa buloba, angàtà byònsò byùdi muswè kwangata abi, kàdi mpèeshè mèmè Yesù. Amen. Mèmè ndi muMunangè. Yèyè ùdi buloba bujimà, bwànyi mèmè.

²⁶³ Ne bu mùdi citùpà cyà ku Yèyè, mèmè ndi citùpà cyà ku wèwè, ne wèwè udi citùpà cyà ku mèmè. Ne, bònsò pàmwè, tudi citùpà cyà ku Yèyè.

²⁶⁴ Kaa, wèwè mwena Kilistò, mpùngà kaayi utùdi nendè's wè! Tudi ne mpùngà yìvwà Pòlò Munsantu kàyikù mulòòte bwà kwiikala naayi to. Tudi ne mpùngà yìvwà Henòkà, ne Eliyà, ne bònsò abu kabàbyikù naayi to. Mpùngà yitùdi twètù naayi mpindyewu ayi's!

²⁶⁵ Ne kùdi kaamùkòkò kakesè kuntu kwàka mu mwaba kampànda, ne Yèyè kàakwiikala musànkishìibwe pàdi kàmwèpelè aku kakàyi kabwele mu lupangu to. Ku dikwàcisha dyà Nzambi, ne ku cikèènà-kumòna kampànda, ne EMU MMÙDÌ MUKALENGE WÀMBA, ndi ngaalukila dyàmwàmwà

dyà mbú. Kaamùkòòkò kakesè kàà ndekeelu aku kàdi mwà kwiikala kàà bafìke kuntwaku, ku dyànyì pàànyì dimanya dyònsò, kùdìbo kabàyìkù bèèla meeji ne bàdi nànsha ne musùùkà aku to. Kàdi Nzambì mmumanyè bishiilàngàne. Mémè nénye kakèba too ne ditùkù dyà ndekeelu dyà mwoyi wànyì, bwà kupeta kòkò aku, mwaba wònsò wùdìku kàsanganyiibwa awu.

266 Ndi ntèkemena ne ncyenàku mulèndwisha nànsha umwe wa ku bânà bèètù mu kwamba kwà maalu muumisha aa to. Ntu . . . Kabyèna ne ncyèna muswè bwà nwikalè nuya mu èkèleeziyà to. Cyà bushùwà, ndi muswè nwikalè nuya mu èkèleeziyà. Ikàlà uya mu èkèleeziyà mwaba wònsò wúyaayà awu. Kàdi aci kacìikadi ditèkemena dyèbè to, dyà wamba ne: “Èè, ndi wa mu *cikampànda*, anyì ndi wa mu *cikansanga*.” Kaa, mwanèètù wa balùme, mwanèètù wa bakàjì, ikàlà wa Kilistò. Ikàlà uya mu èkèleeziyà, kàdi ikàlà wa Kilistò. Amen.

267 Dikùmbanyina adi diikalèku—diikalèku, dyòdi kadiyi munda mwèbè to, dikufùùlùlùlè ànu patùdi twakulangana apa ùye ku Mwoyi. Kwènàku mwà kuswà bwà kuCyàkidila mpindyewu anyì?

268 Cibambalu eci ncyùle naaCì tèntè. Mémè ndi nCyùmvwà pambidi pàànyì pajimà apa. Ndi mumanyè ne Cìdi kaaba aka, bukolè bwà Nzambì abu, Mùmònyì munène wa bikèèna—kumòna awu, Mudyanjidi—kwamba munène wa maalu udi mwà kwamba maalu kabiyìkù mwà kupangila awu, Munène awu udi mwà kwakula byà muntu nànsha umwe kàyìkù mwà kwamba ne “to” nànsha, Muntu udi mwà kuunzulula ne muntu nànsha umwe kàyì mwà kwinjila awu. Yèyè uvwa mufwè awu ùdi mpindyewu ne mwoyi, ne mwikàle ne mwoyi, leelù ewu, mu Phoenix emu, wènda wènda munkacì mwà bilòngò bilediibwe bipyabìpyà.

269 Kabyèna bikèmesha to, mu dindà dyà Paasàkà adi mamata makesè a binsònji byà lumuma àvwa àsanganyiibwa pa ditàmà ne ditàmà dyònsò dyà cilòngò cyà mbata ne cyà rose cyònsò. Bwà cinyì? Cìvwa cimanyè ne cìvwa citòlwesha mu buloba, kàdi mu mwaba kampàndà mùvwà cilòngò cyà Cyendèlèlèlè cisampila. Ncyàngatèku kaaba kààci dínà ditùkù. Ncyà bushùwà’s.

270 Kabyèna bikèmesha to, pàdi binsònji byà disànkà mwà kupwekela pa matàmà ètù. Kabyèna bikèmesha to, pàdi myoyi yètù yùmvwà muzakalu ne yìnyùkushiibwa patùdi mwà kuumvwà bukolè bushintuludi bùmwbùmwbè abu bubwela munda mwà nsòmbelu yètù ne bùtùùja, mene ne bwà kutùfikisha ku dyakula dyà mu mwakulu wà wùfùmina mu Dyulu.

271 Tudi bafùùlùlùlula mu mùshindù wà bakabwejiibwe mu Bwiikadi Bwèndè mwàmwa, twamba bipròfetà, tudyànjila kumòna, tudyànjila kwamba maalu, ne bikwàbò byònsò bikùmbanangana ànu menemene ne Dìyì. Cyòci cyàmba cipròfetà bibèngangana ne Cyòci aci, kanùcitàbùùji to. Kàdi

cyôci cikùmbanangana ne Dìyì, Cikaadi cimanè kwamba ne: EMU MMÜDÌ MUKALENGE WAMBA.

272 “Kùcìinyi nànsha. Ndi Ewu uvwa mufwè, ne udi ne mwoyi kashidi ne kashidi.” Aci ncitampì cyà Paasàkà cyà Nzambi cìdì cìtwa citampì ku dileetà ne dileetà dyônsò dyà Dìyì edi munda mwà mwoyi wèbè. Citampì aci ncinyi? “Nudi mikàndà mifùndilangana, mibala kùdi bantu bônsò.” Aci kaayi nudi bamanye. Kàdi pàakunanyi Nzambi, Yèyè wàkutu citampì ne citampì cyà Paasàkà ne, udi mubiike ku lufù pàmwè ne Kilistò, ne udi cifùkiibwà cipyacipyà.

273 Pawikalà kùyi mutwìbwe citampì mu dindà emu to, enza nàнку patùdi twinyika mitù yètù apa.

274 [Mwanèètù wa balùme kampànda wàbangì kwakula mu mwakulu mukwàbò. Katùpà kàà mukàbà wà mèyi munda mutupù—Muf.] . . . Mukalenge. Nudi bumvwè aci anyi?

275 Elàngànaayi meeji mpindyewu, ne mitù yènù miinyika. Loomò 8.11: “Pùikalàbi ne Nyumà wàkabiisha Kilistò ku bafwè awu ùdi munda mwènù, Yèyè neàfulululè kàbìdì mibidi yènù yà cifwàkà ayi.”

276 Citùdì mwà kushààla bindile ne mwoyi mujimà ncinyi, nwènù cisàmba? Cìdiku cishààle ncinyi? Tàngilàayi Formosa ne buloba bujimà. Ne mìsilè yà bômbè bwà mushindà ne bikwàbò byônsò miikàle ànu pabwìpì ne kutuuta bàà pa buloba, ne bôbò biikàle babindùlùke, ne bakwàcike bwôwà, ne bèela mbilà mikolè. Ne batentudi bàà maalù à sèndèmà mbaabù, kuntu kwàka, biikàle bènza ànu minèkù yà mishindù yônsò, byenzè ànu mùdì mwànà mukesè wa balùme udi upicila mu nkità, wènda wèla mòdònzù bufùku, ùteeta bwà kufikisha bantu ku diitabuuja ne kakwena bwalu to. Kanùseeswishibu nànsha. Dilwa dyà Mukalenge didi pabwìpì.

277 Mònaayi, ditùkù adi, mulòbi kampànda mmulwè kungambila, pàmvwà musòmbe mu mucì wà laurier mwàmwa, ne, mu kaaba kampànda kàà bikùnàkùnà ne mabwe kàà mùshindù kampànda anyi cintu kampànda lwà kwìnshì eku. Ne mùvwàbi ne, ntàntà mule kumpàlà kwà dizakala dyà buloba adi kunyùkushadi mu Grèce mwàmwa, mishipa yônsò yitù pa ciibidilu yidìila lwà pa dîbà adi mu dindà amu ayi, kayìvwa yidìila to. Cìvwa ncinyi? Kayìvwa pamutù pàà màyi to. Musangu mwibìdì wàluci kwenzeka, cintu cimwècimwè aci kwenzekaci. Kumanyayè dîbà adi mene ne cintu kampànda cìvwa pabwìpì ne kwenzeka. Mishipa ayi kayìvwa yidìila pa dîbà adi to.

278 Ne tunyuunyi tulòbi twônsò ne bikwàbò bitù bidya mishipa abi, bivwa bilekèle kudya. Mu dindà adi pa bwebwebwe, ki pàtùbi bìdya. Kushààlabì ànu kacya byàsòmba cyanààna ku mwelelu aku, byumùke biyè kule ne mabwe matùmbùke awu ne bikwàbò. Bwalu, ànu mu tusunsa tukesè cyanààna, bilembwelembwe byà ku mbù abi kubangabi kututuma bipàtuka

mu buloba, byùmukila panshi pàà màyi à mbû. Nwamònu anyi? Mishipa ayi yàkamanya aci kumpàlà kwà kwenzekaci.

279 Muye mu Inde amu, mémè kubala cibèjibeji, cyàmba ne: “Dizakala dyà buloba didi ne cyà kwikala dijikè.” Munda mwà matùkù, tunyuunyi tukesè atu katùvwa tufwànyine kwalukila ku maswa àtù mu mbwebwe amu to. Ngombe kayìvwa mifwànyine kwimanyina pabwìpi ne biikishilu abi mwìnshì mwà...mu dilèji amu to, mu mèbà a luuyà lukolè lwà munda muunya amu. Mikòòkò yìvwa miimànyine kule munkaci mwà madimi, myeyemèngàne ewu ne ewu. Kayìvwa miswè kuseemena pabwìpi ne mbwebwe ayi to, matùkù àbìdì anyi àsàtù kumpàlà kwà dizakala dyà buloba adi kwenzekadi.

280 Bwà cinyi? Mikòòkò ayi yìvwa micimanyè. Yàkamanya ne cintu kampàndà cìvwa mwà kwenzeka. Nyuunyi ayi yàkamanya ne cintu kampàndà cìvwa mwà kwenzeka. Tunyuunyi tulòbi atu twàkamanya ne cintu kampàndà cìvwa mwà kwenzeka. Mishipa ayi yàkamanya ne cintu kampàndà cìvwa mwà kwenzeka. Ùvwa n’Nzambì umwèumwè awu wàkalombola nyama ayi bwà kuya kabwelayi mu bwàtù.

281 Kanwènaayikù mwà kumòna anyi, nwènù bàdì bùle tèntè ne Nyumà aba ne, cintu kampàndà cìdì pabwìpi ne kwenzeka anyi? Kanwikadi bindile *cintu kampàndà* cinènè menemene cyà cìtàngalaka buloba bujimà to; cintu nànsha cìmwè pakuumusha Dilwa dyà Mukalenge Yesù. Vùlukàayi, vùlukàayi ànu Mèyi ne mulayi byà Mukalenge.

282 Kanwènaayikù baswè kulwa kubwela ne lùkàsà lwònsò anyi? Ndàayi kule ne bimanu binène abi. Dibìikà dyà ku lufù didi pabwìpi mpindyewu. Kwòkò muntu mwab’ewu udi kàyi mumanyè ne mmufwànyine kuya mu dibìikà dyà ku lufù adi, ne kàyi mutwishìbwe ne ùdì ne bukolè bwà dibìikà dyà ku lufù abu busòmbe munda mwèndè to!

283 Nànsha misàndà yà mu dikòba miwùbùtùle, nànsha bômbè bwà mushindà bukutaayikile ànu pambidi mene apu, kabwàkubùtulakù bukolè bufùùluludi bwà dibìikà ku lufù abu nànsha. To, to. Mwanèètù wa bakàji, mwanèètù wa balùme, dìnà dyèbè dyà mushinga mukolè adi ndifùnda mu Mukàndà wa Mwoyi wà Mwàna wa mùkòòkò kwàka nàka. Muntu nànsha umwe kèna mwà kudikùpula to. Kakwèna ndundu yà dikùpula naayi bùngì bukumbane, pa buloba apa, bwà kukùpula dìnà dyèbè mu Mukàndà awu Kwàka kwàkadisumbà Mashi Èndè aku to.

284 Pawikalà kùyì mutwishìbwe bwà cyòcì aci to, kù—kùnàyikù ne mudilu pa bwalu abu mpindyewu to. Nwamònu anyi? Udi mufwànyine kunàya ne mudilu pa kwikala unyeemena mu mwaba kampànda mu njila mujika kàdì kùyì ushipiibwa to, kàdì kwàkunyaema kupìcila mu njila mujika ewu to. To, to. Neùpetekè ne bwalu. Kabyàkukèngela bwà wèwè kwenza

nànkú to. Kùdi mudilu mukúnze munkaci mwà kupenya patùdi twakulangana apa. Cingulukà, cingulukà mmwènenu yèbè wèwè ayi, cingulukà maalú a pa buloba awu.

²⁸⁵ Lwáku. Tùbiishiibwè pàmwè ku lufù mu cikondo cyà mushinga munènè cyà Paasàkà eci, cyanga cinènè cyà Paasàkà eci. Udikù mwà kucitwila cyanga munda mwà mwoyi wèbè mu lumingu elu anyi? Wèwè kùyì mwà kucyènza to, udikù mwà kwela ànu cyànza cyèbè muulu cyanààna kùdi Nzambì anyi?

²⁸⁶ Ambàku ne: “Nzambì, ncyèna mutwishiibwe bwà cyòci aci to. Ncyèna mumanyè ní ndikù mwà kwenza biinè byònsò abi anyi to. Udikù Wèwè mwà kunkwàcisha anyi? Nèngìikalè mwà kwela cyanza cyànyì muulu Kùdi, Mukalenge. Nkwàcishèku.” Nzambì àkubènèshè. Nzambì àkubènèshè. Abi mbìmpè. “Ndi—ndi—ndi Neebè dijinga, Mukalenge. Nkwàcishèku. Ndi—ndi muswè—ndi muswè kubishiibwa ku lufù. Ndi—ndi muswè kubishiibwa ku lufù. Ndi muswè kupeta dikumbana adi mpindyewu mene. Ndi muswè kumanya ne ncilelèlè. Ndi muswè kumanya ne ncyà bushùwà, Mukalenge. Ndi mumanyè, ncyèna mwà kwenza ntùpàkàn-...” Kwèna muswè ntùpàkànyì nànsha mikesè díbà adi nànsha. Kacyàkwikala mwà... neciikalè díbà dimanè kupita bikolè. Mpindyewu ki ditùkù adi. Ekèlekèle! Mpindyewu ki ditùkù adi. Kwindidi nànsha.

²⁸⁷ Ànu àbì àdì panshì aa, mwà munkaci mwà kuyiisha. Kùvwa muntu mukùlákàjì wa bafìike uvwa mwalùkile lwà mu ndekeelu mwà nzùbu mwàmwa, mutwilàngàne naanyì. Kwambayè, ne: “Révérend, ndi muswèku nkwanbilè. Ndi ngamba ne wèwè udi mubingè.” Yèyè ne: “Nkààdi mumanè kwambila Mukalenge, kùkaadi ntàntà mule ne, ndi muswè ngiikalè ne tikì wanyì mu cyanza mu dindà adi. Ndi muswè kwikala mumanyè ne mmutwà citampì bilenga.” Yèyè ne: “Nekwikalè lutàtù búngì cyanààna lwà ku musulù aku.” Yèyè ne: “Nkààdi—nkààdi—nkààdi munkaci mwà dipweka, mutàngile ku musulù awu aku.” Yèyè ne: “Ncyèna—ncyèna muswè lutàtù kuntwaku nànsha. Ndi muswè ngiikalè mucilongòlòle ànu cyònsò mpindyewu.” Ncyà bushùwà.

²⁸⁸ Ukààdi mupetè dyaanyisha dyèbè dyà lwendu anyi? Pawikalà kùyì mupetè dyaanyisha dyèbè dyà... Udi mwà kwiikala ne mukàndà wà njila, kàdi, wèwè kùyì ne dyanyishiibwa bwà wèwè kuya to, kwèna mwà kubwela mu Ditunga adi nànsha. Aci udi mumanyè. Ukààdi mulongòlòle maalú èbè ónsò anyi? Kabiyi nànkú to, mpindyewu mene ki díbà didì dikèngela kucyènza.

²⁸⁹ Kùcìinyi to, pawikalà muumvwè bwòwa ndambù. Mpindyewu, kùdi pàmwàpa byanza bitwè ku lukàmà bìdi byeela muulu mwab'ewu. Pa nànkú pawikalà mupetè bwòwà ndambù, mpindyewu twàkajàayaku bwalu abu.

²⁹⁰ Mpindyewu, ndi mumanyè ne tudi ne mishindù mishiileshiiàngàne. Bàmwè bantu batu bamba ne: “Bànda kùneeku, nkulabùlè ku cyanza.” Bakwàbò ne: “Bànda kùneeku, ùtwe binù ku cyoshelu.” Mpindyewu, abi bìdi ànu bilenga’s. Ncyèna ne díyì nànsha dimwè bwà kucilwisha to, nànsha kakesè, cintu nànsha cimwè, cintu kanà cyònsò cyàmbàbo aci.

²⁹¹ Kàdi lekèlaayi nwàmbilèku wànyì mùshindù mèmè. “Búngì bwònsò bwà bààkiitabuujà abu, búngì bwònsò...” Dilwa dyà ku cyoshelu kî ndyàkwiitabuujà to. Dilabula dyà muyiishi ku cyanza kî ndyàkwiitabuujà to. Kàdi wèwè mubiikidiibwe kùdi Nzambi, ne wèwè mwiikàle mukankù, kacya ànu ku cibangidilu aku, ànu lubilà lukolè ki lùdi lukwambilà. Wèwè newitabuujè. Wèwè ànu mucitabùùje cyà bushùwà, mèmè nètùsambilè neebè.

²⁹² Nudikù mwà kudifwànyikijila kaamukankù kakesè aku kàshààla kàbìdi mu lupangu lwà nzòòlo amu ntanta mule anyì? To, to. Huh-uh. To. Kùshààdimù kàbìdi ntanta mule nànsha, wèwè mulundà wanyì. Enzà—enzà twàmbwibwè mpindyewu. Ngàsà wa Nzambi ùdi kaaba aka bwà kucyènza.

²⁹³ Taatù wa mu Dyulu, tudi bafikè ku dimanya ne tudi twenda tupweka batàngile ku díbà dyà ndekeelu. Katwèna ne ntàntà mupitèpite bule bwà kwiikala kaaba aka mpindyewu to. Kí mbwà bukolè butùkaadi to, kàdi mbwà díbà edi. Tudi twitabuujà ne kùdi nsongà yà bitendè yàbúngì misòmbe kaaba aka, yiikalà ne mwoyi pènzekà cyòci eci. Kàdi cidi ànu mwà kwenzeka leelù ewu. Katwèna bamanyè kasunsa anyì díbà to. Kàdi, Mukalenge, Wèwè wàkatwàmbila ne: “Panwàmònà bintu ebi byènzeka,” kàdi mbyebì byènzeka mpindyewu kùkaadi ntàntà mule.

²⁹⁴ Tudi bamanyè ne tukaadi baye bikolè, bilondèshile beena maalu à mamanya. Kùkaadi bidimu bisambòmbò, anyi mwandamutekète, kùvwàku kushààla tusunsa túsàtù bwà díbà mundankùlù. Katwèna bamanyè ne nntàntà bule kaayi mwiinàwu awu to, ntankù mutùngùnùke ne kutuuta, kàdi tudi bamanyè ne tukààdikù menemene.

²⁹⁵ Èyì Nzambi, bwà kwiikala ne ditwishiibwa adi: bwà kumòna ne mwoyi wètù wùdi wùtwa “amen” ku mulayi wònsò wà Nzambi, bwà kumòna ne Nyumà Yèyè mwiinè, utu mubwelè munda mwètù awu, ùdi ùfùùlùlula buumùntù bwètù.

²⁹⁶ Nzambi, enzàku bwà bânà bèètù bàà balùme bàmonè cyòci aci, mu dindà emu. Enzàku bwà bânà bèètù bàà balùme bàmonè cyòci aci ne, Nyumà awu ngudi ubwela ne ùfùùlùlula ku Díyì. Enzàku bwà bânà bèètù bàà bakàjì bàmonè cintu cimwècimwè aci, Mukalenge. Ne pashiiishe, bóbò bamòne cintu kampàndà cyàbèngà kubàfikisha ku difùùlùluka ku Díyì adi, Èyì Nzambi, swàku bàtapuluke naaci ne lùkàsà lwònsò. Enzàku nàнку, Taatù. Byònsò bìdi mu byanza Byèbè mpindyewu. Ndi mumanyè ne nkààdikù mèmè ewu mupangilèpàngile mu bintu byàbúngì,

ne ncicidi ànu mutungùnùke ne kupangila, kàdi, Mukalenge, ndi mwenzè byònsò bindiku pàanyi mumanyè mwà kwenza abi. Bwà mpindyewu kaayi bwalu bùdi mu byanza Byèbè. Bòbò mBèèbè Wèwè. Mu Dìna dyà Yesù, bākìdìlèku, Taatù.

²⁹⁷ Mpindyewu nwénù bàdi apa biikàle ne dijinga dyà dyondopiibwa bwà mibidi yènù. Mbanganyi bàdi beena kwiitabuuja kaaba aka? Elà cyanza cyèbè muulu. “Mémè ndi mweena kwiitabuuja, mündiku pàanyi mumanyè munda mwà mwoyi wànyi.” Mbanganyi bàdiku ne cintu mu byanza? Nudi bamanyè’s, kakùyi mpatà nànsha yà kànà to, ne munda mwà mwoyi wèbè, mpindyewu mene, udi mubiishibwe ku bafwè anyi? Udi mumanyè anyi? Kaa, ekèlekèle! Ncinyi díbà adi cidì cifwànyine kwenzeka mu disangisha bu edi nunku ewu? Ndi mumanyè ne ndi pashiishe, kàdi ncinyi cidì cifwànyine kwenzeka mpindyewu mene ewu? Anjì elàayi ànu meeji à cidì cifwànyine kwenzeka. Dikumbanyina adi didi disanganyiibwa munda mwèbè amu mene. Nwamònu anyi? Wèwè, ne cyanza cyèbè cyeela muulu aci, udi bu—bu mwenzè mucipù, kùdi Nzambi, ne: “Ndi mumanyè ne cintu kampànda ncingenzèkèle. Bidi mwà kwenzeka ne ncikadi menemene mwaba wùvwà wùkèngelà bwà mémè kwiikala to.”

²⁹⁸ Nànsha mémè pàanyi. To, mukalenge. Ndi kule be ne mwaba wùvwà wùkèngelà bwà mémè kwiikala. Kàdi ndi mumanyè cintu cimwèpelè eci ne, ndi muumùke ku lufù muyè ku Mwoyi. Ndi mumanyèku ne cintu kampànda ncingenzèkèle. Byàbùngì... Mpindyewu kí mbu muntu mukolè to, kàdi kùkaadi bidimu byàbùngì, byàbùngì, nkwaakenzekàci.

²⁹⁹ Ne ndi mumanyè ne ditùkù adi, pàngààkabwelà mu lùpitàadi alu, pàngààkamòna kadyòmbò *kanène* kangeela apu, Nkààvwa mumòna mukàjàànyi ùfwa, pàanyi’s mwiikàle mbiikila bwà kwiikalayè ne mwoyi, “Kàdi cìndi mwenzè ncinyi piikalàci kaciyi ànu kwiimana mu disangu dyà mùsèèsù ne kuyiisha, ne kusambidila babèèdi?”

Ki díbà adi Sàtaanà kwambayè ne: “Èè, Yèyè kàkwandamuna ku disambila dyèbè to.”

³⁰⁰ Ngàkamumòna ùfwa, kàdi ndi mumanyè ne munda mwèndè mùvwà bukolè bwà dibìishiibwa dyà ku lufù abu. Mifùbà ayi neyjuukè cyàkàbidi.

³⁰¹ Ngàkamòna mwanàanyi mukèsè wa mu dibòko mulàadika pàpa. Ne mémè kumutentekala cyanza, kwamba ne: “Nzambi, kumwangàciku to.”

³⁰² Kumwèkabì ànu bu ne Wàkapwekesha rìdò, kwamba ne: “Ncyàkukumvwakù kàbìdi to.”

³⁰³ Sàtaanà kwambayè ne: “Ki bwalu abu’s. Ànu díyì òmwèpelè cyanààna edi...” Yèyè ùvwa mutambe kumanya bìmpè ne kavwa mwà kungambila ne Nzambi kàvwakù to, bwalu mvwa

mumanyè ne Ûdiku. Kàdi kwambayè ne Yèyè kàvwa munnangè to, Kàtu ùncyùka to. Nwamònu anyi? Cintu cyònsò cyà dilukakaja naaci lungènyi, kwambayè ne: “Wèwè’s ucidi ànu nsongàalùmè, wa bwalu mucikàle ànu ne bidimu makùmi àbìdi. S’ki mukàjèèbè wàwa mulàadika mu nzùbù wa bitàlù emu. Ne mwanèèbè wa mu dibòkò’s nyèyè uyààya wàwa. Ne—ne ànu. . . Wèwè’s uvwa wamba mùdiYe Mwondopi munène, ne mùdiYe *bikampànda* byònsò ebi. Kàdi, tàngilà, cidiYe wènza ki cinyi? Diyì òm̀wèpèlè, Kàyikù mene mufwànyine kudyàkula to, kutàngilakù ànu panshì cyanàànà mwaba awu ne kwamba. Kushikulakù ànu cyanàànà mutù Wèndè awu, s’ki cìvwàku cìfwànyine kwenzeka, nùnkù’s mmwondòpìibwe. Kàdi, udi umòna’s, Yèyè kì mmukunangè to. Kèna ùkucyùka to. Ùlekela mwanèèbè wa mu dibòko ùfwa kuntu kwàka mpindyewu mene, ùbènga mene ne bwà kutèèleja disambila dyèbè mu dībà dyà bwalu bukòlè edi.”

³⁰⁴ Kakùyi mpatà to byònsò byàkambàye bìvwa ànu bulelèlè. “Pa nànkù cyùdi mwenzè ncinyi? Ukwàta mudimu ditùkù dijimà, mu mùshindù wà kùcìyikù mwà kwiimana kuulu to. Ne pashìishe ubùla tulù bufùku bujimà, too ne mundankulu ne pa dībà ùmwè wa bufùku. Mwimàne mu masangu à njila, uyiisha ànu kuyiisha. Wenza mabiikila ku lùpitaadi. Walukila ànu kumbèlu cyanàànà usòm̄ba, mu nkwasà, usòm̄bamù umbà udyùpwiila mu tulù munda mwà dībà dijimà anyi àbìdi, ne walukila cyàkàbìdi ku mudimu aku. Dilòòlò dīdī dīlondà, cintu cìmwìcìmwè aci. Kàdi’s ki wèwè awu, ne bidimu bitwè ku makùmi àbìdi ne cìmwè, makumi àbìdi ne bìbìdi. Mulundà yònsò, nsongàakàji yònsò, nsongàalùmè yònsò ùvwàku muswikàkàne nendè, s’mbakubìikile mùdi mupàlè wa meeji makònyàngàlè. Cyùdi mwenzè ncinyi? S’ukàadi mudìvwijè mukùtākàne. Kwèna ucimòna anyi?” Nkààvwa ànu pabwìpi ne kutwà ku cyèndè.

³⁰⁵ Kàdi Cintu kampànda munda mwànyì, cìvwa mbukòlè bufùulùludi abu. Mèmè kwamba ne: “Mukalenge nguvwa mufile, ne Mukalenge ngwàngàcì. Dīnà dyà Mukalenge dībèneshiibwè.”

Pàdi ditèkemena dyànyì dyònsò dìn̄dekelela,
Dībà adi Yèyè ki ditèkemena dyànyì dyònsò ne
ciikishilu cyànyì.

Bwalu pa Kilistò, alu . . .
[Katùpà kàà mukàbà wà mēyì munda
mutupù—Muf.] . . . nduntekà.

Kaa, Yèyè nealwe ne dīyì dyà bucìmunyi,
Dībà adi ngiikalèku dībà adi musangànyìibwe
mu—munda Mwèndè,
Mujingila mu mizàbì yà bwakànè Bwèndè.

³⁰⁶ Kì mmu bwànyì mèmè mwiinè to; ncyèna naabù nànsha bwà kànà to. Bwànyì bùdi mbukooyà, mikùsù yà manyaanù.

Ncyèna muswe kuteeta bwà kuya mu Dyulu ku diyishi dyànyì to. Ncyèna muswe kuteeta bwà kuya mu Dyulu ku bikèèna-kumònà byànyì. Nyààya mu Dyulu bwalu ndi mulamè ngàsà Wendè mu mwoyi wànyì. Ngàsà Wendè, ki bwà cinyi nènye. Mùshindù awu ngutùyaaya.

³⁰⁷ Kaa, mulundà wanyì, wèwè's udi citùpà cyà ku Mubidi ewu. Nudi bânà bakesè bàà Nzambi. Mpindyewu, ndi ngamba eci bwà kwiibaka ditèkemena dyènù. Wèwè musangan . . .

³⁰⁸ Mémè musangane luse kunùdi, munwàmbile Bulelèlà . . . Ne cingänwàmbidì aci, ncyà—ncyàkambà mupròfetà, cyà bidimu bikaadi bipite. Nciyi ndivwija mémè mwiiñè mupròfetà Wendè to. To, mukalenge. Kàdi nnwàmbila Bulelèlà. Kacya Yèyè ùkaadikù mwambè cintu kampànda kaciyi cyà bushùwà anyi? Ndi munùmanyè mpindyewu kùkaadi bidimu makùmi àbidi ne byà mu njila, muneemu mu Phoenix, kacya ànu ku musambu awu wà ne: *Ndi Muswè Kuumvwijangana Nendè Bwalu Abu*, ku èkèleeziyà wa Mwanèètù Outlaw kwàka, ngeela meeji ne kùvwa nkwòkò, ne Mwanèètù Garcia. Kacya nkàadikù munwàmbile cintu kampànda mu Dîna dyà Mukalenge citù kaciyikù cyenzèke anyi?

³⁰⁹ Vùlukàayi ne, kùdi ditèkemena ànu òimwèpelè. Petàayi bukolè bufùlùludi ebu. Bwòbù mbwànùlamà. Pìikalà bikwàbò byònsò byupùka, Bwòbù nebùnùlamè.

³¹⁰ Bàmwè bàà kùdibo bàakamba ne: “Uvwa mulamè ntèndeleeleu webè anyi, Mwanèètù Branham?”

Mémè kwamba ne: “To. Yèyè nguvwa mundamè.”

³¹¹ Yèyè ngudi undama. Kî mmémè udi umulama to. Kî nnè mémè ndi munànùkile, anyi to. Bìdi ne Yèyè mmunànùkile, anyi to. Yèyè ngudi munànùkile bwànyì mémè.

³¹² Kabivwa bikèngela bwà kwenza Yè nànkù to. Banjèlò bàvwa biikile mu mucì ne mucì wònsò, bàmba ne: “Baalùlà ànu minu yèbè ayi. Funkùnà ànu cyanàànà; kabyèna bikèngela bwà wèwè kuwùmusha ku nkùrusè to. Funkùnà ànu ne munu wèbè cyanàànà, kàdi ùtangilè ùmonè ne ncinyi.” Nwamònu's, musùmbà mwelulwidyanganyì awu's. Kàdi bu ne Yèyè wàkenza nànkù, ncivwa mufwànyine kupeta bujaadiki ebu leelù ewu to; kùvwa mufwànyine kubùpeta to. Kàdi bwalu Yèyè wàkashààla ku nkùrusè, kunànukila Yèku, ki bwà cinyi ndi munànùkile Nendè.

Pa Kilstò, Lubwebwe lushindàme, mpàndi mwiimàne;

Myaba mikwàbò yònsò yìdi luntekà.

³¹³ Mpindyewu, panwìkalà nusaama, swàyi nutentekelanganè byanza muntu ne mukwèndè. Tùsambilàayi. Tentèkèlà ànu muntu kampànda udi ku luseke lwèbè awu byanza. Cyùdi wèwè umvwa cikutàcisha nànsha ciikàle cinyi, ikàlà ne diitabuuja

mpindyewu. Ní nkààdikù munwámBILE Bulelèlà, ki mèmè udi unwámBILA awu. Nwamònu anyi? Yesù mmwambè ne: “Bimanyinu ebi nebìfilè aba bàdì bìtabuujà.” Ne nwènù nudi beena kwiitabuuja, s’nwafùmu ku dyeela byanza byènù muulu. Kanwèdi mpatà to. Kùdi muntu mukwàte ne byà luse udi usaama ùdi mutentèkèle byanza. Muntu kampànda mmukutentèkèle byanza.

314 Vùlukà bukolè bufùùlùludi abu, bukolè bwàkajuulà Yesù mu lukitá abu. Mpindyewu udi ne diitabuuja mu cyùdi naaci mu mubidi wèbè—wèbè sungasunga aci. Necikwacishèku muntu ùdi mutentèkèle byanza awu. “Bwòbù busòmbèle munda mwènù, neBùfuulululè kàbidì mibidi yènù yà cifwàkà ayi.”

315 Nzambì munanga, pàndì mwiimàne kaaba aka mu dindà emu, pabwìpi ne dìbà nkànkala, pàdìbi ne mpabwìpi ne dìbà edi dyà ditùkù dyàkeelà Yesù lubilà ne: “Nzambì Wanyì, Nzambì Wanyì, WàNdekèdì bwà cinyi? Ndi ne nyòtò.” Kabyèna bikèmesha to, mupròfetà wàkadyànjlila kucimòna, e kwambayè ne: “Mifubà Yànyi yònsò, mmiNtàngile. Bātùbulu byanza Byànyi ne makàsà Àànyi.” “Kàdi Wàkabadiibwa pàmwè ne bashipi bà mikenji. Kàdi Wàkatàpiibwa mpùtá bwà kushipa kwètù kwà mikenji. Wàkazaajiibwa bwà bubì bwètù. Dinyooka dyà ditalala dyètù dyàkalwa pambidi Pèndè, ne ku mibùndàbùndà Yèndè tudì bondòpiibwe.” Ki citùdi tunana mu dindà emu, Nzambì. Citùdi tunana ncyòci aci.

316 Mu dindà dyà dibìikà dyà ku lufù edi, mònaayi, Bulelèlà bushìndika búngámbi ebu, Mukalenge, bwà mu Dìyi Dyèbè ebu, mu Bwiikadì bwà Nzambì. Yèyè ùdi Mulumbulwishi, ne twètù tudì bantèmù bàà ne Yèyè mmutùpikùle. Ne munda mwètù, ku ngàsà wa Nzambì, mùdi mùsanganyiiibwa bukolè bwà dibìikà dyà ku lufù abu. Kàdi balundà bèètù nyewù bàsaama, bàdìbo batentèkèle byanza abu.

317 Éyì Nzambì, tudì tweela dyabùlù kadyòmbò, munkaci mwà diitabuuja dyètù mu dindà emu, ne byanza bitentekela bantu, ne mèmè ne byànyi byanza byolola kumutù kwà bantu. Enzàku bwà disaamà dyònsò, lutàtù lwònsò lùdi lùteetá kushààla lukwàte bantu alu, mu bwiikadi bwà Bulelèlà bushìndika ebu, bìpatukè. Mu Dìnà dyà Yesù Kilistò, bantu aba bàsuuludiibwè leelù ewu. Bwalu ne, Bible, Mèyi a Nzambì wetù mmambè ne: “Bòbò batentèkèle babèèdì byanza, babèèdì nebàsangalè.” Nènku byanza byètù mbyebì byeela muulu, Kùdi Wèwè, Nzambì.

318 Bu mùdìbi ne cikùnyiiibwà cyònsò cyà pa buloba cidi cìnwina ku mpokolo Webè, ne ncyà bushùwà ne bu mùdìbi ne cikùnyiiibwà aci, nciòlwesha, cìnwina ku mpokolo Webè, cidi cibanga kudyunda. Cidi cibanga kukola. Cikolakola cyà ditalà, cilòngò, cyònsò cidi cìnwina ku mpokolo Webè aci, cidi cikola cibànda citàngile Kùdi.

319 Nènku mu dindà emu, twâkolù, ne maacentimètres, Mukalenge. Tudi mwà kukafika mu butùmbùkè butàmbidile. Tudi tunwina ku mpokolo Webè. Tudi bifùkùibwà Byèbè, biikàle ne bukolè bwà dibiishiibwa dyà ku lufù munda mwètù, Mukalenge. Ne tudi tulòmba bwà Watèèlejaku disambila dyètù bwà bânà bèètù bàà balùmè ne bàà bakàji. Nènku lutàtù lwònsò, lùdì lùpangishà bananga aba bàdì ne bukolè ebu abu, Mukalenge, lùbàlekèlèlè, bwà bààmònakù mwà kukwàcila Nzambi mudimu. Nènku nebiikalè bimpè, Mukalenge. Mu Dîna dyà Yesù Kilistò. Amen.

320 Nudi baMwitàbùje anyi? Kushiya cintu bu nùnkù anyi? Udi mwà kucyènta bìshi's? Bìdì, ànu bu ne, bikèngela ànu kudikòkela pàà nkayeetu. Mùshindù awu ngunùdì nudyùmvwà anyi? Ndi—ndi—ndi. . . Cidi mwà kwiikala ànu mèmè, bwà ne ndi. . . Kàdi mvwa ne njiyà kampànda, njiyà ànu yà pabwàyì pàndì mfika munkaci mwà bantu, mutùdì basòmbe pàmwè mùshindù ewu. Ndi mumanyè, mwaba kampànda, wà kawùyì wùmweneka apa to; cyenzè ànu mùdì cisanji cyà tudyòmbà, cyà tèlèviziyò, cyònsò cìdici aci, cìpìcila mu cibambalu emu; Kilistò ùdì mu cibambalu emu. Anjì elàayi ànu meeji cyanààna, Mupikudi wetù! Tony, Yèyè's ùdì kaaba aka. Amen.

321 Kàdi nganyì udikù mwà kwiikala wa disànka kutàmba bantu bàdì ne cintu mu byanza, biikàle ne cileegi cyà Bible cyà Dìyì dyònsò dyà Nzambi dimwènèshìibwe, bwà kumòna too ne Banjèlo ne Diikalangana Dyèndè, mùdìbo naadi munda mwà bi—bikondo emu! Nènku kaaba aka, Mèyi à beena lùmònò madyànjila kwamba ne ènzeka ànu menemene. Kàdi's ki twètù aba mu mulàadilu wà Dilwa Dyèndè. Kaa, cikondo cilengapù kaayi's wè!

322 Twètù netùMumònè. Dimwè dyà ku àdi panshì aa, Yèyè neikalè kaaba aka. Too ne pààlwàYe apu, nenwikalè nunsambidila anyi? [Disangisha didi dyàmba ne: "Amen."—Muf.] Mèmè ndi ne njiwù yà lufù kumpàlà kwànyì. Aci ndi mumanyè. Nwamònu anyi? Ne ndi ntwilangana ne bampàngaanù bàdì bafwànyine kukwàsa cingoma, byà mwomùmwe ànu ne kwangata màyi à kunwà aa, nènku bwèbè pààbù bumba bujika. Paùdì ufika mu buloba bwàbò abu, démons yikalà mwà kukwela kadyòmbò pa Bible, ànu bipeepèlè nùnkù ewu's. Kàdi kacypà ncutukù mwanjì kumòna musangu wùkaadiku Nzambi wetù kàyi mupetè bucìmunyi nànsha. Ndi nya mu Dîna Dyèndè, mu Dîna dyà Mukalenge Yesù Kilistò, ditèkemena dyà Mwoyi wà Cyendèlèlè, dibiikà dyà ku lufù ne Mwoyi. "Ewu udi ne mwoyi ne ùNgiitabuuja awu, nànsha byòbi ne mmufwè kàdi neikalè ne mwoyi. Ne ewu yònsò udi ne mwoyi ne ùNgiitabuuja awu kàadyàkufwàku to." Mèmè ndi ngiitabuuja ne aci n'Dìyì dyà Cyendèlèlè dyà Nzambi. Nudi nwiitabuuja cintu cimwècimwè aci anyi? ["Amen."] Nenwikalè nunsambidila anyi? ["Amen."]

Mémè nêngìkalè nnùsambidila. Nzambì wàtùtábaleelakù too ne patwàtwilanganà cyàkàbìdì.

³²³ Mpindyewu twìmanyinààyaàku kuulu, bwà katanci kakesè cyanààna. (Udi ne bwalu kana bwònsò búdi muswè kwamba anyì?)

Twìnyikààyi mitù yètù paanshi.

³²⁴ Kì mbifwànyìnekù kwiikala bîmpè bwà twètù kubènga kwimbakù kaamusambu aka to, mmwòmò anyì? Nudi bavùlùke musambu wètù wà ne, *Ndi MuMunangè* awu, aci cìdi mu mwoyi ne mwoyi wònsò anyì? Tùwìmbààyaaku ànu cyanààna. Mwanèètù wa bakàjì, munanga, udikù mwà...Ndi muswè kwamba ne, ntu kàbìdì ngaanyisha ngimbilù webè wa ku cisanji awu, wèwè mwanèètù wa bakàjì. Éyo.

Ndi muMunangè, ndi muMunangè
Bwalu Yèyè wàkannanga kumpàla
Ne wàkampetèla lupàndù
Pa mucì wà Kàlvariyo.

Mpindyewu netwìikalè mwà kushintulula musambu awu.

Diitabuuja dyànyì nditàngija kuulu Kùdì,
Wèwè Mwàna wa mùkòòkò wà Kàlvariyo,
Musùngidi wa kwà Nzambì;
Mpindyewu ngumvwilèku pàndì nsambila apa,
Kaa, umùshàku dipìilà dyànyì dyònsò,
Kaa, enzàku bwà kubangila ku ditùkù edi
Mémè ngiikale yònsò Webè!

³²⁵ Aci kacyèna cìnwènzakù cintu kampànda anyì? Mbanganyì bàdìku banangè cya pa mwoyi menemene aci...Mémè ntu—ntu—ntu munangè misambu yà ditwà dyà cyanga ayi. Bushùwà, nyìntù munangè. Kàdi panùdì mu nyumà wa dikuukwila, kanwènaayikù banangè miyengà yà kale yà mijikì mitalàle ayi anyì? Mémè ndi ngiitabuuja ne Nyumà Mwìmpè ngwàkalwa pambidi pàa Eddie Perronet ne bàvwa bafunde misambu yà kale yà cikùmà ayi. Kanwènaayikù nwitabuujà nàнку anyì? Fanny Crosby, pààkafùndàye ne:

Kùmpìcikù to, ekèlekèle, Éyi Musùngidi wa kalolo,
Tèèlejàku lubilà lwànyì lwà didìpwekesha;
Paùcidi ubiikila bakwàbò apu,
Kùmpìcikù to.

Wèwè Musùlù wà busàmbi bwànyì bwònsò,
Mutàmbe ne mwoyi bwànyì mémè,
Nganyì ùndiku nendè pa buloba apa pa kuumusha Wèwè?

Anyì nganyì mu Dyulu pa kuumusha Wèwè?

³²⁶ Ambi kì mbilenga anyì? Abi's bìdì bitùfikisha ku ne tùjingè kwimba *Ndi MuMunangè's*, kì mmwòmò anyì? Mpindyewu,

patùcìdì twimba bwà ewu musangu apa ne, *Ndi MuMunangè*, twànjàayi . . . Tudi banangàngàne muntu ne mukwèndè. Twètù katùyì banangàngàne muntu ne mukwèndè to, dībà adi katwèna mwà kuMunanga Yèyè to. Mpindyewu tùlabulanganàayi anu ku cyanza muntu ne mukwèndè. Juukilaayi ànu kuulu cyanaàna, ne olòlaayi ànu cyanza luseke lukwàbò lwà mèèsà alu mwaba kampànda, nùlabulanganè ku cyanza, muntu ne mukwèndè.

Ndi . . . (. . . ? . . .)
Ne wàkampetela lupàndù
Pa mucì wà Kàlvariyo.

Twìnyikàayaaku mitù yètù mpindyewu.

³²⁷ Nèndombèku Mwanèètù Williams, Mwanèètù Williams mwànà, bwà àlwekù kùneeku bwà katancì kakesè. Nèmmulòmbèku bwà yèyè kutangalaja batèeleji aba mu disambila.

³²⁸ Mémè ntu munangè Mwanèètù Williams, mwena Kilistò wa citende ewu, úndì mémè cyà bushùwà ngeela meeji ne mmusadidi mulelèlà wa Kilistò, díkù dyèndè dikesè adi. Ntu ne bwobùmwe bwàbúngì be ne bóbò aba. Ne nsongàlùmè yà ba-Moseley ne bakwàbò bònsò abu, tutu pàmwe, ne balundà bàànyì bààbúngì meneme muneemu mu Phoenix ewu, bāndi munangè ne mwoyi wānyì wònsò. Ndi ngeela meeji ne, mu dindà adi mu cìkèèná-kumòna aci, Yèyè wàkamba ne: “Bwònsò bawùkaadìku munangè, ne bwònsò bàdi bakunangè, Nzambì wàkupèèshibù.”


³²⁹ Ngeela meeji ne kùdi muntu kampànda mwab’ewu munkaci mwà kunyingalala ku mpèkaatù wèndè, mu nzùbu wa panshi, inabàànzà mutekete mwikàle údila mwadi.

Twìnyikaayi ànu mitu yètù bwà katancì kakesè bwèndè yèyè.

³³⁰ Nzambì munanga, awu ki mùkòòkò mukèsè wùvwà mushààle mu Phoenix anyì? Mémè ncyèna mumanyèku to, Nzambì. Wèwè ngudi mumanyè. Kàdi, dīngà ditùkù, wòwò awu newikalèku. Kàdi, Taatù, bwà ewu nùnkù, kakùyì mpatà to, mmukooko. Pa nànkù ndi nsambila bwà Wèwè ùmukwàcìshèku, ànu mpindyewu. Unzùlùlàku ciibi ne kalolo kònsò, wamba ne: “Lwàkwaku, Wanyi mwànà. Bwela ùmukè mu njila yà bacyòke, bazengèle ayi. Udi mutànkàkànètànkàkàne pambèlu pàpa mu mìdìmè ayi. Ncyèwù, leelù ewu, mpátuka bwà kukwangata. Nyumà Wanyì ngudi wakula neebè awu ne ùkubweja mu lupangu mpindyewu.” Enzàku nànkù, Nzambì. Swàku bwà nsongààkàjì ewu. . . ànu mu masangu à njila wa mwoyi kaaba aka. “Ewu ùmvwà Mèyì Àanyì, ne wìtabuuja Ewu udi muNtùme awu, ùdi ne Mwoyi wà kashidi.” Enzàku nànkù’s, Nzambì munanga, enzelàku mwena Kilistò wa citende awu. “Ewu wálwa Kùndi, Ncyàkumwipatakù to nànsha byà munyì.” Pàcìdì bansantu biimàne pàmwe ne nsongààkàjì ewu apa, biikàle bàsambila.

³³¹ Vùlukàku ne, nànsha Pòlò mene, yéyè wàkaashìibwa mabwe bibi be mu mùshindù wà ne ùkaavwa ùpunga ne lufù awu, kàdi pààkiimanà bansantu kuntwaku apu ne kusambilabò, mwoyi wàkaalukila. Bwalu, mu mibidi yà bansantu abu mùvwa bukolè bufùùlùludi bwàkaalujilà Munsantu Pòlò nyumà wa mwoyi. Nzambi, ncyà bushùwà ne cìvwa cìfwànyine ànu kusambila disambila, dyà lufù lùpàtuka mu . . anyi lufù lùpàtuka mu muntu awu, ku disambila dyà diitabuuja, ùya ku mwoyi. Enzàku nàнку, Nzambi munanga.

³³² Tùbènèshèku mpindyewu patùdi baKwindìle apa. Mu Dìna dyà Yesù Kìlistò mmutùdi tulòmba emu.

³³³ Mpindyewu ne mitù yènù miinyika, nèndombè Mwanèètù Williams. 

CITAMPÌ CYÀ PAASÀKÀ LUA65-0410
(The Easter Seal)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambòmbò mu dindà, mu matùkù 10 à ngondo mwinâyì, cidimu cyà 1965, bwà didyà dyà mu dindà dyà Bwobùmwè bwà Buloba bujimà bwà Beena Kantu-ku-byanza bàà Èvànjeeliyò mu Kaabujimà ku Ramada Inn mu Phoenix, Arizona, U.S.A. Ndyumusha pa mukaba wa mêtì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org